

清外史叢刊之一

清室外紀

上海中華書局印行



清室外紀

第一章 順治朝

清世祖皇帝爲入關後第一代君主。當時記載簡略。其事不詳。因世祖在位。雖有十八年。而退位之時。只二十三歲。其叔睿親王監理國事。皇帝沖幼。受成而已。至一千六百年。睿親王薨。帝乃親政。時年十二歲。聰明天縱。異於恆人。但自幼卽有超脫出世之思。長而愈甚。既親政。首下數諭。其中一諭。卽定僧道之規律。而於考試掄才。亦極鄭重。時當開國之初。朝廷氣象。煥然一新。如旭日之初出。凡明末奢靡囂張。懈惰腐敗之風尚。均爲不變。官吏勤職。人民悅服。可稱世運太平之始。今日清室。既已遜位。忽有一人自稱爲出世人。作一文。言清室自世祖始。卽非愛新覺羅氏之血脉。謂世祖之父。非天聰帝。而爲一漢人。此言荒謬不經。彼雖自稱爲出世人。實則爲革命黨人。此種少年語。語愛國。實不過一時之客氣。又參合以自私自利之見。乃發爲一種詆誣滿洲之議論。此與予慈禧外紀一書中。所述文慶之言。同一毫無根據者也。然滿清一代。此等議

論時時發現。謂順治雍正乾隆光緒。皆非覺羅氏之血脉。其言固屬荒唐。而信之者亦復不少。予今述及此種譎言。非信其說。乃顯明少年革命黨人之一種論調而已。世祖爲滿人入關後開創之主。聰明天亶。毫無失德。其叔睿親王監國之時。創立法度。所定家法極嚴。杜絕閹宦干政之弊。前此亡明社稷之一般狐鼠。已隨明之宗社而俱盡矣。或逃往河間本籍。或隨諸王逃往南方。卽有餘孽在宮中者。其勢力亦已盡失。不敢爲惡。故前明宮庭中污穢之迹。此時已滅絕之矣。睿親王爲太祖第十四子。往張家口射獵猝薨。年三十有九。卽一千六百五十年之十二月也。帝聞震悼。靈輓返時。親往接之。初帝在位。一切軍國之事。皆由睿親王監理。諸王心懷不平。及薨。遂羣起攻之。謂其圖謀不軌。盜竊宮中珍寶。有朝珠一串。乃太祖皇帝之物。現以殉葬云云。帝不得已。乃命親貴查考。及覆命。頗有實據。遂下諭削睿王封爵。並將玉牒中睿王之名。及其母之名。削除。此事於開國榮光。頗有所損。故其後乾隆四十三年。高宗皇帝下諭昭雪之。諭中言爲後世之徵信計。將從前關於此事之上諭。均不載入國史。蓋以其所舉罪蹟。乃爲人所誣陷也。此與光緒二十七年。慈禧太后命將前此信任拳匪之上諭。均撤銷者同。

高宗皇帝既降諭昭雪睿王之冤。乃賜復封爵。命其第五世孫承襲。又命睿王陪饗太祖。於是此開國首功之王。神始安矣。世祖十五歲行大婚禮。皇后佟佳氏。卽聖祖之母也。康熙二年崩。其德性不詳於記載。（考世祖於順治十一年六月冊立博爾濟吉特氏爲皇后。聖祖登極上尊號曰仁憲皇太后。後又迭次加上恪順誠惠純淑端禧等號。康熙五十六年十二月崩。諡曰孝惠章皇后。此一人也。若佟佳氏。本世祖妃。故事宮中。凡妃嬪內漢字姓氏。率加一佳字。）誕生聖祖康熙元年十月。尊爲慈和皇太后。二年二月崩。諡曰孝康章皇后。此又別一人也。）世祖所最寵愛者爲董妃。美而賢。聰慧能文。有一漢人記其事者。謂妃時進規諫。請帝凡朝臣章奏。皆一一親覽。又勸帝崇尚儉德。宮中宴會。只須飲饌適口。不必太豐。帝自言每日臨寢之時。妃必親查室內熱度。而調適之。薨時年甚少。帝悲感不能自解。親作碑文。記妃德行。其中言帝常命妃陪宴。妃恆不願。勸帝出與大臣共之。其勸帝親賢勤政類如此。由此亦可見當時朝廷禮節尙簡略。上下情意相親。不似後此之尊卑懸絕也。蓋初入關時。猶存滿洲舊風。其後則一切如漢人之制度矣。依正史觀之。則帝於一千六百六十一年董妃薨後。不久卽崩。

葬於山陵。卽亡明最後逃往緬甸之帝。在雲南擒獲之後數月也。但此事不能無疑。漢人記載頗有言帝因愛妃之薨。無意國事。乃將國政交與大臣四人。使輔幼主。而潛往山中削髮爲僧者。因此事甚怪。有關國體。故朝廷諱之。但當時文人歌詠頗言其事。如吳梅村清涼山讚佛詩。卽詠此事也。（今人每謂董妃卽明季秦淮名妓董小宛。按小宛後歸如皋冒辟疆爲姬。先辟疆病卒。辟疆曾著影梅庵憶語。哀之不可誣也。考董鄂爲滿洲之一部族。或作棟鄂。又作東鄂。妃當是其部人。況皇朝文獻通考明載孝獻皇后棟鄂氏。內大臣鄂碩女。順治十三年十二月封皇貴妃。十七年八月薨。追封皇后。諡曰孝獻。始末昭然。近世無根之言。似未可據。）

附錄吳梅村清涼山讚佛詩。清涼山卽山西五台山也。其一曰。西北有高山。云是文殊臺。臺上明月池。千葉金蓮開。花花相映發。葉葉同根栽。（注云。四詩詠史起六句。

自清涼山說起。王母以下言妃之承寵從獵。以下言妃之侍讌而樂極生哀。若預爲識者。淳博士東方生十句。則以內外侍從之人作襯也。）王母攜雙成。綠蓋雲中來。漢主坐法宮。一見光徘徊。結以同心合。授以九子釵。翠裝雕玉輦。丹髯沉香齋。護置

玻璃屏。立在文石階。長恐乘風去。舍我歸蓬萊。（此段是定情後。恩寵之感。然乘風舍我。已有識意。）從獵往上林。小隊城南隈。雪鷹異凡羽。果馬殊羣材。言過樂遊苑。進及長楊街。張宴奏絲桐。新月穿宮槐。（此段言其樂。）攜手忽太息。樂極生微哀。千秋終寂寞。此日誰追陪。陛下壽萬年。妾命如塵埃。願共南山樹。長奉西宮杯。（此段是樂極語。然倚伏之理。正自相因。不徒寫情醜至。）披香淖博士。側聽私驚猜。今日樂方樂。斯語胡爲哉。待詔東方生。執戟前詆諧。薰鑪拂黼帳。白露零蒼苔。吾王慎玉體。對酒毋傷懷。（此作兩層襯託。淖博士。晉御之人。東方生。侍衛之臣。胡爲哉。是猜毋傷懷。是諧也。）其二曰。傷懷驚涼風。深宮鳴蟋蟀。嚴霜被瓊樹。芙蓉凋素質。可憐千里草。萎落無顏色。（此首是悼妃之薨。涼風蟋蟀。紀其時。千里草。董字也。與雙成句相應。按順治十八年八月壬寅。皇貴妃董鄂氏薨。）孔雀蒲桃錦。親自紅女織。殊方初云獻。知破萬家室。瑟瑟大秦珠。珊瑚高八尺。割之施精藍。千佛莊嚴飾。持來付一炬。泉路誰能識。紅顏尚焦土。百萬無容惜。（此段言冥器之盛。）小臣助長號。賜衣或一襲。只愁許史輩。急淚難時得。從官進哀誄。黃紙抄名入。流涕慮郎才。咨嗟謝生

筆。尚方列珍膳。天廚供玉粒。官家未解菜。對案不能食。（此段言哀誅之意。按章廟遺詔云。端敬皇后於皇太后克盡孝道。輔佐朕躬。內政聿修。朕仰奉慈綸。追念賢淑。喪祭典禮。過從優厚。不能以禮止情。諸事踰濫。不經是朕之罪一也。）黑衣召誌公。白馬馱羅什。焚香內道場。廣座楞伽譯。資彼象教恩。輕我人王力。微聞金鷄詔。亦由玉妃出。（此段讚佛。尙未指定清涼山。說按順治十八年十一月朔諭曰。念端敬皇后。彌留時。諄諄以矜恤秋決爲言。朕是以體上天好生之德。特沛解網之仁。見在監候。各犯概從減等。）高原營寢廟。近野開陵邑。南望倉舒墳。掩面添悽惻。戒言秣我馬。遨遊凌八極。（此段言陵寢之盛。末句微逗出清涼山。按此言帝將遠遊也。南望倉舒墳。二句蓋董妃生一子先妃死故云。）其三曰。八極何茫茫。曰往清涼山。此山畜靈異。浩氣共屈盤。能畜太古雪。一洗天地顏。日馭有不到。縹緲風雲寒。（此首歸入清涼山）世尊昔示現。說法同阿難。講樹聳千尺。搖落青琅玕。諸天過峯頭。絳節乘銀鸞。一笑偶下謫。脫却芙蓉冠。游戲登瓊樓。窈窕垂雲鬢。三世俄去來。任作優曇看。（十二句讚佛引入某妃）名山初望幸。銜命釋道安。預從最高頂。灑掃七佛壇。

靈境乃杳絕。捫葛勞躋攀。路盡逢一峰。傑閣圍朱闌。中坐一天人。吐氣如旂檀。寄語漢皇帝。何苦留人間。烟嵐倏滅沒。流水空潺湲。回首長安城。緇素慘不歡。房星竟未動。天降白玉棺。惜哉善財洞。未得誇迎戀。惟有大道心。與石永不刊。以此護金輪。法海無波瀾。（晉書天文志房四星爲明堂天子布政之宮也房星明則王者明按此二句已明言帝未崩矣）其四曰。嘗聞穆天子。六飛騁萬里。仙人觴瑤池。白雲出杯底。遠駕求長生。逐日過濛汜。感姬病不救。揮鞭哭弱水。（此首言自古帝王未能忘情而歸之於讚佛也首段言穆王遠遊遇仙而尙有感姬之哭）漢皇好神仙。妻子思脫屣。東巡并西幸。離宮宿羅綺。寵奪長門陳。恩感傾城李。穠華卽修夜。痛入哀蟬詠。苦無不死方。得令昭陽起。晚抱甘泉病。遽下輪臺悔。蕭蕭茂陵樹。殘碑泣風雨。（此段言漢武求仙雖有脫屣妻子之語而生則極其寵幸沒則極其哀誅至終身而後已總見忘情之難也按章廟遺詔以十二罪自責所謂遽下輪臺悔也）天地有此山。蒼崖閣興毀。我佛施津梁。層臺簇蓮蘂。龍象居虛空。下界聞鬪蟻。乘時方救物。生民難其已。澹泊心無爲。怡神在玉几。長以兢業心。了彼清淨理。（此段從清涼山

說到佛。羊車稀復幸。牛山竊所鄙。縱灑蒼梧淚。莫賣西陵屨。持此禮覺王。賢聖總一軌。道參無生妙。功謝有爲恥。色空兩不住。收拾宗風裏。（此段是第三段意。按此皆言帝在五臺修行也。）

帝自幼卽耽空寂。嘗自書一聯。意謂過去之事。旣親嘗之矣。未來之事。亦不過如此。人生世間。無味已極。又言旣參透此理。何爲仍居世間。日理俗務。當時記載。又謂帝退位前不久。曾謂鰲拜（卽顧命四大臣之一）曰。嗣皇帝登極之時。朕將在羣臣之後。自旁觀之。此與亞力山大之語恰同。蓋西方記載。亦言亞力山大之崩。非其真。乃在西比利亞披緇。其退位前。亦曾語尼古拉斯第一之婦曰。嗣王舉行加冕禮時。朕將在衆中參觀之也。世祖遜位之事。中國人幾皆信之。謂帝先與大臣商定。佯言駕崩。而實往天壽山寺爲僧。（按又有言在五臺山者）寺離京十四英里。記載家言此寺中一長老。平時所服之衣。彷彿帝者。現寺中猶有其遺像。像加漆。外塗以金。約三十餘歲。與壽皇殿中世祖之像相似。卽此書首之像片也。服飾亦不同。常僧尋常僧人。恆披紅袈裟。此像則服黃龍袍。人言此袍卽聖祖皇帝所送。長老在時。聖祖曾到此廟中三次。長老對帝不

行叩首之禮。至一千六百七十年。長老圓寂。聖祖送一銅像。並送珠玉爲殉。其塋至今猶存。每年開放一次。任人瞻禮。至者咸言此地有皇帝葬焉。此事雖言者歷歷。而真僞究不可知。但世祖崩時。年只二十三歲。幼帝嗣立。由大臣四人輔佐之。是爲聖祖。聖祖在位六十一年。爲清代首出聖明之主。（接近人所著都門識小錄亦記天壽山寺僧像事。今附錄於此。京西三山有山前鬼王山。後魔王之諺。聞明天啟間。有海袖禪師行脚至北在西山（三山之一）寶珠洞。掛單流賊陷京師。山前死人極多。洞中僧皆逃去。唯師獨留。每夜靜。卽聞梵聲喃喃。爲諸魂超度。迨世祖入關。嘉其功行。加封賜紫。後圓寂於此。檀越爲塑金身。以誌信仰。土人因呼爲山前鬼王。云至魔王。歷史則衆口一辭。謂卽章廟。相傳於二十七歲冬間。忽潛往天壽山（三山之一）寺。落髮修道。剃度時作詩數首。有來時鶴突去。時迷空在人間走。一回又我本西方一佛子。緣何流落帝王家。等句。土人謂像爲肉體。金裝寺內有巨缸一具。斗大石球二枚。每年四月初一日。開寺遠近進香者雲集。城內中西人往遊者亦夥。寺前有碑數方。皆檀越題名。毫無記載。按明人雙槐歲抄有妖僧煽亂一則。云英宗親征也。先敗於土木。太后命郕王監國。改元。

景泰是時有天壽山妖僧四處揭帖言其師景泰禪師於某年圓寂曾示今年今日當出世爲君并邀集土人往揭藏骨缸果見法身未壞卽舁出裝金設座稱爲景泰菩薩鄉愚迎賽舉國若狂後爲順天府封禁將妖僧拿辦以山名及巨缸證之則今之所謂魔王者卽景泰菩薩非章廟也章廟爲僧事予曩閱某說部書曾載之以其顯違實錄不敢信乃都人對於魔王竟稱爲章廟年年開寺進香昌言不諱而朝廷亦不之禁殊可異已

第二章 康熙朝

清之聖祖其慈仁聰睿之德。文治武功之盛。以及其學問之深。戰術之精。射獵之工。材藝之博。真可當聖之一字而無愧。當時耶穌教徒之在北京朝廷者。記載甚詳。今不足述。此等教徒。當時在朝中頗有聲望。雖其記載有偏於宗教之弊。而大概論之。究爲佳著。讀之足知帝爲一最仁慈之主。虛衷納諫。五次親征準噶爾。在一千六百九十一年。及一千六百九十七年之時。耶穌教徒曾隨帝出行。所記言當時文學美術技藝等一切均臻極盛。洵爲首出之大皇帝也。又有一西人名佛朗可士。糾比倫者。乃算術家。與

一葡萄牙人均承帝之優待。與前在欽天監服職之法比司得同。當一千六百九十三年（卽康熙二十二年）之時。帝偶患熱症。西人進金鷄納霜丸。帝頗感謝。並在宮內造一教堂。見各教士如古里慕爾的方特里包法梯諸人。德行學問皆甚佳。乃下諭許中國人入教。此諭大有助於基督教之傳播。但其後耶穌教徒與天主教徒。內部自生水火。帝意浸淡矣。當時耶穌教徒欲勸帝及太子信教。用力不懈。常述歐洲技術科學及基督教理於帝之前。帝亦欣然納之。似其希望可以達者。一千六百九十三年。有一神甫名方特理者。函致歐洲之神甫云。皇太子將來登極。必爲世界才能出衆之君主。所缺者唯未入教耳。又函云。皇太子現年二十一歲。曾有意欲購法國鐘表數枚。此太子將來必登大位。乘機聯絡。甚爲緊要云云。此種新聞。既達歐洲。傳誦殆遍。皆信帝及太子將入教矣。其後又見帝許中國人入教之上諭。羣心尤鼓舞。然至一千六百九十七年。北京教徒。又有一信至歐洲。則知此希望不甚確實。其函曰。前傳聞中國皇帝有入教之意。不知汝曾聞之否。但此消息不甚確實。予今日亦尙疑之。特此函告云云。在一千六百九十五年之函。則言宮中有一皇子。已受洗禮。其母卽大行皇后之妹。又有一

皇子。只十三齡。亦甚信教。唯帝雖遇教士甚優。而實無信教之志。帝意之變。亦大半因耶穌教徒熱心過度所致。當時教徒。以帝度量寬大。且待遇優渥。其所爲頗有過當者。故爲帝所不懌。聖祖皇帝在位六十一年。爲自古所罕有者。其內治外交文化武功。閱者觀當時耶穌教徒之記載。即可得其大概。茲不復述之。帝卽位後七年之中。國政皆由輔佐四大臣處理。但太皇太后不悅四人。帝亦惡之。而於鰲拜爲尤甚。太皇太后者。卽太宗皇帝之后。蒙古人性質剛強。而皇太后亦然。順治時羅馬天主教士頗蒙朝廷優待。今輔政大臣皆黜之。並將教士安得姆監禁。此人卽曾爲康熙帝之師者。帝八歲登基。至十五歲時。因太皇太后及大臣之助。將輔佐四大臣革除。觀滿清一代之歷史。其歷朝之中。有一成例。卽西人米爾所稱東方人特別性質之一。此性質爲何。卽猜忌是也。凡嗣帝對於先帝之大臣。恆生猜忌之心。如順治朝則黜革睿親王之爵。康熙朝則除四輔臣。嘉慶朝亦將高宗寵臣和坤賜死。道光朝則將其先有權之宦官革除之。咸豐朝則除穆彰阿。同治朝則慈禧除贊襄王大臣。而至末代攝政王。亦以帝名除袁世凱。幾若成爲定例焉。聖祖初年。輔政大臣當國時。視之如芒刺在背。鰲拜對帝尤爲

驕傲無禮。帝不能忍。但其黨與甚衆。太皇太后命帝慎圖之。至一千六百六十九年（即康熙八年）元旦。鰲拜爲首。帶領諸臣入殿朝賀。穿一黃袍。服飾儼如皇帝。其不同處。僅帽上一結而已。蓋其帽上爲紅絨結。而皇帝則束珠也。帝默視之。退朝後。問太皇太后以何法除之。時太皇太后有一心愛之小闈。在旁擲骰。中國人以擲得六骰不同爲順。乃吉祥之兆。帝言此事時。手執骰。若有所禱告者。一擲恰爲不同。太皇太后大喜。曰。汝勿憂。定主大吉。即此一端。亦可見太皇太后直爽堅定而帶迷信之性質。其後慈禱太后亦有此性質。遂執掌中國大權五十年也。數月之後。鰲拜入宮。帝即令布庫（布庫二字滿洲語謂相撲之戲也。脫帽短禱兩兩相搏。以仆地決勝負。蓋宮廷中以此練習健士。後京營兵制有所謂十五善撲者。即其遺意。蒙古尤重此戲。筵宴時必陳之。謂之布克。即布庫之轉音）執之下於獄。降諭宣布罪狀。革除四人輔政之名。命大臣會議。均言應處以凌遲之刑。以帝加恩。賜令自盡。家產充公。除世襲公爵之外。餘均削除。帝因此遂定爲例。每歲首必擲骰。以下一年之休咎。故宮中元旦。皇帝退朝。總管太監以金盆進。內置六骰。帝必擲之。但其後爲太監等所逢迎。已失本意。蓋其骰製法甚

巧。每擲必爲不同。總管太監乃叩賀以爲大吉之兆。遂成爲極無意味之事矣。鰲拜未拿問前七日。曾請病假。帝親臨視疾。鰲拜臥於坑上。風動袍開。見其中藏短刀一柄。凡臣子見帝。例不許帶兇器。帝見之。笑曰。鰲拜真是滿洲好男子。雖病臥。佩刀猶不去身。從者皆知鰲拜之命運不遠矣。帝在位六十一年。文治武功。可謂極盛。然暮年恆鬱鬱不樂。皆其不肖之子使之。帝雖學問極深。仍沿歷代之弊。妃嬪衆多。故子孫蕃衍。不肖者各樹黨與。以相傾害。使其暮年之父。憂愁憤懣。鬚髮漸白。以近於陵墓矣。中國行家族之制。此等事乃所常有。而不能免者。觀帝訓戒其子之上諭。可見帝自信甚堅。且以子孫之衆多爲福。亦欲其子孫如己之福德。但不能如其所願。因子孫之不肖。致暮年心緒多惡。而爲盛治之累。帝共生三十五子。長成者二十四人。今列表於後。（表已見前）右表內允禔。允禩。允禵。允禔。允禵。允禵。皆謀廢太子。以戴允禩者也。允禩極有才。但頗信耶穌。朝臣以是疑之。帝初待耶穌教士本甚厚。後因教士內鬩。且見皇子中有與教士結納者。意浸厭之。五王之陰謀。雖爲帝所覺。然太子亦實有失德。故帝終廢之。一千七百零八年。卽康熙四十七年。帝狩於熱河。見諸皇子有不法事。甚爲憤懣。命侍衛吳什暢

壽治儀正存柱傳諭扈從諸大臣曰。近日聞諸阿哥嘗撻辱諸大臣侍衛。又每尋釁端。加苦毒於諸王貝勒等。諸阿哥見今俱未受封爵。卽受封後。除伊屬下人外。凡有罪過。亦當奏聞。候朕處分。伊等何得恣意妄行。捶撻乎。朕爲天下元后。凡事但遵大義而行。無罪之人。未嘗枉法處治。國家唯一主。朕日禱祝於天。亦欲衆皆無事。以享太平耳。八議內三品以上官員。雖犯罪不違議。斬議絞。而必奏聞者。所以敦國體。非爲臣下也。諸阿哥擅辱大小官員。傷國家大體。此風斷不可長。伊等不遵國憲。橫作威勢。致令臣僕無以自存。是欲分朕威柄。以恣其行事也。豈知大權所在。何得分毫假人。卽如裕親王恭親王。皆朕親兄弟也。於朕之大臣侍衛中。曾敢笞責何人耶。縱臣僕有犯罪者。朕亦斷不寬宥。然從未有輕聽人言。橫加僂辱之事。且太祖太宗。曾降訓旨。戒勿濫行捶楚。荼毒無辜。煌煌實錄。紀載甚明。不意今日竟流而漸下。不法多端也。去年朕幸洮爾河時。喀喇沁之護衛茅欣。管理圍場。因科爾沁之人行列不整。意欲撻之。朕尙遣人往諭。茅欣云。爾乃喀喇沁人。而責科爾沁之人。恐科爾沁人衆寒心。喀喇沁之人尙不可責。科爾沁之人。諸阿哥何得妄將大臣侍衛尋釁捶撻。加以苦毒。嗣後諸阿哥如仍不

改前轍。許被撻之人面詰其見撻之故。稍有冤抑等情。卽赴朕前叩告。朕且欣然聽理。斷不罪其人也。至於爾等有所聞見。亦應據實上陳。若一切隱諱。後來漸至殺人。亦將隱而不奏乎。爾等隱而不奏。卽爾等之罪矣。若吳什暢壽存柱三人將朕斯旨。或隱一言。不宣諭明白。使衆咸知。卽將伊等正法。數日之後。帝駐蹕布爾哈蘇台。召諸王大臣侍衛文武官員等齊集行宮前。命皇太子允礽跪上垂涕諭曰。朕承太祖太宗世祖宏業。四十八年於茲。兢兢業業。軫恤臣工。惠養百姓。惟以治安天下爲務。今觀允礽不法祖德。不遵朕訓。惟肆惡虐衆。暴戾淫亂。難出諸口。朕包容二十年矣。乃其惡愈張。僂辱在廷諸王貝勒大臣官員。專擅威權。鳩聚黨與。窺伺朕躬。起居動作。無不探聽。朕思國惟一主。允礽何得將諸王貝勒大臣官員任意陵虐。恣行捶撻耶。如平郡王訥爾素貝勒海善公普奇俱被伊毆打。大臣官員以至兵丁。鮮不遭其荼毒。朕深悉此情。因諸臣有言及伊之行事者。伊卽仇視其人。橫加鞭笞。故朕未將伊之行事一詢及於諸臣。朕巡幸陝西江南浙江等處。或駐廬舍。或御舟航。未嘗跬步妄出。未嘗一事擾民。乃允礽同伊屬下人等恣行乖戾。無所不至。令朕赧於啟齒。又遣使邀截外藩入貢之人。將進

御馬匹。任意攘取。以致蒙古俱不心服。種種惡端。不可枚舉。朕尙冀其悔過自新。故隱忍優容。至於今日。又朕知允礽賦性奢侈。著伊乳母之夫陵普爲內務府總管。俾伊便於取用。孰意陵普更爲貪婪。致使包衣下人。無不怨恨。朕自允礽幼時。諄諄教訓。凡所用物。皆係庶民脂膏。應從節儉。乃不遵朕旨。窮奢極欲。逞其兇惡。今更滋甚。有將朕諸子不遺噍類之勢。十八阿哥患病。衆皆以朕年高。無不爲朕憂慮。伊係親兄。毫無友愛之意。因朕加責讓。伊反忿然發怒。更可異者。伊每夜逼近布城裂縫。向內竊視。從前索額圖助伊潛謀大事。朕悉知其情。將索額圖處死。今允礽欲爲索額圖復仇。結成黨與。令朕未卜。今日被鳩。明日遇害。晝夜戒慎不寧。似此之人。豈可付以祖宗宏業。且允礽生而剋母。此等之人。古稱不孝。朕卽位以來。諸事節儉。身御敝褥。足用布襪。允礽所用一切。遠過於朕。伊猶以爲不足。恣取國帑。干預政事。必至敗壞我國家。戕賊我萬民而後已。若以此不孝不仁之人爲君。其如祖業何。諭畢。上復痛哭仆地。諸大臣扶起。上又諭曰。太祖太宗世祖之締造勤勞。與朕治平之天下。斷不可以付此人。俟還京。昭告於天地宗廟。將允礽廢斥。朕前命直郡王允禔善護朕躬。並無欲立允禔爲皇太子之意。

允禔秉性躁急愚頑。豈可立爲皇太子。其允礽黨羽。凡係畏威附和者。皆從寬不究。外將索額圖之子格爾芬阿爾吉善暨二格蘇爾特哈什太薩爾邦阿俱立行正法。杜默臣阿進泰蘇赫陳倪雅漢著充發盛京。此事關繫天下萬民。甚屬緊要。乘朕身體健康。定此大事。著將允礽卽行拘執。爾諸王大臣官員兵民等。以允礽所行之事。爲虛爲實。可乘公陳奏。衆皆叩首流涕。奏曰。皇上所見。至聖至明。諭旨所言。皇太子諸事。一一皆確實。臣等實無異辭。可以陳奏。數日後。上駐蹕博濟和屯。命近御侍衛吳什等傳諭諸大臣侍衛及官兵人等。允礽爲皇太子時。有所使令。爾等敢不遵行。但其中豈無奔走逢迎之輩。今見皇太子廢斥。恐爲朕訪知。或旁人首告。必至誅戮。日夜危懼。靡有寧時。朕以允礽凶戾。勢不得已。始行廢斥。斷不展轉搜求。旁及多人。若將從前奔走之人。必欲盡行究處。卽朕宮中宦侍。將無一人得免者。今事內干連人等。應正法者。已經正法。應充發者。已經充發。事皆清結。餘衆不更推求。嗣後雖有人首告。朕亦不問。毋復疑懼。至於三貝勒允祉平日與允礽甚相親睦。所以召允祉來者。因有所質問。並非欲拘執之也。伊雖與允礽相睦。未嘗慊惡爲惡。且屢曾勸止允礽。允礽不聽。此等情節。朕無不

悉知其杜默臣等四人。朕心疑之。故充發盛京。然伊等無大惡款。果有大惡。已早在誅戮之列矣。朕頃因悵憾不寧。中心煩悶。故於衆人危懼不安之情。未復宣明諭旨。今可徧諭本營及後營人等。踰日又諭領侍衛內大臣滿洲大學士前鋒統領護軍統領副都統護軍參領侍衛滿洲侍郎學士起居注官等。朕歷覽書史。時深儆戒。從不令外間婦女出入宮掖。亦從不令姣好少年隨侍左右。守身至潔。毫無瑕玷。見今關保伍什俱在此。伊等自幼隨侍朕躬。悉知朕之行事。今皇太子所行若此。朕實不勝憤懣。至今六日未嘗安寢。上涕泣不已。諸臣皆嗚咽奏請曰。天下臣民所仰賴者。唯我皇上。伏願皇上以祖宗宏業爲重。暫釋痛憤。頤養聖躬。上曰。朕承繼大統。數十年來。擴從古未入版圖之疆宇。服從古未經歸附之喀爾喀厄魯特等。今雖年齒漸增。亦可以縱橫天下。非自矜伐也。爾諸大臣官員軍民人等。皆愛戴朕躬。出於至誠。朕於大小臣工。亦無不撫恤。從未嘗妄行笞辱一人。今中外大臣病故者甚多。朕皆爲之摧心墮淚。爾諸臣未必知也。諸臣既以朕躬當頤養爲請。朕豈有不加意頤養者耶。又諭今歲有事。朕已豫知。朕意中時若有一事將發者。曾向允禔言之。今歲朱三一念和尙事發後。允禔奏曰。皇

父之言驗矣。朕謂之曰：尙恐未盡於此也。彼時亦不知何事，而不意竟有此事也。又諭朕閱實錄。太宗皇帝統大軍抵北京，擊敗明兵，凱旋之時，諸大臣固請曰：臣等隨從至此，本圖建立功業，今奈何薄城而不取？太宗皇帝曰：今取此城甚易，當視天意何如。嗣後北京爲流賊所據，我諸王佐世祖皇帝直取北京，統一區宇，逮於朕躬，歷二代六十五年。今天下治安，率土人民咸享太平之福，此亦朕恪守祖業，夙夜勤勞之所致也。朕曾因亢旱，宮中齋戒三晝夜，焚香懇禱上帝，至祀園丘之日，立見感格，大沛甘霖，始知幽獨之誠，具在上天昭鑒中也。後又值旱災，左右奏請朕仍前禱雨，朕言今天下豐裕，朕心之誠恐不及前，上天皆已鑒知，不宜輕禱。此朕不敢稍有虛僞之意，故以此心告之諸臣。自今以後，益當與爾等加意圖治耳。上回京，沿途察看太子情狀，諭內大臣大學士翰林官員等，近觀允初行事，與人大有不同，晝多沈睡，夜半方食，飲酒數十巨觥，不醉，每對越神，則驚懼不能成禮。遇陰雨雷電，則畏沮不知所措，居處失常，語言顛倒，竟類狂易之疾，似有鬼物憑之者。四日後，又諭大學士等，允初宮人所居攔芳殿，其地陰黯不潔，居者輒多病亡，允初時常往來其間，致中鬼魅，不自知覺，以此觀之，種種

舉動皆有鬼物使然。大是異事。先是拘執廢皇太子允禔時。沿途皆直郡王允禔看守。至是抵京。設氈帷。居允禔於上駟院旁。上特命皇四子同允禔看守。帝既稟告皇太后。以廢斥太子事。遂命大學士等召集諸王貝勒等副都統以上大臣九卿詹事科道官。等於午門內。宣諭曰。皇太子名分關繫重大。朕熟觀史冊。豈有輕舉之理。當允禔幼時。朕親教以讀書。繼令大學士張英教之。又令熊賜履教以性理諸書。又令老成翰林官。隨從朝夕納誨。彼不可謂不知義理矣。且其騎射言詞文學。無不及人之處。今忽爲鬼魅所憑。蔽其本性。忽起忽坐。言動失常。時見鬼魅。不安寢處。屢遷其居。啖飯七八碗。尚不知飽。飲酒二三十觥。亦不見醉。匪特此也。細加訊問。更有種種駭異之事。至其近侍人員。亦不爲少。其中豈無一二受伊恩遇者。而竟不能得一二入之心。以此觀之。非狂疾。何以致是。朕初意俟進京後。告祭奉先殿。始行廢斥。乃勢不可待。故於行在拘執之。爾諸王貝勒大臣官員衆意云何。和碩康親王椿泰等諸王貝勒滿漢文武大臣官員。齊跪奏曰。皇上之於皇太子。仁以育之。義以訓之。歷年已久。不意數年來。皇太子忽染狂疾。爲鬼物所憑。種種行事。不似平時。皇上深念祖宗宏業。國計民生。如此施行。允協。

於理。臣等當公同具本上奏。上諭曰。朕志已定。當卽告祭天地太廟社稷。廢斥皇太子。著行幽禁。又諭諸皇子及領侍衛內大臣滿洲大學士尙書侍郎學士等。允礽乃皇后所生。朕煦嫗愛惜。親加訓諭。告以祖宗典型。守成當若何。又教之以經史。凡往古成敗。人心向背。事事精詳指示。允礽雖於他事不知。寧不知人心之不可失耶。乃幼承朕訓。習知義理。而反致人心盡失。其爲鬼神所憑。狂惑成疾。彰彰明矣。今允礽事已完結。諸阿哥中儻有借此邀結人心。樹黨相傾者。朕斷不姑容也。昔我太祖皇帝時。因諸貝勒大臣訐告一案。置阿爾哈圖土門貝勒褚燕於法。太宗皇帝時。固莽古爾泰德格類貝勒一案。罪及哈達公主。又因永平一案。幽禁阿敏貝勒。世祖章皇帝時。禮親王舉劾其子碩託貝子及其孫阿達禮王。壞法亂國。均正典刑。睿親王撫政時。錫翰貝子諸人因諂媚伏誅者甚多。迨至朕躬。鰲拜欲殺蘇克薩哈。朕年尙幼。屢經敕諭。而鰲拜卒將蘇克薩哈誅滅。諸大臣多株連被殺者。此等大案。間常有之。而宗室內互相傾陷者尤多。此皆要結黨援所致也。爾等可不戒乎。朕今御極四十有八年矣。歷覽史冊。鮮有如朕在位之久者。以此觀之。上天之眷佑可知矣。旣承天眷。朕安得不爲國爲民竭盡心力。

乎。時有二大僚允禩之黨也。陰謀擁戴允禩以太子。雖廢恐帝後復憐之。又上一奏。構陷廢太子諸不法事。欲激帝置之死地。帝閱之。果大怒。決意欲誅太子。本擬自暢春園回宮後。卽宣旨矣。滿人老德喇（譯音）者。帝之近臣也。年已篤老。爲人樸忠。帝甚重之。自暢春園回鑾之前。此老臣請見。絮談閒語。良久笑曰。近日有一奇異之事。現管城門侍衛某人。本甚肥胖。今忽骨瘦如柴。帝領之。及回鑾。見此人仍肥胖如昔。遂召老臣來前。責以言之不符。此老臣叩頭答曰。由此可見天下傳言之不足據者實多。則言廢太子之事者。無乃類是。太子一身。覬覦者甚衆。請陛下詳察。帝悟。誅廢太子之意遂解。大學士等以翰林院撰擬廢斥皇太子告祭天地太廟社稷文呈奏。得旨。朕之所行。無不可昭告上帝者。爾等所撰文。未盡朕意。朕親撰一文。抒寫悃誠。爾等不可改移一字。卽行翻譯呈覽。尋大學士等以翻譯御製告祭文呈奏。上召入諭曰。朕所撰文內。有鞠躬盡瘁。死而後已。乃師諸葛亮出師表之語。爾等殆謂此語惟人臣可用。而人君則不可用。是以變其文而譯之。朕每謂諸葛亮乃純臣。亮之此語。非特人臣當如此。人君益當如此。朕常爲諸臣言之。爲人臣者。猶有可諉。爲人君者。將安諉乎。惟當敬天勤民。鞠躬

盡瘁而已。朕爲上天之子。朕所仰賴者惟天。所倚信者惟皇太子。今皇太子所行若此。欲行廢斥。豈可不昭告上天。定於明日告祭。前諭中斥太子罪狀。有干預國政語。至是復命大學士等齊集各部院衙門大臣。問廢皇太子有將部院衙門事情私行更改處。否。如有著察明具奏。據大臣等奏稱廢皇太子並無將部院衙門事情更改之處。得旨。朕硃批事情。伊何敢私自更改。但好攬事。或將此作重。或將彼作輕。或將此寬免。如此私行屬託之事甚多。朕俱知之。所以凡事稍有可疑者。俱不准行。又以廢皇太子允禔頒詔天下。詔曰。朕承天眷命。紹祖宗宏圖。四十八年於茲。宵旰孳孳。不敢暇逸。所敬惟天。所重惟民。每念天生民而立之君。無非欲其愛養黎元。俾無失所。故於四方閭閻情形。周咨博訪。纖悉無遺。凡有可以厚民生。拯民困者。不惜數千萬帑藏。以溥施濟。累歲減免讞獄。所全活者不下數千百人。良以君道在於愛民。此帝王之常經。祖宗之家法。亦用以垂示後人。使知所則倣也。允禔自立爲皇太子時。勤教諭。並簡名望大臣爲之講明性理。歷有年所。願秉性乖戾。罔體朕心。違背朕訓。雖愆尤日積。尙冀悔悟。自新。屢次南巡江浙。西巡秦晉。皆命允禔隨行。原望其諳習地方風俗。民間疾苦。乃輒強勸地。

方大吏及所在官司索取財賄。所用宵小匪類。尤恣意誅求。肆行攘奪。夫地方物力。皆屬小民脂膏。朕屢諭允禔宜加節儉。乃窮奢縱欲。逞惡不悛。既已苛索外吏。復奪取外藩入貢馬匹等物。私用內外庫帑爲數甚多。流毒臣民。安所底極。邇來暴虐滔淫。過端彌著。自諸王以及大臣官員。悉被非禮凌辱。橫加捶撻。向因索額圖常泰交通設謀。朕洞覺其情。置索額圖於死。而允禔時畜忿於心。近復有偪近幔城裂縫窺伺。中懷叵測之狀。凡此舉動。類爲鬼神所憑。狂易成疾。書曰。天視自我民視。天聽自我民聽。人心所惡。天必厭之。宗社事重。何以承祧。朕圖維再三。萬不獲已。於康熙四十七年九月十八日。奉皇太后慈命。告祭天地太廟社稷。特廢黜拘禁。所以仰安宗社。俯慰臣民也。茲歷指廢黜之由。宣示中外。又因允禔貪暴縱恣。被累者多。深切軫念。爰敷寬恤之深仁。並布普施之德意。用宏懷保。不被寰區。於戲。激清國本。謹萬年久遠之圖。誕沛恩膏。渙九重悖大之詔。布告天下。咸使聞知。詔內恩款凡三十三條。次日又諭諸皇子曰。拘禁允禔時。允禔奏允禔所行卑污。大失人心。相面人張明德曾相允禔。後必大貴。今欲誅允禔。不必出自皇父之手。言至此。朕爲之驚異。朕思允禔爲人凶頑愚昧。不知義理。儻果

同允禩聚集黨羽。謀害允禔。其時但知逞其兇惡。豈暇計及於朕躬有礙否耶。似此不諳君臣大義。不念父子至情之人。洵爲亂臣賊子。天理國法。皆所不容者也。諭刑部尙書。巢可託左都御史穆和倫等。直郡王昨拏相面之人。張明德交與爾等。聞彼曾爲允禩看相。又散帖招聚人衆。其情節朕知之甚明。此案甚大。干連多人。爾等慎勿滋蔓。但坐張明德一人。審結可也。爾等皆大臣。此事不可蒙蔽朕躬。大學士溫達侍郎穆丹皆熟於辦事之人。可會同伊等速審具奏。又諭諸皇子曰。爾等應將各屬下人嚴行禁止。勿令生事。安分而行。爾等護衛官員乳母之夫。並隨從人等。多係下賤無知之人。必有各爲其主。在外肆行者。如允禩之太監三四人。護衛一二人。妄探消息。恃強無忌。朕悉知其姓名。况允禩之人。見殺於人。及因罪充發者。亦復不少。宜自知分量。速行更改。且皇太子之人。有干犯國憲者。尙不寬宥。爾等之人。又何論焉。前召爾等面諭時。允禩奏伊弟兄等嗣後同心合意。在皇父膝下安然度日。似此亦非善言。假使爾等內有不肖人行非禮事。亦可衆人一心助之而行乎。允禩既將人毀謗。欲置之死地。今又爲和好之言。誰其信之。且允禩於朕之侍衛執事人等。擅自責打者不少。今被打之人尙存也。

其看守允禔時。將允禔處所匠人盡行收去。又加以苦刑。以致匠人逃遁。且有自縊者。如此行事。何以服衆。今有十八阿哥之事。又有允禔之事。朕心傷不已。爾等宜仰體朕心。務存寬厚。安靜守分。勿與諸事。兢兢業業。各慎厥行。經云。愛親者不敢惡於人。敬親者不敢慢於人。爾等若不能謹身率下。復生事端。以傷朕心。是於臣子之道。兩失之矣。爾等豈忍爲之乎。可將此旨徧諭爾等屬下人知之。允禔署內務府總管。帝命其查原任內務府總管凌普家產。允禔啟奏。上諭凌普貪婪巨富。衆皆知之。所查未盡。如此欺罔。朕必斬爾等之首。八阿哥到處妄博虛名。凡朕所寬宥及所施恩澤處。俱歸功於己。人皆稱之。朕何爲者。是又出一皇太子矣。如有一人稱道汝好。朕卽斬之。此權豈肯假諸人乎。帝暮年每發怒。輒發舊疾。而諸子之不肖者。時時觸犯之。帝召諸皇子入乾清宮。諭曰。當廢允禔之時。朕已有旨。諸阿哥中如有鑽營謀爲皇太子者。卽國之賊。法斷不容。廢皇太子後。允禔曾奏稱允禔好。春秋之義。人臣無將。將則必誅。大寶豈人可妄行窺伺者耶。允禔柔奸性成。妄畜大志。朕素所深知。其黨羽早相要結。謀害允禔。今其事皆已敗露。著將允禔鎖拏。交與議政處審理。皇九子允禔語皇十四子允禔云。爾我

此時不言何待。允禩奏曰：八阿哥無此心。臣等願保之。上震怒，出所佩刀欲誅允禩。皇五子允祺跪抱勸止。諸皇子叩首懇求。上怒乃少解。命諸皇子撻允禩。將允禧、允禔逐出。大學士溫達等遵旨審訊相面人張明德，供由順承郡王長史阿祿薦於順承郡王及賴士公普奇公。由順承郡王薦於直郡王。我信口妄言皇太子暴戾，若遇我當刺殺之。又捏造大言云：我有異能者十六人，當招致兩人見王，聳動王聽，希圖多得銀兩。又由普奇公薦於八貝勒看相時。我曾言丰神清逸，仁誼敦厚，福壽綿長，誠貴相也。以上俱是實情等語。應將張明德擬斬立決。十月朔諭諸皇子議政大臣、大學士、九卿、學士、侍衛等：八阿哥允禩向來奸詐，爾等如以八阿哥係朕子，徇情出脫，罪坐旁人。朕斷不允。皇天在上，朕凡事俱從公料理，豈以朕子而偏愛乎。允禩先聽信其乳母之夫雅齊布之言，擅責御史雍泰。朕云：乃爲修大高殿事責之。朕云：雍泰係言官，如果有罪，朕亦必熟思再三始行治罪。爾豈可擅責御史。皇太子奏云：八阿哥責雍泰，皆其乳母之夫譴毀所致。自此允禩與皇太子遂成仇隙。後又因充發伊乳母之夫，愈加怨憾。如索額圖、長泰等子姪及迎合索額圖之人，今雖鎖拏，朕心猶有酌量，不卽行殺戮。而允禩

將人輒行責處可乎。觀伊等以強陵弱。將來兄弟內或互相爭鬪。未可定也。世祖六歲御極。朕八歲御極。俱賴羣臣襄助。今立皇太子之事。朕心已有成算。但不告知諸大臣。亦不令衆人知。到彼時爾等自遵朕旨而行。次日諭領侍衛內大臣大學士等。張明德於皇太子未廢之前。謀欲行刺。勢將漸及朕躬。據彼言有飛賊十六人。已招致兩人在此。但好漢俱經皇上收錄。若於其中不得一二人。斷不能成事。又云得新滿洲一半。方可行事。如此搖惑人心。幸朕之左右。持心堅正。故不爲所搖惑耳。此等情節。直郡王早已詳悉密奏。王布穆巴公。賴士普奇等。乃亂之首也。允禩知而不奏。爲臣子者當如是耶。張明德爲允禩看相。設無他言。允禩何以轉語九阿哥十四阿哥。九阿哥十四阿哥。又何所見而奏聞於朕。允禩見在鎖鑰。著將布穆巴。賴士普奇。阿祿。一併鎖鑰。爾等會同議政大臣。卽嚴加質訊具奏。張明德所犯情罪極大。不止於斬。當凌遲處死。領侍衛內大臣大學士議政大臣等會審。順承郡王布穆巴。供張明德往普奇公家。回至我府。言普奇謂皇太子甚惡。與彼謀刺之約。我入其夥。我不從。故以語直郡王。直郡王云。爾勿先發此事。我當陳奏。可覓此人。送至我府。因送往直郡王府。阿祿口供無異。公普奇

供我無狂疾。何敢尋死。而向彼妄言。此皆毫無影響之語。公賴士供我於順承郡王府中見張明德。因喚至我家中看相。普奇屬使送往伊處。故送往是實。此外我皆不知。九阿哥允禔十四阿哥允禵。供八阿哥曾語我等。有看相人張姓者。云皇太子行事兇惡已極。彼有好漢可謀行刺。我謂之曰。此事甚大。爾何等人。乃輒敢出口。爾有狂疾耶。爾設此心。斷乎不可。因逐之去。八阿哥允禩供我以此語告諸阿哥是實。問張明德口供無異。取供具奏。上諭諸皇子議政大臣大學士九卿學士侍衛等曰。貝勒允禩聞張明德如許妄言。竟不奏聞。允禩革去貝勒。爲閒散宗室。布穆巴以所聞情節商之長史阿祿。告直郡王使之奏聞。布穆巴阿祿俱無罪。著釋放。公普奇知情不首。革去公爵。爲閒散宗室。公賴士但令看相。並無他故。著釋放。張明德情罪極爲可惡。著凌遲處死。行刑之時。可令事內干連諸人往視之。上又親書諭旨示諸皇子大臣等曰。昨日諸大臣侍衛等奏請調養。朕念君臣一體。有懷宜卽盡言。故特舉朕素念及不遂朕意之處。一一明諭。朕每思自古帝王撫世承平。歷年久遠。未有如朕者。朕無日不向皇太子允禔言治理天下。愛育黎庶。維繫人心之事。又嘗慕宋孝宗之孝養高宗。語允禔曰。將以政事

付汝。朕當擇居水土佳處。時聞汝之令名。以優遊養性。迨後見其所行不善。難託重器。遂絕此望。古來爲君甚難。兢兢業業。猶有錯誤。今朕年已老。愈加畏懼。嘗念幸際衆心。胥戴萬國咸寧之時。得終天年。於願足矣。今允初過端業已如此。宗廟社稷。天下黎元。皆繫朕躬。朕豈可不自愛耶。頃者告天之文。極爲明晰。無俟復言。即使朕躬如有不諱。朕寧敢不慎重祖宗宏業。置諸磐石之安乎。迨至彼時。衆自知有所倚賴也。此意極深。即朕亦不自喻。豈可徧喻衆人乎。爾諸臣知朕精誠無私。深加體念。各勤職業。不妄生事。則朕易於圖治。而天下庶績亦咸理矣。所謂各勤職業者。即文臣盡忠不愛錢。武臣爲國不惜死之類。爾諸臣誠能如是。則朕懷自暢。朕體自安矣。若不敬慎所行。而欲朕懷寬慰。此非忠愛實心也。太子旣廢。帝鑒於前事。不再立太子。（按自張明德一案發覺後。帝疑故太子之狂惑。或有他故。乃窮治之。果得允禔令蒙古喇嘛呪咀太子用術。歷魅狀。帝乃監禁允禔。察允初人漸明白。次年三月復立之。然允初自復立後。乖戾如故。率不悛改。五十年十月仍廢。黜禁錮。自是不復言建儲事矣。）且見諸子中無一人居心行事如己者。亦無一爲帝深信之人。其後臨崩時之遺命。乃擇其較爲克肖者。

耳。帝在位六十一年。開拓疆土。振興文化。兢業之心。始終如一。其後嗣雖亦有有才。而德則遜帝遠矣。傳至乾隆以後。則更每代遞降。以至於亡焉。然觀康熙時諸王雖結黨相爭。而其人率有才學。能自樹立。不似末季諸王公庸懦貪鄙。屈服於太監權力之下也。

第三章 雍正朝

一千七百二十二年冬（即康熙六十一年）聖祖皇帝年六十八。正於南苑行獵。聖躬忽覺不適。卽時駕回暢春園。由是遂病。至冬至祭天。不能親往行禮。乃命雍王恭代。雍正正於齋所致齋。忽奉急召。歸至帝側。則病已彌留。有皇子七人及尙書隆科多在旁。帝見雍王歸。卽宣遺詔。命雍王嗣位。曰。皇四子人品貴重。深肖朕躬。必能克承大統。時帝諸子中以允禩之才爲最高。自太子廢後。恆覬覦其位。聞帝立雍王。不勝憤怒。佯爲悲痛之狀。卽時走出。帝言畢而崩。雍王循例爲帝穿長壽袍。親視含斂畢。乃回居乾清宮。行卽位禮。是爲世宗。年已四十有四矣。當康熙末年。諸皇子樹黨相爭之時。帝恆居中調和。勸之孝友。以是獲仁愛之名。而得聖祖之心。旣卽位。躬膺艱鉅。勤勞政事。日昃

不遑。所降諭旨。長者至數千萬言。發奸摘伏。激厲人心。洵不愧爲雄才大略之主。但性多猜疑。心忍手辣。其極長之諭旨。除勸戒臣民外。多言家庭之變。卽謂帝之精神。皆用於調和皇族紛爭之一端。亦未嘗不可也。至其勸戒臣民之語。則甚有趣味。且由此可知滿洲衰弱之源。雖其後高宗皇帝極力挽救。而不能不謂滿人之衰。自此始也。帝登基時。兄弟之中。除允祥外。其餘無不心懷反對者。觀帝首降之諭。卽可見大政治家之手段。帝以居喪哀感。不能詳理國事。特派大臣四人處理之。四人之中。有帝兄弟二人。一爲允祥。一卽允禩。其餘則一爲大學士馬齊。一爲帝舅尙書隆科多。允禩本帝所最恨。而亦派此重任者。蓋陽爲尊禮。而內以監視之。帝知諸兄弟之中。以允禩爲最有心計之人。若無彼居中指揮。則不能有所作爲也。允禩奉命派此任之時。衆往慶賀。允禩曰。予首領且不保。何賀爲。帝偵探廣布。此語亦傳入帝耳焉。時西北正有軍務。允禩總師於外。帝恐其挾兵爲變。乃乘機召之回都。允禩亦允禩之黨也。帝卽位後。亦如其暮年之父。屢下長諭。規勸臣民及其家人。此等性質。清代帝后皆然。唯慈禧太后獨異。不欲多費唇舌。蓋太后乃不肯尋煩惱之人也。今將雍正初年之長諭錄於下。諭曰。朋黨。

最爲惡習。明季各立門戶。互相陷害。此弊至今未息。惟我皇考允執厥中。至仁在宥。各予保全。不曾戮及一人。爾諸大臣內不無立黨營私者。卽宗室中亦或有之。爾等若以向蒙皇考寬大。幸免罪愆。仍蹈前轍。致干國法。昏昧極矣。豈但滿人卽漢人亦與一家骨肉無異。何苦波累及之。夫人之性情。各有所向。豈有與通國之人。無不投契之理。但辦理公事。不可存私。今諸大臣俱在朕前。朕居藩邸。曾與爾等議及私事。密相往來乎。皇考知朕中立不倚。是以命朕繼承大統。朕自思之。亦惟朕方能不戮一人。無一人不保全耳。朕非獨因皇考付託之重。實感皇考四十餘年教養深恩。委曲周至。言念宏慈。昊天罔極。此朋黨之習。爾諸大臣有則痛改前非。無則永以爲戒。爾等當思皇考數十年寬厚之恩。亦當共體朕委曲保全至意。若仍怙惡不悛。朕雖欲勉強仰體皇考聖衷。力爲寬宥。豈可得乎。夫朕言是。卽宜遵行。朕言非。卽宜陳奏。朕未嘗拒也。朕屢詔求言。雖小臣欲進言者。咸得上達。每多召入。屏去左右。令其面陳。爾諸大臣非不得陳奏之人。乃隱匿不奏。退有後言。某人不當用。某事不當行。誠小人之惡習也。夫朕所用之人。所行之事。如有不當。爾等身爲大臣。何難陳奏。所言果是。朕卽用之。如不奏而但肆譏。

議。設有人詰以不奏之故。能無愧於心耶。賢者朕之所好。爾等卽宜好之。不肖者朕之所惡。爾等卽宜惡之。乃或其人爲朕所信任。盡心竭力於國家之事。則反謂其專擅作威。如此人孰肯效其所爲。自取誹謗乎。其或唯諾成風。諸事不問。但思自便其身。爲己則得矣。於國何補。夫君親大義也。譬若父之讐。則與之相愛。父之愛。則與之爲讐。爲人子者。有是理乎。要之以君之好惡爲好惡。然後人人知改其惡。而遷於善。君臣一心。國之福也。傳之萬世。亦有令名。爾等其祇承朕諭。此等諭旨。並無所益。諸兄弟之陰謀。仍如前日。而天主教士亦因此損其名譽。蓋諸王之謀逆者。多與教士友善。其中且有已受洗禮者。雍正元年。外省上一封奏。言禁耶教事。下禮部議奏。及禮部覆奏。言外國教士應一律驅逐。國中教堂均應焚毀。於是各教士皆避往廣州澳門。而國中教堂三百餘所。均毀壞無遺。帝所以允此奏者。因當時耶穌教士頗牽涉諸王之事。且此事之發源。自康熙末年而已然矣。允禩之黨。以允禔允禩爲著。帝乃派允禩使蒙古。以孤其黨。但允禩至張家口。卽逗留不前。且請回京。帝乃行使一種狡滑之手段。以允禩不法之舉動。令允禩議其罪。允禩奏言。應革除允禩之王爵。並將家產充公。而將其監禁宗人。

府帝遂降諭如左。諭曰。允禩卑鄙性成。行止妄亂。文學武藝。蒙皇考訓諭數十年。終於一無所成。平生無一事。可以上慰皇考聖心。貽皇考一日之悅豫。抑且賦性陰險。既不自知其庸懦無能。又不肯安分守己。恣意倔強。覽廉親王所奏允禩惡蹟。似無虛語。數十年來。朕諸兄弟各人行誼。昭然在人耳目。朕之兄弟知之。舉國孰不知之。諸王大臣等務期各秉公忠。自出意見議奏。儻稍有迎合之念。又苟且照廉親王所奏議覆之處。豈獨墮壞爾等臣節。更有何顏瞻拜景陵。且廉親王所奏。或出至誠。或蓄他念。在朕猶自遲疑未信。此事惟賴諸王大臣公忠辦理。著速議具奏。諸王大臣尋議允禩奉使不肯前往。捏旨私自進口。不法已極。應革去郡王。撤回佐領。交宗人府永遠禁錮。得旨允禩之事。交與允禩者。特以觀其如何處置。向來允禩允禧允禛等俱聽允禩指示。即便遵行。故朕望允禩教誨伊等。使之改過。乃不但不行教誨。反激成伊等妄爲。朕所差遣之處。竟不前往。私回觀望。居住口外數月。又稱奉旨進口。如此不法。任意妄行。惟欲朕將伊等治罪。以受不美之名。豈知此等無禮無義乖戾犯法之弟。治之以罪。適足以昭朕無私之善政。何礙之有。朕今施以恩澤而不知感。喻以法令而不知懼。朕自當明罰。

敕法雖係兄弟。亦難姑息。諸王大臣理應將允禩素行。與今所作之罪。明白指陳。或照允禩所議治罪。或加等減等治罪之處。請旨定奪。朕自降諭旨。其後遂定允禩以革去郡王。交宗人府永遠禁錮之罪。同時宗人府參奏貝子允禔差往西寧居住。擅自遣人往河州買草。踏看牧地。抗違軍法。肆行邊地。請將允禔革去貝子。所有屬下佐領。撤出爲旗下公中佐領。得旨允禔革去貝子。撤出佐領之處。俱著寬免。帝又作一書戒廷臣之植黨。中有言曰。朕在藩邸。甚惡此風。斷不爲其所染。廉親王至今與朕結怨。亦卽此故。今廉親王之意。不過欲觸朕之怒。多行殺戮。使衆心離散。希圖擾亂國家耳。如此天豈肯如其願乎。古人云。亂臣賊子。人人得而誅之。皇考每引述此語。特指廉親王言之。云云。此乃雍正二年五月之事也。至十一月。又下諭曰。廉親王存心狡詐。結黨營私。自朕卽位以來。凡遇政事。百端阻撓。卽如清查工部清片一案。廉親王以重爲輕。以輕爲重。顛倒錯亂。其從前所犯應議之案。交宗人府議處者。不止數十事。朕俱曲爲寬宥。但切加訓誡。冀其改過自新。並未降一階。罰一俸。乃在廷諸臣。向爲廉親王所愚。反以朕爲過於苛刻。爲伊抱屈。此朕審查衆人神色而知之。一年以來。大小臣工。因廉親王貽

累者。乃甘受罪戾。毫無悔心。而廉親王亦恬然自安。竟不知愧。並不念及國法。稍加儆懼。由此觀之。黨援終不能解散也。黨援必由衆人附和而成。若廉親王一人。何所恃而如此行爲乎。工部郎中岳周拖欠錢糧。廉親王私幫數千金。代伊完納。其意以爲他人凡事苛刻。而我獨優容加恩。不但邀結岳周一人。並令所管之人無不感戴。如此沽名邀譽。竟不知其何意。岳周並非無力完項之人。昨伊將現銀二萬兩請託大將軍年羹堯薦伊爲布政使。年羹堯據實參奏。朕用人皆出至公。此等小人。不止徼倖妄進。並欲使朕之聲名有玷耳。廉親王至今尙無改悔之心。諸臣復不省悟。積習若此。何所底止。朕用是諄諄誠諭。黨諸臣洗心滌慮。盡改前非。則廉親王黨散勢孤。朕得以不傷骨肉手足之情。兼可無負聖祖仁皇帝保全之恩。其令天下臣民咸知朕意。允禩之爲人。極有心計。嘗欲博取名譽。而加惡名於帝。當其管理藩部時。擅命蒙古王公除歲首朝賀之外。不得入都。亦不賞路費。管工部時。未得帝允。擅免諸稅。皆欲以美名歸己。惡名歸帝也。廢太子本監禁於煤山。至是病危。帝命御醫往視之。覆奏言難望痊愈。帝聞之。頗爲惻然。欲親臨視疾。又以廢太子爲帝之兄。若親往必行君臣之禮。心甚不安。故未

往而使人諭之。廢太子聞之。甚爲感激。至其死後。帝親往祭奠。又賜以理親王之爵。大喪二十七月既滿。帝乃下諭。除去議政四大臣之名。賞允祥之功。而對於允禩。則降諭如下。廉親王自委任以來。諸事推諉。無一實心出力之處。無一有裨政治之言。且懷挾私心。遇事簸弄。希冀搖動衆志。攪擾朕之心思。阻撓朕之政事。卽如管理工部之事。值皇考梓宮奉移山陵。需用夫役。向例皆用二萬餘名。伊密奏費用錢糧太多。今減省一年。便可足用。朕不知舊例准行。若非大學士奏阻。幾爲其所誤。又命管理理藩院事。謂外藩到京。糜費口糧。將科爾沁台吉等於邊外攔阻逐回。令不得拜謁皇考梓宮。蒙古等涕泣而歸。怨聲載道。若非拉錫奏聞。隨卽開示。蒙古等幾致寒心。又如管理上駟院事。奏稱馬圈畜馬太多。請行裁減大半。以省錢糧。其意非欲以彰揚皇考糜費之名。卽欲使馬匹不足。將來設有緩急。無所取資也。至如以破紙書寫奏章。祭所更衣幄次。油氣薰蒸。刻不可近。又用破損棹案。安奉祝版。種種不敬之事。舉國所知。其他顛倒是非。草率怠忽。悖慢無禮之處。不可枚舉。朕皆容忍寬免。允禩非材力不及。智慮不到之人。而存心行事若此。誠不知其何意。且朕之於允禩。崇重信任。伊不當如此待朕也。其應

否議敍之處。著秉公會議具奏。尋議廉親王允禩挾私懷詐。阻撓政事。山陵典禮至重。竟將定例夫役。詎奏裁減。外藩叩謁甚衆。竟於邊口攔阻。幾使蒙古等寒心。他如請減院馬。破損奏章。供奉祝版不虔。豫備油幄草率。盛京陵寢需用紅土。違例發價。就彼採買。不忠不敬。應行議處之案。實難枚舉。有罪無功。不應議敍。從之。其次則及允禔。一日召諸王滿漢文武大臣等入諭曰。朕因貝子允禔行事悖謬。在西寧地方縱容家下人生事妄爲。特發諭旨。著都統楚宗往彼約束。今據楚宗摺奏。臣至西大通。允禔並不出迎請安。良久始令臣進見。允禔氣概強盛。形色如前。並無憂懼之容。臣令出院跪聆諭旨。允禔並未叩頭。卽起立向臣云。諭旨皆是。我有何說。我已欲出家離世。有何亂行之處。其屬下人等。亦毫無畏敬之色等語。朕遣楚宗到彼傳旨。約束其屬下之人。原恐其生事騷擾。且冀其改悔前愆。遵守法度。曲爲保全。乃允禔肆行傲慢。全無人臣事君之禮。且稱出家離世等語。其意以爲出家則無兄弟之誼。離世則無君臣之分也。荒誕不經如此。朕兄弟中如允禔允禩允禩允禩等。皇考時結黨妄行。以致皇考聖心憂憤。日夜不寧。皇考賓天時。允禩從西寧來京。並不奏請太后安。亦不請朕安。反先行文禮部。

問其到京如何行禮儀。注及在壽皇殿叩謁梓宮後。見朕遠跪不前。毫無哀戚親近之意。朕向前就之。仍不爲動。彼時拉錫在旁。掖之使前。伊出遽將拉錫詈罵。復忿然至朕前云。我本恭敬盡禮。拉錫將我扯拽。我是皇上親弟。拉錫乃擄獲下賤。若我不是處。求皇上將我處分。若我無不是處。求皇上即將拉錫正法。以正國體等語。朕亦不意其咆哮無禮至此也。及梓宮奉移山陵時。朕因允禩倨傲不恭。且與拉錫佛倫爭鬧。降旨訓誡。而允禩忽從帳房中出。勸令允禩即跪。是事事聽從允禩之言。爲其指使。此其明驗也。又允禩妻病故。朕厚加恩卹。乃伊奏摺中有我今已到盡頭之處。一身是病。在世不久等語。朕思允禩代朕躬奉祀景陵。任至重也。又以貝子加封王爵。有何屈抑。而出此怨望之語乎。又允禩身爲大將軍。不應支用之錢糧。濫支數萬。以市恩邀譽。而不知有違定制。例應賠補。此皆國帑所關。何得任意侵取乎。至若允禩奉旨送澤卜尊丹巴胡士克圖至張家口外。乃託病不行。又私與允禱暗相往來。餽送馬匹。允禱回書。有事機已失。悔之無及之語。悖亂已極。允禩又私行禳禱。將雍正新君字樣。連寫入疏文之內。甚屬不敬。蓋由允禩等私結黨援。牢不可破。朕若一經訊詰。則國法難容。朕居心寬大。

不忍有此。務欲保全骨肉。不事深求。仰體皇考之心爲心也。觀當時情勢。似允禩得諸兄弟之助。確有逆謀。然帝亦不欲處以嚴刑。恐有酷待兄弟之名也。且南方允禩之黨頗衆。若加窮治。恐其不安也。未幾允禩對於宗廟及聖祖神位。復有不敬之舉。帝又降諭言其心懷逆謀。故舉動悖亂。又謂天時不和。乃諸兄弟懷藏陰謀所致。時大將軍年羹堯頗有跋扈之迹。帝察覺其爲允禩之黨。極其震怒。有人劾奏言年羹堯蔑視朝廷。擅作威福。凌虐土司。濫殺無辜。諸款。帝將其降調杭州將軍。然人皆知必有後命。決非卽此而止也。蓋年兵權太重。故帝不肯操之過急。欲以漸去之。時工部又有製造軍械粗劣之事。與允禩有關。帝降諭曰。朕向見工部所製器械。類多粗率。是以卽位之後。特降諭旨。此後細小工作。該部卽行置辦。若工作稍大。及緊要物件。俱先行奏明。造成之後。奏請差人驗看。前因製造兵丁帳房錯誤。朕曾降諭旨。令製辦阿爾泰兵丁軍器。關係緊要。朕意其必盡心辦理。昨製成奏請驗看。朕著夸岱來保查閱。據二人回奏。刀刃無鋼。蓋有裂縫。甲係市買粗鐵所造。朕詢問廉親王。伊卽具摺認罪。情願賠補。夫軍器所關至重。朕旣屢降諭旨。伊又奏請驗看。而所製之物。並不堅利。若此。其居心尙可問。

乎。朕與廉親王允禩分屬君臣。誼屬兄弟。今觀允禩之於朕。則情如水火。勢如敵國。朕嗣登大位。念皇考付託之重。凡用人行政。朝乾夕惕。務求至當。而廉親王允禩處心積慮。必欲自居於是。而以不是歸於朕。朕自返無愧。何必與之較論。但朕之是非。有關皇考之得失。不得不諄諄辯白也。廉親王允禩若肯實心任事。部務皆所優爲。論其才具操守。諸大臣無出其右者。而其心術之險詐。諸大臣亦無與之比者。此惟皇考暨朕躬深悉之。向因允禩乳母之夫雅齊布獲罪正法一案。皇考硃批諭朕衆兄弟。有朕與允禩父子之義已絕之旨。允禩曾向朕再三哀懇。云若將此旨宣示。則允禩實不可以爲人矣。朕彼時因將此旨封固。交內閣收貯。是朕之所以矜全允禩者如是。允禩全不知感恩悔過。專務沽取名譽。邀結黨與。希圖敗壞政事。實爲國法所不宥云云。年羹堯得諭旨不行。帝復下諭大學士等曰。頃將年羹堯解退大將軍總督職任。補授杭州將軍。陝西通省滿漢兵民羣稱復見天日。靡不歡忻相慶。乃聞年羹堯繫戀總督職任。又設法揚言將行李發往。巧圖仍留原任。自負爲良臣。欲加朕以遺棄功臣之名。眩惑營求。被處兵民等。年羹堯旣負朕恩。致犯衆惡。若此尙復繫戀營求。誠爲不識羞恥者。間有

恐人或貪圖年羹堯財物。或仍畏年羹堯威勢。代爲具呈。朕必照逆黨例。從重治罪。斷不寬宥。年羹堯應交岳鍾琪事件。著作速交代。急赴杭州任所。將此行文岳鍾琪及該撫等。令其知悉。國舅隆科多亦與此案有關。帝下一諭。中有言曰。朕御極之初。將隆科多年羹堯寄以心膂。毫無猜防。所以作其公忠。期其報效。孰知朕視爲一體。伊等竟懷貳心。朕予以寵榮。伊等乃倖爲要結。招權納賄。擅作威福。敢於欺罔。忍於背負。幾至陷朕於不明。朕深恨辨之不早。寵之太過。愧悔交集。竟無辭以謝天下。惟有自咎而已。朕今於隆科多年羹堯。但解其權柄。不加刑誅者。正以彼等之妄謬。皆由朕之信任太過。是以惟有自責。而於伊等一概從寬也。云云。中國官吏。最善於趨勢。年勢既衰。吏部等衙門。遂遵旨疏參。其奏言年羹堯受皇上莫大之恩。乃狂妄悖逆。至於此極。種種不法。罪大彌天。今調任杭州將軍。又奏稱江南儀徵縣地方。水陸分途。臣至此靜候綸音等語。更不知其何心。人臣如年羹堯。背義負恩。越分藐法。爲天地所必誅。臣民所共憤。請將年羹堯革職。及所有太保並世職一併革去。從前恩賞團龍補服黃帶雙眼孔雀翎紫扯手等物。悉行追繳。敕下法司。將年羹堯鎖拏來京。嚴審正法。以爲人臣負恩不忠。

者戒。得旨年羹堯在任。種種僭妄。曾經降旨詢問。今據年羹堯奏稱。伊爲大將軍所行之事。俱循照俗例而行等語。昔年用兵。有諸王掌大將軍印者。有大臣掌大將軍印者。惟允禩妄自尊大。種種不法。我朝大將軍如此行事者。從未之聞也。年羹堯不但踵而行之。且殺戮過焉。今乃云循照俗例。夫允禩所行。悉僭妄非制。豈可云例。假若云例。則係國家大將軍之定制。豈可云俗。此語狂妄已極。在年羹堯職分。卽當年諸王掌大將軍印所行之例。伊尙不應比擬。而乃效法允禩狂妄不法之舉乎。又據年羹堯奏稱。既不敢久居陝省。亦不敢遽赴浙江。今於儀徵縣水陸交通之地。靜候綸音等語。朕前降諭旨。令速赴杭州新任。今逗遛中途。曠廢職守。遷延觀望。不知何心。其回奏摺內。凡枝梧掩飾及未經回奏之處。俱著年羹堯一分晰明白回奏。至九卿等所議革去一切職銜。追回恩賜等物。鎖拏來京。嚴審正法之處。俟年羹堯回奏到日。再行請旨。年之黨與。亦皆除之。帝雖欲重辦年羹堯。又恐國中有烏盡弓藏之譏。乃命各省督撫公議其罪。帝之意。本以允禩爲罪魁。但不欲遽辦之。而先剪滅其黨。當時又於帝之嫡堂兄弟二人。一因犯大不敬之罪。一因其爲允禩之黨。皆被革除。時允禔府中護衛烏雅圖等

在平定州地方擅行毆打生員。帝降諭甚長。今擇錄於下云。至於允禩。自來結納黨援。不守本分。且品行庸劣。居心妄自尊大。聖祖皇考稍加訓誡。輒云不過革去此微末貝子已耳。偶遇勞瘁。動稱若如大阿哥二阿哥一例拘禁。我倒安逸。此等狂悖之談。時出諸口。朕與諸阿哥所共知者。及遭皇考大事。並未見有點滴悲淚。朕御極後。允禩昂然恣肆。抗違諭旨。狂悖之行。種種不一。朕因發往西寧居住。稍示儆誡。伊又寄書允禩。語多悖亂。且從容屬下。騷擾地方。毆打民人。罔顧國紀。朕特遣都統楚宗前往約束。及楚宗到彼宣旨。伊並未迎接跪聽。安居臥室。毫無悔懼之容。信口妄言。有出家離世等狂悖之語。且伊攜帶數萬金。前往西寧。濫行糜費。買結人心。地方人等。俱稱九王爺。伊不過一貝子耳。尙未得貝勒職分。又安得謾稱王。詢屬不識。臣子大義。悖亂之極。允禩著革去貝子。撤其佐領屬下。並行文陝西督撫。嗣後仍有擅稱允禩爲九王爺者。從重治罪。國舅隆科多亦以次得罪。凡所賞黃帶紫扯手雙眼翎四圍龍補服。俱不許用。削去太保職銜。從寬免革職。允禩見帝雖屢降嚴諭。而仍未重辦之。謂帝有所忌而不敢。故毫無悔改之意。復奏稱旗下披甲人。每一佐領止二十四名。內府佐領亦應照此辦理。

及帝命與莊親王及常明來保同議。乃允禩議將內府佐領下增甲九十餘付。帝遂下諭責其前後矛盾。可見其邀結人心。沾取名譽。而加朝廷以不美之名。今擇錄之。云。朕念內府佐領披甲之人。多係殷富官員之家人。卽如來保常明家人。披甲者甚多。且內管領人等。卽幼穉亦存錢糧。其披甲錢糧。乃分外多得之項。將此裁去。未嘗不可。因酌量定額。每佐領准其留甲五十副。裁其家下披甲內之多者。且目前亦不卽行裁減。俟其缺出。扣除不補。乃來保常明自願其私。將不甚緊急事件。連夜通傳守夜步軍。不能禁止。以致內府佐領無賴之人。齊集廉親王府門。妄行嚷鬧。彼時廉親王來奏此事。適本日朕將廉親王之舅家撥給廉親王。朕意其必因撥給之事來奏。未曾召入。諭令於諸王大臣奏事之日同奏。而廉親王並未聲明。內府佐領人等嚷鬧情由。卽行退去。次日莊親王內務府大臣奏稱。內府佐領下人等至廉親王處嚷鬧。朕降旨云。親王之邸。何得擅入嚷鬧。且母妃在內。豈可驚擾。爾等速行逐散。如不散。卽行鎖拏。若不能鎖拏。卽將莊親王革去王爵。來保常明正法。云云。又曰。近日廉親王乘醉將伊門下之護軍。酷打致斃。隱匿不行奏聞。恐死者之家申訴。遣太監等屬令寢息。今日朕當諸臣之前。

面問廉親王初猶枝梧。反覆窮詰。始俯首無詞。廉親王外市慈厚之虛名。而內忍行慘酷斃人之實事。雖工於矯飾。而欲蓋彌彰。著交領侍衛內大臣與宗人府會審具奏。於是宗人府遵旨。請將允禩革退。和碩親王撤出屬下佐領。得旨俱從寬免。此時年羹堯已拿交刑部矣。刑部審問之後。上奏年羹堯反逆不道。欺罔貪殘。罪迹昭彰。彈章交至。案牘等邱山之積。罪惡踰谿壑之深。其大逆之罪五。其欺罔之罪九。其僭越之罪十六。其狂悖之罪十三。其專擅之罪六。其貪黷之罪十八。其侵蝕之罪十五。其忌刻之罪六。其殘忍之罪四。有一於此。法所不宥。而年羹堯所犯至九十二大罪。內外文武諸臣。合心齊聲。恥同覆載。伏請皇上將年羹堯立正典刑。以申國法。其父及兄弟子孫伯叔父兄弟之子年十六歲以上者。俱按律斬。十五歲以下及母女妻妾姊妹及子之妻妾。給付功臣之家爲奴。正犯財產入官。仍將臣等審訊年羹堯惡蹟。昭示中外。以爲天下萬世人臣反逆不道。欺罔貪殘者戒。帝批諭曰。年羹堯不臣之心顯然。但因喪心病狂。昏憤顛倒之所致。鄒魯乃無知小人。相與謀逆之情雖實。而事蹟尙未昭著。朕念年羹堯青海之功。不忍卽加極刑。著交步軍統領阿齊圖合其自裁。年羹堯剛愎殘忍之性。朕

所夙知其父兄之教。不但素不聽從。而向來視其父兄。有如草芥。年遐齡年。希堯皆屬忠厚安分之人。著革職寬免其罪。一應賞賚御筆衣服等物。俱著收回。年羹堯之子甚多。惟年富居心行事。與年羹堯相類。著立斬。其餘十五歲以上之子。著發遣廣西雲南極邊烟瘴之地充軍。年羹堯之妻。係宗室之女。著遣還母家。年羹堯及其子所有家貲。俱抄沒入官。其現銀百十萬兩。著發往西安。交與岳鍾琪圖理琛。以補年羹堯川陝各項侵欺案件。其父兄族人皆免其抄沒。年羹堯族中有見任候補文武官者。俱著革職。年羹堯嫡親子孫將來長至十五歲者。皆陸續照例發遣。永不赦回。亦不許爲官。有匿養年羹堯之子孫者。以黨附叛逆例治罪。著內閣明白記載。鄒魯著改爲立斬。其親弟兄子姪。著僉發黑龍江。給與披甲之人爲奴。其餘皆從寬免。帝既將允禩之黨漸次除盡。乃開始辦理夙欲甘心之一人。然好名之念。又恐爲天下後世所非議。故於未辦之先。爲極仁慈慎重之態。以結人心。使人覺其後之嚴辦。皆出於不得已。此帝之苦衷也。

第四章 續前

宗室王公上一奏。請帝嚴辦允禔之罪。帝又用其慣使之舊法。卽一箭雙雕之術。令允

允禩二人公議其罪。二人所議自然失之於輕。帝乃又以是爲二人之罪。廷臣知二人終不能免。上奏請速正典刑。帝在西苑當允禩之面。下一諭曰。爾諸王大臣等合詞參奏允禩。請卽正典刑。允禩乃皇考之子。太祖太宗之孫。朕之弟也。今日之舉。列祖皇考在天之靈。實昭察於上。儻允禩不應正法。而爾等妄行陳奏。以殘害列祖皇考之子孫。而陷朕於不義。爾等之罪。尙可逭乎。朕思爾等公同具奏時。或有隨衆列名。而不出於中心之誠者。故特召入。面加詢問。若有以允禩爲不當正法者。可出班另跪於右。朕今日如此詢問。儻衆人中猶有心口相違。不肯據實陳奏者。列祖皇考在天之靈。必加誅殛。諭畢。諸王大臣等回奏。允禩悖倫亂政。罪狀多端。按之國法。應正典刑。諸臣實無異辭。上曰。諸王大臣引據大義。欲正國法。所奏亦是。但朕曾降諭旨。斷不治允禩之罪。卽今令允禩離宗。亦因伊將確實之事於諸臣前。指天發誓。詛咒一家不獲善終。難以存留宗室之中。此萬不得已所致耳。朕本意斷不將允禩治罪。此所奏知道了。允禩之妻。朕再詳酌。另降諭旨。時宗室中有一貝子。名魯賓者。亦允禩之黨。在西寧時諂媚允禩。允禩曾遣其寄書與允禩。且謂帝非覺羅氏之子孫。帝甚怒於衆人前詢問時。魯賓

仍直言感允禩之恩。帝卽下諭。處以監禁之罪。又命削允禩王爵。在宗人府看守。尋命
圈禁高牆。著總管太監派老成太監二名。在內隨侍。且改允禩之名爲阿其那。（據東
華錄所載阿其那乃令允禩自改者。）改允禱之名爲塞思黑。此則近於兒戲。不似大
皇帝所爲也。對於允禩。則卽辦之。今將此諭擇錄於後。上畧。前令允禩在馬蘭峪居住。
原欲其瞻仰景陵。感發天良。痛改前非。洗心滌慮。而允禩並不醒悟。改蔽錮日深。奸
民蘊懷。聖又構造大逆之言。冀行蠱惑。則馬蘭峪亦不可令其久住。著滿都護常明來
文馳驛前往。將允禩撤回。朕思壽皇殿乃供奉皇妣聖容之處。將允禩於附近禁
錮。令其追思教育之恩。寬以歲月。待其改悔。伊子白起甚屬不堪。著與允禩一處禁錮。
其子白敦尙好。可封爲鎮國公。令在伊家居住。又諭大學士等曰。從前阿其那允禱允
禩等。結黨營私。每好造言生事。凡僧道喇嘛醫卜星相。甚至優人賤隸。以及西洋人大
臣官員之家奴。俱留心施恩。相與往來。以備其用。若欲排陷何人。卽捏造無影響之言。
使此等人傳播。以簧惑無識見之輩。聖祖仁皇帝深知此輩奸惡。時時留心。至朕卽位
以後。卽有傳言云。朕日日飲酒。又云朕頻與隆科多飲。至更深。隆科多沈醉不勝。令人

擡出。卽蔡誕自四川到京。越數月。見朕毫不飲酒。曾駭歎奏朕云。臣在四川。聞人流言。皇上日日飲酒。今臣到京已久。朝夕侍從。始知皇上涓滴不飲。昨路振揚來京。陛見。臨行時。亦奏臣聞流言。謂皇上卽位後。常好飲酒。今臣朝暮入對。惟見皇上辦事不輟。毫無酒氣。如此陳奏者甚多。此無他故。皆因阿其那允禔素日沈湎於酒。朕頻頻降旨詰誠。而伊等遂播此流言。反加朕以好酒之名。傳之天下。夫朕若於政事不誤。卽使飲酒。亦復何傷。然朕實天性素不能飲。內外之所共知。以天性素不能飲者。尙僞造此言。則此輩之流言。何可限量也。今又見報房小鈔內云。初五日王大臣等赴圓明園叩節。畢。皇上出宮。登龍舟。命王大臣登舟。共數十隻。俱作樂。上賜蒲酒。由東海至西海。駕於申時回宮等語。夫人君玉食萬方。偶於令節。宴集羣臣。卽御龍舟奏樂賜飲。亦蓼蕭湛露之意。在古之聖帝明王。亦所不廢。何不可者。但朕於初四日卽降旨。令在城諸臣不必赴圓明園叩節。初五日。僅召在圓明園居住之王大臣等十餘人。至勤政殿側之四宜堂。賜饌。食角黍。逾時而散。並未登舟作樂遊宴也。且先期內務府總管奏請。今歲照例修備龍舟。朕實止之。此非有意屏卻讌遊。蓋厭其喧雜耳。而報房竟捏造小鈔。刊刻散

播以無爲有。甚有關係。著兵刑二部詳悉審訊。務究根源。以戒將來。以懲奸黨云云。至此時可以勿用仁慈矣。乃降一極長之諭旨。以爲嚴辦其兄弟之先聲。諭曰。歷年以來。朕之數弟。昏昧無知。不安本分。其奸僞逆亂之行。爾衆大臣從前雖畧曉一二。何能盡知。爾等且不能盡知。外間小人。又何由知之。伊等爲人。存心行事。朕因三四十年。共在一處。知之甚悉。伊等僭妄之心。悖逆之行。及其黨與於國家大有關係。阿其那等歷年傷皇考之心。不孝不忠。結爲黨援。擾亂國家。其罪倍甚於二阿哥。從前阿其那塞思黑允禔允祿等。共爲黨與。包藏禍心。將不守本分。詭隨之人。百計千方。引誘交結。又將生事。兇亂喇嘛僧道醫卜棍徒優人之屬。種種貪利小人。留心收攬。重利賄買。各致死命。且在各處稱揚伊等美名。串通內外奸僞之人。希圖大位。有不入其黨者。卽妄加危言。以恐嚇之。故不爲其所籠絡。不爲其所欺蒙者。蓋少。國家被其擾亂。人心受其蠱惑。外則與阿靈阿鄂倫岱蘇努七十赫壽等亂臣結黨往來。內則與皇考御前侍衛拜唐阿太監等鑽營交結。探聽一切喜怒信息。若非我皇考神明聖智。心如金石。未有不爲伊等詭祕之計所動搖者。伊等奸僞之計。皆我皇考所洞悉。乃窮困懷羞。兇心益逞。當皇

考高年。反種種激怒。無所不至。聖躬憔悴成疾。皆阿其那等不忠不孝。奸僞結黨。種種可誅之所致也。（以下歷述阿其那塞思黑允禔允祿之罪狀。今畧去）阿其那等心懷奸惡。擾亂國政。煽惑人心。邀買美名。結交匪類。徧處稱揚伊善。不過欺人而已。豈能欺上天皇考乎。阿其那等承歡皇考者何處。效力者何處。有裨國家者何處。利濟軍民者何處。施恩臣工者何處。有益兄弟者何處。且當皇考聖明在御之時。阿其那爲皇子。何得交結外人。不曾與政事。有何善足稱。遂致人目之爲佛者。何故耶。此皆伊等所結朋黨作亂之徒。招搖惑衆。小人愚昧。入其機變。不審始末虛實之所致。甚顯然也。伊等如果有善可據。朕此數言。又安能掩沒伊等之善行乎。但衆多愚昧。伊等存心行事已久。衆人被其欺惑者深。朕若不如此明白降旨分晰。伊等奸僞之術。兇惡之性。不孝不忠之行。衆皆難以知曉。今衆人但將伊等果如何好。如何似佛之處。稍爲揣度。則若夢之醒。咸自曉然也。且當皇考之時。朕若欲似伊等結黨。不能得人耶。若欲似伊等邀名。不能致譽耶。若欲效伊等之所行。豈不能爲之人耶。止因上天昭鑒可畏。皇考恩德甚重。朕心不忍妄負。是以但寧靜守分。敬謹孝順於皇考之前。朕自幼時。諸兄等俱恭敬。

朕躬。朕於兄弟中。亦並無私嫌。而朕亦從無希冀大位之念。此皇考所深鑒。衆人所深知也。昔朕之兄弟中。往往有得罪皇考者。朕身爲之解釋調停。以寬解皇考之怒。凡此不可枚舉。見今諸王與皇考親近侍衛俱悉知之。朕非邀名。亦非爲伊等。乃實爲君父年高。仰體聖躬之故。是以堅持心志而行之耳。莅位以來。惟因國家利害所關。但欲伊等改其兇悖之性。以及於善耳。設使朕先便有希冀此位之念。今已登此位矣。又於伊等何讎乎。朕從前若有被兄弟陵辱。或置朕於惡地。或於朕有虧傷處。如此等私怨。儻有一事。儻有一人。亦必不能掩衆人之耳目。皇考在時。朕賴皇考之恩。平安尊榮。已四十五年。與此等不肖弟輩。豈但並無讎隙。卽些微一言之不合。亦未有也。(中畧)朕以聖賢大公至正之道治天下。焉有因此等悖逆之言。遂爾畏懼寬假之理乎。謂阿其那爲佛者。豈以其不孝不忠如鬼如蜮之行乎。不然。伊又有何等忠孝仁慈之美行耶。似此兇暴惡詐奸險之佛。誠自古所未聞者。(中略)我朝自太祖太宗肇造區宇。至我皇考百有餘年。滿洲等世沐恩膏。朕承皇考之命。嗣此鴻基。天惟一日。國止一君。八旗人等亦惟感戴大君。一心事朕而已。似此不忠不孝之輩。擾亂國家。妄行不法。亂臣賊子

之居心行事。八旗之人。聆朕曉諭之旨。當必駭然深燭其行事之悖亂。當切齒而共恨之者。中略。從前諸王大臣。請將阿其那塞思黑允禔。卽行正法。斷不可留。所奏甚爲當理。此輩包藏異心。撓亂國政。乃獲罪於宗廟社稷。與我皇考之人。理應正法。但伊等歷年結成黨與。妄造語言。蠱惑人心。久矣。阿其那等種種奸詐惡逆之事。中外及八旗軍民人等。尙未得徧知。此事乃關繫皇考及朕躬之事。今故將此輩奸惡不忠不孝大罪。備悉言明。使中外之人。昭然盡曉。卽將此輩正法。亦屬當然。日後亦不得議朕。卽姑留之。不過少延其性命耳。亦無所關礙。汝等謹記此旨。錄出奏覽後。傳與京城內外八旗軍民人等一體知之。於是諸王公貝勒貝子滿漢文武大臣等。同議奏阿其那罪狀四十款。塞思黑罪狀二十八款。允禔罪狀十四款。其末則引聖祖皇帝之言。謂亂臣賊子。人人得而誅之。請帝將阿其那塞思黑允禔等。卽正典刑。以爲萬世臣子之炯戒云云。此奏甚長。今只引阿其那罪狀二條。以見一斑。阿其那母妃喪時。凡事踰禮。沽取孝名。已及百日。尙令人扶掖而行。而受塞思黑允禔允祿等。每日輪班送飯。豕羊狼藉。筵席喧囂。脫孝後。面貌愈加豐碩。聖祖仁皇帝降旨切責云。虛僞不孝。實屬譎詭。衆所共

知者一也。阿其那之妻不守婦道。聖祖仁皇帝諭旨甚明。皇上降旨遣回母家。伊女婢白哥勸伊於皇上前謝罪奏懇。乃憤然曰。我丈夫也。豈因妻室之故而求人乎。白哥見伊日在醉鄉。屢次勸諫不從。遂憤恨自縊而死。逆理昏亂。衆所共知者一也。帝之批諭亦甚長。今略述於下。朕昆弟之中。有此等大奸大惡之徒。而朕於家庭之間。實有萬難萬苦之處。不可以德化。不可以威服。不可以誠感。不可以理喻。朕展轉反復。無可如何。含淚呼天。我皇考及列祖在天之靈。定垂昭鑒云云。諭末則曰。諸王大臣等臚列阿其那塞思黑允禔各款。合詞糾參。請正典刑。以彰國法。參劾之條。事事皆係實蹟。而奏章中所不能盡者。尚有多端。難以悉數。今諸王大臣以邪黨不剪。奸宄不除。恐爲宗社之憂。數次力引大義滅親之請者。固爲得理。但朕受皇考託付之重。而手足之內。遭遇此等逆亂頑邪。百計保全而不得。實痛於衷。不忍於情。然使姑息養奸。優柔貽患。存大不公之私心。懷小不忍之淺見。而不籌及於國家宗社之長計。則朕又爲列祖皇考之大罪臣矣。允禔允禩允禪雖屬狂悖乖張。尚非首惡。已皆拘禁。冀伊等感發天良。悔改過惡。至阿其那塞思黑治罪之處。朕不能卽斷。俟再加詳細熟思。頒發諭旨。可將諸王大

臣等所奏及朕此旨頒示中外。使咸知朕萬難之苦衷。天下臣工自必諒朕爲宗社久安長治之計。實有不得已之處也。帝知若將諸兄弟明正典刑。必貽天下後世之譏。故不明辦之。前諭降後二月。直隸總督李紱奏言。塞思黑患痢死。或謂實李授意密斃之也。帝閱之。下一諭。今擇錄如左。數十年前。有一山西無賴生事之窮民。流落在京。塞思黑欲收爲心腹。令伊太監幫助銀十兩。其人感激思恩。及塞思黑居住西寧。其人公然到伊寓所。投遞書帖。稱願輔有道之主。不附無道之君。欲糾合陝兵民以救恩主等語。乃塞思黑聞此大逆無道之語。不但不行出首。且向其人云。我兄弟無爭天下之理。並屬勿令楚宗知之。惟恐其人受累。似此狂悖妄亂。包藏禍心。日益加甚。其罪難以悉數。又如伊在西寧時。將伊所用太監。撤回京師。每人賞與金條及西洋金表等物。皆貴重難得之物。是伊獲罪之後。尙私買人心。自無國法。肆行無忌。諸王大臣等屢次奏請。卽行正法。以彰國憲。朕心尙在遲回。不忍卽定。因其不便再留西寧。故令回京治罪。伊一路毫無改悔戒謹之心。談笑如常。因復令暫禁保定。以觀其行止。前李紱奏稱伊患腹瀉之疾。比卽降旨。令李紱揀選名醫調治。不料伊惡貫滿盈。獲罪天祖。已伏冥誅。可見

善惡之報。捷如影響。似此不忠不孝。大奸大惡之人。雖未受國法。亦不能逃天譴也。著李紱爲伊料理棺衾殯殮之事。俟其妻子家口從西寧搬到之日。再行奏聞請旨。（中略）胡什禮楚宗。從前不待朕之諭旨。私將塞思黑鎖拏。後又故意將鎖寬鬆。任其脫卸。曾經李紱奏聞。彼時朕卽欲將胡什禮楚宗拏問。治其任意之罪。又恐衆人不知。或因此謂朕欲寬待塞思黑。或因此謂朕欲加嚴於塞思黑。又致妄存意見。是以暫行停止。未曾究問。今塞思黑既伏冥誅。則從前胡什禮楚宗等擅將塞思黑上鎖。後又私自寬釋。明係有意欺罔。罪不可逭。著將胡什禮鎖拏。交副都統御史常泰帶往保定。並將楚宗鎖拏。一同明白嚴審具奏。允禱既死。帝復運其巧妙之思。以欺天下後世之人。乃下諭諸王大臣。並各省將軍。督撫提鎮等。言謀逆二人。其一已死。餘一人可否赦之。而同時又將陝甘總督楚宗拿問。今亦將此諭擇錄如下。楚宗奏稱塞思黑邀買人心。大有關繫。斷不宜處之極邊。應拏送京城禁錮等語。似此明係見民人令狐士義之投書。流言。因而具奏。恐嚇聖躬。楚宗係專守塞思黑之人。將令狐士義之投書。流言。並塞思黑與西洋人穆經遠從窗牖出入。時常計議。如許事件。妄亂行爲之處。盡爲隱匿。不行

奏聞。及朕明降諭旨。伊知塞思黑罪惡深重。斷不能逃於法網。乃欲自蓋前愆。將塞思黑從西大通解來保定時。並未奉朕諭旨。擅將塞思黑鎖拏。以見毫不徇情之意。且既稱鎖拏。自應實在加以鎖拏。又復虛應故事。可以脫卸。是屬何心等語。一月之後。允禩亦患病死。與塞思黑同也。諸王文武大臣等合詞議奏。阿其那塞思黑逆天大罪。應戮屍示衆。同黨之允禩允禊。並應正法。帝召入諭曰。諸王大臣等所奏。乃執法定罪至公之論。但阿其那塞思黑既伏冥誅。其戮屍之罪。著從寬免。允禩乃狂妄無知之人。爲阿其那塞思黑所愚。入其邪黨。聽其指揮。尙非首惡。故將伊拘禁於壽皇殿之旁。俟其改悔。當日皇考拘執阿其那之時。允禩與塞思黑公然挺身保奏。允禩且曾邀約朕躬。伊等又私藏毒藥。願與同死。昨阿其那身故之後。朕遣人詢問允禩云。阿其那在皇考之時。爾原欲與之同死。今伊身故。爾若欲往看。若欲同死。悉聽爾意。比時允禩回奏。我向來爲阿其那塞思黑所愚。今伊既伏冥誅。我不願往看等語。據此則允禩似有悔心之萌。或伊僞作此語。欲留其身。以圖將來報復。均未可定。著暫緩其誅。以徐觀其後。若竟不悛改。仍蹈罪愆。再行正法。允禩癡庸卑鄙。若將伊與阿其那同列。亦覺不稱。今既禁

錮亦免其正法。數年之後。誠王允祉亦犯罪監禁於煤山。不久亦死。煤山一地。乃從來監禁王公之所也。而帝長兄允禔則圈禁於家中。至一千七百三十四年身死。其後高宗登基。始復諸革王之爵。而至一千七百七十八年。允禩允禔之爵亦蒙賜復。綜觀雍正一朝。皆處治諸兄弟之事。時湖南四川小有騷亂。帝用嚴刑以治之。死者甚衆。士大夫皆謂皇室之不和。乃國中不安之源。民間既有此等不平之論。爲帝查覺。命嚴搜焚燬。然其論已深中於人心矣。帝知治國必以道德爲重。尤須得百姓之愛戴。故處治諸兄弟之後。恐人心不悅。又下一極長之諭旨。命於各處貼黃。通告天下。使咸喻朝廷不得已之苦衷。又知康熙六十一年仁慈寬大之政。天下無不感戴。而在己嚴厲政治之下。人心頗覺不安。士大夫尤甚。當滿洲初入關時。百姓對於朝廷種族之見甚深。後感於康熙六十一年之仁政。漸皆化服。至此乃又有論華夷之分者。帝下諭詳闢其謬。引孟子東夷西夷之言以爲解。其後革命之時。攝政王亦曾引用此語。但帝施政過苛。頗失人心。若使在位更長者。恐國中愈不安矣。幸只十三年而崩。人心始舒。今之革命黨人。謂年羹堯建立殊功。可謂清室之忠臣。而卒不免於誅夷。狡兔死。走狗烹。清代諸帝。

大抵皆然。何能祈天永命乎。此雖挑撥漢人惡感之論。亦不能謂其盡誣。唯慈禧對於功臣隆恩始終不替。使人畏其威而懷其德。亦勿敢稍涉跋扈者。可謂至矣。（賜年羹堯自盡諭曰。就廷臣所議九十二條之內。爾應服極刑及立斬者共三十餘條。朕覽之不禁墮淚。朕統御萬方。必賞罰公明。方足以治天下。若如爾之悖逆不臣。至此而朕枉法寬宥。則何以彰國家之憲典。服天下之心乎。卽爾苟活人世。自思負恩悖逆至此。尙可以對天地鬼神。靦顏與世人相見乎。今寬爾殊死之罪。令爾自裁。又赦爾父兄子孫伯叔等多人之死罪。此皆朕委曲於全莫大之恩。爾非草木。雖死亦當感涕也。）清世宗之爲帝。除對於諸兄弟之苛刻外。其理政之勤。控御之才。學問之佳。文章之美。亦令人贊仰不置。而批臣下之摺。尤有趣味。所降諭旨。洸洸數千言。倚筆立就。事理洞明。可謂非常之才矣。乾隆時曾將帝諭旨印行。有六巨冊之多。（末年監國攝政王不自揣量。亦欲效其英武之祖宗。而摹擬其批摺。但王之爲人愚闇而懦弱。文學亦陋。本欲以此得名。而適以形其醜。其初張之洞在朝。諭旨猶有可觀。後張之洞死。則不足道矣。）其出語如鐵之剛。如薑之辣。有時極長。如江河之浩翰。有時極短。而趣味彌覺雋永。

但其中亦有不近情者。今錄一批諭如下。汝以朕爲可欺乎。汝忘朕卽位之時。已年過四十矣。官吏情僞。朕盡知之。朕在藩邸時。卽知汝名曾列彈章。汝又送朕禮物。冀朕在大行皇帝前轉圜。汝此後其小心謹慎。一舉一動。不能逃朕之洞鑒也。（譯意）又一批諭曰。朕未見汝之面。但汝名朕久聞之。汝之治績。深堪嘉尙。（譯意）（按所引批諭係採之雍正硃批諭旨中。因譯時適無此書。姑譯其意。閱者諒之。）當時有一臣被帝嚴旨申斥。奏言奉旨戰慄恐懼。愧悔無地。帝批曰。汝之懼朕知之。所云愧悔。朕尙未能遽信。將以汝後所爲。觀汝真能愧悔否也。（譯意）帝於刑部秋審之案。凡關於人命者。詳細省覽。有時平反。極其公允。今舉一事。有一殺死親夫之案。刑部擬以凌遲。帝細觀案情。批云。此婦因其夫逼令爲娼。一時氣憤。致將其夫殺死。不獨無罪。且可立坊。以表其貞烈也。但當時文字之獄。極其嚴急。士大夫不滿於朝政。而微言譏刺者。羅織甚衆。有一詩人。其詩中有一句云。明朝入清都。帝謂此語別有用意。乃謂明代入清之都城也。此人遂以此雙關之語。而罹於死刑矣。帝性多猜疑。對於臣下。恩威不測。但其時亦有數人。始終承帝之寵任。而不替者。觀帝一生。若無對於兄弟之慚德。則後世之名愈隆。

矣。耶穌教徒雖被驅逐。而其時之教士所記載。對於帝皆有稱頌之辭。亦足見公論之不可掩也。當時帝最寵任之疆吏爲田文鏡。極有幹才而不能文。乃以重金聘一幕友姓吳。奏摺公牘皆出其手。以此田文鏡之奏。遂稱天下第一。任河督時。吳勸其參劾帝舅隆科多。隆乃太后之弟也。帝未卽位之前。爲帝所親信。帝之登基。隆科多亦有力焉。但此時已不悅之。正欲黜退而無人舉發。得田奏大喜。蓋吳於京中密探頗多。消息極靈。故勸田劾之。而田果以是愈得寵任。然田之酬謝。不滿其意。遂辭去。田另延一幕友。其奏遂不如前。先是田之奏。恆爲帝所嘉賞。常盼其至。今見其忽然改變。殊批每譏笑之。田不得已。乃復以卑辭厚禮。請吳至。吳謂須每日未辦事之前。先送一元寶。乃可。田允之。於是田奏復得帝之嘉獎。帝亦察知其故。有一年田奏請聖安。帝批之。朕躬甚安。又小字批云。吳先生安否。此事喧傳衆口。殊有趣味也。後田死。此人亦蒙召用。帝御下雖過於峻。而有一事。則永爲後世之法。卽對於內監。極其嚴厲是也。凡宮中內監。只任使令之役。從不許其一語及於國政。亦不使之稍得機會。以需索官吏之賄。今舉一事。有一內監當國慶之日。演劇極佳。羣臣觀者。交口稱譽。帝甚悅。演畢之後。命至御筵之

前賞以酒肉。並使講劇中故實。此人得意之極。不覺所言出於範圍之外。正講陳揆（譯音）殺子之事畢。乃問帝曰。陳揆爲古時之常州知府。不知現在常州知府爲何人。萬歲爺能告知奴才嗎。帝聞之大怒。面色如鐵曰。汝何敢問此言。意欲何爲。立命侍御。拿下重杖之。此內監哀懇求赦。帝不應。杖畢。命發往雲南瘴地。給與兵丁爲奴。其嚴厲不稍貸如此。帝對於基督教徒。雖下令驅逐。然甚有禮。並無野蠻之舉。因其父祖皆優待教士。故帝亦不肯苛虐之。而諸教士之誠懇堅苦。亦自令人起敬也。一千七百二十五年（卽雍正三年）之時。帝降諭與羅馬第十三世教皇卑理底肯曰。覽王奏。並進貢方物。具見惻誠。我聖祖仁皇帝。怙冒萬方。無遠弗屆。龍馭升遐。中外臣民。悲思永慕。朕繼承大統。勉思紹述前徽。教化王地。處極遠。特遣使臣齎奏陳奏。感先帝之垂恩。祝聖躬之衍慶。周詳懇至。詞意虔恭。披閱之餘。朕心嘉慰。使臣遠來。朕已加禮優待。至於西洋寓居中國之人。朕以萬物一體爲懷。時時教以謹飭安靜。果能慎守法度。行止無愆。朕自推愛撫卹。茲因使臣歸國。特頒斯敕。並賜粧段大段六十四匹。次段四十四匹。王其領受。悉朕惓惓之意。由此諭亦可見帝之温和有禮矣。時教皇請帝將監禁於廣州之二

教士釋放。帝亦允之。答曰。汝既以禮懇求。朕卽赦其前罪。以見朝廷懷柔遠人之至意。朕體上天好生之德。卽禽獸草木。無不覆育。而況同爲人類乎。〔譯意〕當時記述言帝自幼足不踐蟲蠶。行避人影。亦可見帝之仁焉。帝之崩也。有謂爲一盧姓之婦所弑者。盧湖南人。謀逆而死。其婦工劍術。日思報復。蚤緣入暢春園。遂乘機行刺。既遂其志。亦自刎而死。此雖不足據。亦一異聞也。

第五章 乾隆朝

高宗二十五歲登基。卽一千七百三十六年也。在位六十年。傳位於子。爲太上皇者。又三年。治國之才。自古罕有。不獨內政修明。其武功亦炳耀於史冊。征準回西藏中亞細亞。緬甸安南。無不懷服。拓地數千里。爲清代極盛之時。德性醇備。寬仁而剛斷。文學武事。靡不精諳。但聰明至極。羣臣皆出其下。遂有言莫予違之病。任事之臣。小有過失。輒不能忍。而於領兵者尤甚。此其盛德之累也。又其時中國方閉關自守。不明世界大勢。故與歐洲通商。恆謹慎太過。然其識量深遠。見理明透。眞英明之主也。其家庭中亦無慚德。雖相沿古制。妃嬪衆多。而宵旰勤勞。毫無溺惑荒怠之志。故國勢日強。遠軼前代。

焉。一千七百九十五年。卽乾隆五十八年。英人欲在遠東推廣商務。始派使臣伯爵馬
憂爾尼至中國。閱其記載。可見當時盛大之情形。高年之帝。與其大臣正在熱河秋狩。
文物之盛。雄武之概。令人景仰歎慕而不能已。其所述大臣和珅之事。尤有趣味。和珅
者。帝晚年最寵信之臣也。居心奸險。盡害國家。至帝崩。乃敗。英國公使至中國時。帝年
已八十有四矣。皇子雖衆。而存者只四人。卽八王。十一王。十五王。十七王是也。帝在熱
河時。命十五王居京留守。卽仁宗也。一千七百八十四年（卽乾隆四十八年）朝中因
繼嗣問題。頗有議論。廷臣請帝立太子。蓋其時宗室王公大臣見和珅權勢太大。帝女
又下嫁於其子。故欲帝早定儲位。以防不測。國中士大夫以自古無不立太子者。亦言
儲位之宜定。乃有人上奏請立儲。帝不允。降一極長之諭。詳辨其利害。蓋帝於前代爭
儲之禍。家庭之變。知之審矣。諭曰。朕閱閣臣所進職官表志。詹事府一門。其按語內稱
詹事爲東宮官屬。我國家萬年垂統。家法相承。不事建儲冊立。詹事府各員。留以備詞
臣遷轉之階等語。是書館臣因朕前降諭旨。於建儲一事之斷不可行。明切訓示。故於
按語內。特爲揭出。其實書生拘迂之見。豈能深計及此。且使是書留傳後世。安知不又

嘗議館臣爲無奈。迎合論旨。非其本懷耶。用是不得不再爲明白宣諭。夫堯授舜。舜授禹。唐虞固公天下。卽禹之傳啟。亦非於在位時有建立太子之事。三代以後。人心不古。秦漢豫立太子。其後爭奪廢立。禍亂相尋。不可枚舉。遠而唐高宗立建成爲太子。至於兄弟相殘。建成被害。近而明神宗朝。羣臣奏請豫立國本。紛紜擾亂。大抵皆爲後來希榮固寵之地。甚至宵小乘閒伺釁。釀爲亂階。如挺擊等案。神宗召見太子。泣爲慰藉。父子之間。至於如此。閱之真可寒心。可知建儲卅立。非國家之福。召亂啟釁。多由於此。卽以我朝而論。皇祖時理密親王亦嘗立爲皇太子。且特選公正大臣如湯斌者爲之輔導。乃旣立之後。情性乖張。卽湯斌亦不能有所匡救。羣小復從而蠱惑。遂至屢生事端。上煩皇祖聖慮。終至廢黜。且理密親王幸而無過。竟承大統。亦不過享國二年。其長子弘皙縱欲敗度。未克幹蠱。年亦不永。使相繼嗣立。不數年間。連遭變故。豈我大清宗社臣民之福乎。是以皇祖有鑒於茲。自理密親王旣廢。不復建儲。迨我皇祖龍馭上賓。傳位皇考。紹登大寶。十三年。勵精圖治。中外肅清。皇考敬法前徽。雖不豫立儲位。而於宗社大計。實早爲籌定。雍正元年。卽親書朕名。緘藏於乾清宮正大光明扁內。又另書密

封一匣。常以隨身。至雍正十三年八月。皇考升遐。朕同爾時大臣等敬謹啟視。傳位於朕之御筆。復取出內務府緘盒密記。覈對脗合。人心翕然。此天下臣民所共知者也。朕御極之初。恪遵家法。以皇次子乃孝賢皇后所生嫡子。爲人端重醇良。依皇考之例。會書其名藏於乾清宮正大光明扁額後。乃稟命不長。未幾薨逝。遂命大學士鄂爾泰張廷玉將其名撤出。追謚爲端慧皇太子。是未嘗不立嫡也。但不以明示衆耳。嗣後皇七子亦孝賢皇后所生。秉質純粹。深愜朕心。不久亦卽悼殤。其時朕視皇五子於諸子中更覺貴重。且漢文滿洲蒙古語馬步射及算法等事。並皆嫻習。頗屬意於彼。而未明言。乃復因病旋逝。設依書生之見。規仿古制。繼建元良。則朕三十餘年之內。國儲凡三易。尙復成何事體。是以前於癸巳年復書所立皇子之名。藏於匣內。常以自隨。是年南郊大祀。令諸皇子在壇襄事。曾以所定皇子默禱於上帝。若所定之子。克承堂構。則祈昊蒼眷佑。俾得年命延長。儻非天意所屬。則速奪其算。朕亦可另爲選擇。毋誤我國家宗社。生民重寄。本年恭詣盛京。祇謁祖陵。亦如告天之言。默祝於太祖太宗之前。仰祈靈爽式憑。永垂昭鑒。朕非不愛子也。止以宗社爲重。若朕之子孫。皆以朕此心爲心。實大

清國億萬斯年之福也。今日召對諸皇子及軍機大臣。面降此旨。卽朕前所默告上帝祖宗之言。豈容有絲毫虛飾耶。朕於天下一切庶務。無不宵旰勤求。悉心籌畫。寧於繼體付託之重。轉不早爲定計乎。秋間朕於避暑山莊河岸。御槍打鴉鵲。失足落水。濕衣。其時不特御前王公大臣等聞知。俱卽趨至問安。卽漢軍機大臣。接踵前赴該處。朕仍率伊等談笑而行。並未有因內廷禁地。太監等敢於阻止者。設朕起居偶有違和。大臣等俱可直詣寢所。此皆朕平日君臣一體。無日不接見諸臣。面承諭旨。何至有若前代夜半禁中出片紙之語。爲杞人之憂乎。總之建儲一事。卽如井田封建之必不可行。朕雖未有明詔立儲。而於天祖之前。旣先爲齋心默告。實與立儲無異。但不似往代覆轍之務虛名而受實禍耳。故見在詹事官屬。雖由舊制。而其實一無職掌。止以備員翰林。升轉之資耳。因再明切宣諭。我子孫其各敬承無替。庶幾億萬年無疆之休。其在斯乎。總之此事。朕亦不敢必以爲是。其有欲遵古禮。爲建立之事者。朕亦不禁。俟至於父子兄弟之間。猜疑漸生。釀成大禍時。當思朕言耳。並諭館臣將此旨冠於是編之首。俾天下萬世。咸知朕意。觀此諭旨。光明正直。毫無隱飾。凡帝之諭皆然。寬而不緩。嚴而不苛。

動輒數千言。而無空泛之語。今再錄其退位之諭如下。乃乾隆五十九年之八月也。諭曰。朕臨御天下五十九年。仰蒙昊蒼眷佑。列聖貽庥。薄海昇平。梯航向化。重熙累洽。惟日孜孜。無時不以敬天勤民爲念。行慶施惠。錫祜延禧。普免漕糧二次。地丁錢糧四次。而偶遇水旱偏禨。隨時蠲租。賜復賑貸。兼施不下帑金數千萬兩。所以涵養生息。子愛黎元。至周且渥。茲紹膺統緒。明歲正屆六十年。粵稽史典。前代帝王享國長久者。未可多得。卽有一二。或係冲齡踐祚。用能多歷年所。朕則春秋二十有五。始卽位。誕膺大寶。迄今八旬。開四。康強逢吉。五代同堂。景運增隆。寰瀛寧謐。享國之年。幸周甲子。壽祚延洪。實爲古今罕覩之盛事。此皆上蒙昊貺。駢蕃克膺。備福。朕於感荷之餘。彌深兢業。早經欽天監推算六十年元旦日食。上元月食。古來史傳所載有日食修德。月食修刑之說。固因上天垂象。理宜修省。其實君人之道。於德刑二事。平日本宜刻深兢勵。亦何待日月薄蝕。始懷寅戒之心。應天以實。不以文。與其託諸空言。寧若見諸行事之實。修德莫大於愛民。若覃敷恩澤。加惠閭閻。俾海寓子民。共臻樂利。則所謂修德。孰大於是。所有六十年各省應徵漕糧。著再加恩普免一次。其應如何分年輪免之處。仍著該部覆

議具奏。至以修刑而論。則停免勾到。卽所以恤刑。但赦非善政。利於宵小而不利於善良。昔人卽有此論。明年係六十年國慶。後歲丙辰。爲嗣皇帝卽位元年。俱應錫慶施仁。於恤刑獄。若今年停勾。則三年連緩。莠民特有寬政。作奸犯科者。無所做畏。轉非辟以止辟之意。是以本年仍照舊勾到。明年元旦著照五十一年之例。不御殿。不受朝賀。是日午後。向有諸王暨皇子皇孫等內庭家宴之例。五十一年元旦日食復圓後。曾經舉行。明歲究係六十年周甲年分。所有內庭家宴。亦著一併停止舉行。朕於是日亦不御禮服。照每年例。恭詣奉先殿堂子及先師各等處行禮時。御龍袍貂褂。將屆日食時。卽換常服。以示寅恭而寓修省。日月薄蝕。躔度本屬有定。數千百年後。皆可推算而得。所謂千歲之日。至可坐而致。但元旦上元。適值日月虧蝕。究爲昊穹示儆之象。幸天恩垂佑。適在明歲。爲朕卽位周甲告成之年。自應祇承無斁。設在丙辰正月。則爲嗣皇帝卽位之元。於吉祥盛事。轉爲未慊。是卽日月薄蝕一事。而上天之篤佑朕躬。以貽我子孫萬年無疆之庥者。至優至厚。朕惟有益感天恩。倍深乾惕。又明年乙卯。爲朕臨御六十年。本欲於萬壽節前。由熱河回京受賀。今春因中外臣工懇請舉行慶典。適上冬雪澤。

未獲優霑。春間又復缺雨。業經降旨宣諭。令將明年慶典停止舉行。若仍照庚戌年八月之例。於萬壽前回京。則王公外藩以及大小臣工等。必又再四懇請舉行慶典。則似朕今春所降諭旨。轉爲不誠。是以明年仍定於熱河駐蹕。過萬壽後。再行回鑾。俟至丙辰正月歸政嗣皇帝。以符正月上日受終文祖之義。彼時備儀授受盛典。光昭嗣皇帝。率領臣民以天下養。介福祝嘏。慶洽敷天。尤爲千古罕觀盛事。實我大清億萬載無疆之福也。將此通諭知之。帝在位六十年中。敬天法祖。勤儉愛民。皆出於至誠。文治之隆。武功之盛。國家富強。人民樂業。洵可謂休明之世矣。所爲盛德之累者。唯暮年寵任和坤。以致盛治不終。和坤之爲人。奸險貪佞。小有應變之才。諂媚以致高位。招權納賄。敗壞官常。遂激成川楚之亂。以帝之英明。而偏信此人。竟爲所蒙蔽。盜弄威權。貪奢無度。吏習民風。爲之一變。而叛亂起矣。帝旣深信不疑。又以愛女下嫁於其子。故其地位愈固。竊執大權。幾二十年。身致巨富。天下珍寶。皆輸其家。雖皇宮亦不及之焉。其弟和琳亦爲西藏辦事大臣。當馬戛爾尼使中國時。特由拉薩召回。因關於印度西藏之事。備顧問也。帝降一諭。述中國對於西藏之主權。及辦事大臣與喇嘛之關係。諭曰。據成德

來京奏稱和琳辦事甚妥。且見達賴喇嘛不行叩拜。達賴喇嘛惟命是聽等語。和琳如此舉動。甚爲得體。數年以來。藏內風氣日下。諸事廢弛。今經和琳整頓。權歸而令自易行。見派松筠赴藏辦事。伊係蒙古。素遵黃教。儻不知自重。恐將來辦事。仍虞掣肘。著傳諭松筠。抵藏後。接見達賴喇嘛等。不可叩拜。即使遵奉黃教。俟年滿回京之日。再行禮拜。亦無不可。帝見使臣時和琳必在其側。馬憂爾尼與和琳會晤。力言英國並不覬覦西藏之利益。及解決廓爾喀之問題。與中國無害。但和琳在旁恆出反對之議。其勢力頗大。廷臣皆信之。和坤之意則較爲活動。彼記憶英國在那霸里一役之友誼。故勸帝免使臣行叩首之禮。大臣中有力爭者。其時馬憂爾尼所欲與中國定立之條件。約分四事。一派公使駐北京。一推廣商務。一議定稅則。一關於傳教之事。聞和坤勸帝量予應允。但諸皇子力阻。故所議不成。帝降一諭與英王喬治第三曰。咨爾國王。遠在重洋。傾心嚮化。特遣使恭齋表章。航海來庭。叩祝萬壽。並備進方物。用將忱悃。朕披閱表文。詞意肫懇。具見爾國王恭順之誠。深爲嘉許。所有賚到表貢之正副使臣。念其奉使遠涉。推恩加禮。已令大臣帶領瞻覲。錫予筵宴。疊加賞賚。用示懷柔。其已回珠山之管船。

官役人等六百餘人。雖未來京。朕亦優加賞賜。俾得普霑恩惠。一視同仁。至爾國王表內懇請派一爾國之人。住居天朝。照管爾國買賣一節。此則與天朝體制不合。斷不可行。向來西洋各國。有願來天朝當差之人。原准其來京。但既來之後。卽遵用天朝服色。安置堂內。永遠不准復回本國。此係天朝定制。恐爾國王亦所知悉。今爾國王欲求派一爾國之人。住居京城。既不能若來京當差之西洋人在京居住。不歸本國。又不可聽其往來。常通信息。實爲無益之事。且天朝所管地方。至爲廣遠。凡外藩使臣到京。驛館供給。行止出入。俱有一定體制。從無聽其自便之例。今爾國若留人在京。言語不通。服飾殊制。無地可以安置。若必似來京當差之西洋人。令其一例改易服飾。天朝亦從不肯強人以所難。設天朝欲差人常住爾國。亦豈爾國所能遵行。況西洋諸國甚多。非止爾一國。若俱似爾國王懇請派人留京。豈能一一聽許。是此事斷難行。豈能因爾國王一人之請。以致更張天朝百餘年法度。若云爾國王爲照料買賣起見。則爾國人在澳門貿易。非止一日。原無不加以恩視。卽如從前博爾都噶爾亞意大利亞諸國。屢次遣使來朝。亦曾以照料貿易爲請。天朝鑒其悃忱。優加體恤。凡遇該國等貿易之事。無

不照料周備。前次廣東商人吳昭平有拖欠洋船價值銀兩者。俱飭令該管總督由官庫內先行動支帑項。代爲清還。並將拖欠商人重治其罪。想此事爾國亦均知矣。外國又何必派人留京。爲此越例斷不可行之請。況留人在京。距澳門貿易處所。幾及萬里。伊亦何能照料耶。若云仰慕天朝。欲其觀習教化。則天朝自有天朝禮法。與爾國各不相同。爾國所留之人。卽能習學。爾國自有風俗制度。亦斷不能效法中國。卽學會亦屬無用。天朝撫有四海。惟勵精圖治。辦理政務。奇珍異寶。並無貴重。爾國王此次齎進各物。念其誠心遠獻。特諭該管衙門收納。其實天朝德威遠播。萬國來王。種種貴重之物。梯航畢集。無所不有。爾之正使等所親見。然從不貴奇巧。並無更需爾國製辦物件。是爾國王所請派人留京一事。於天朝體制既屬不合。而於爾國亦殊覺無益。特此詳晰開示。遣令貢使等安程回國。爾國王唯當善體朕意。益勵款誠。永矢恭順。以保乂爾有邦。共享太平之福。除正副使臣以下各官及通事兵役人等。正賞加賞各物件。另單賞給外。茲因爾國使臣歸國。特頒敕諭。並錫賚爾國王文綺珍物。具如常儀。加賜綵段羅綺文玩器具諸珍。另有清單。王其祇受。受朕眷懷。特此敕諭。此諭降於接見使臣之後。

閱之至堪驚訝。當時政府不知世界之大勢。其辭氣尊大如此。孰知自降此諭後。國勢漸以衰弱。遂成今日耶。又有一諭。亦降與英王喬治三者。諭曰。爾國王遠慕聲教。嚮化維殷。遣使恭齋表貢。航海祝釐。朕鑒爾國王恭順之誠。令大臣帶領使臣等瞻覲。錫之筵宴。賚予駢蕃。業已頒給敕諭。賜爾國王文綺珍玩。用示懷柔。昨據爾使臣以爾國貿易之事。稟請大臣等轉奏。皆更張定制。不便准行。向來西洋各國及爾國夷商赴天朝貿易。悉於澳門互市。歷久相沿。已非一日。天朝物產豐盈。無所不有。原不藉外夷貨物以通。有無。特因天朝所產茶葉磁器絲斤。爲西洋各國及爾國必需之物。是以加恩體恤。在澳門開設洋行。俾得日用有資。並需餘潤。今爾國使臣於定例之外。多有陳乞大乖仰體天朝加惠遠人撫育四夷之道。且天朝統馭萬國。一視同仁。卽在廣東貿易者。亦不僅爾一國。若俱紛紛效尤。以難行之事。妄行干瀆。豈能曲徇所請。念爾國僻居荒遠。間隔重瀛。於天朝體制。原未諳悉。是以命大臣等向使臣詳加開導。遣令回國。恐爾使臣回國後。稟達未能明晰。復將所請各條。繕敕逐一曉諭。想能領悉。據爾使臣稱爾國貨船將來。或到浙江寧波舟山及天津廣東地方。收泊交易一節。向來西洋各國

前來貿易。俱在澳門。設有洋行。收發各貨。由來已久。爾國亦已遵行多年。並無異語。其浙江寧波直隸天津等各海口。均未設有洋行。爾國船隻到彼。亦無從銷賣貨物。況該處並無通事。不能諳曉爾國語言。諸多未便。除澳門仍准照舊交易外。所有懇請向寧波舟山天津地方泊船貿易之處。皆不可行。又據爾使臣稱爾國買賣人要在天朝京城另立一行。收貯貨物發賣。做照俄羅斯之例一節。更斷不可行。京城爲萬方拱極之區。體制森嚴。法令整肅。從無外藩人等在京城開設貨行之事。爾國向在澳門交易。亦因澳門與海口較近。且係西洋各國聚會之處。往來便易。若於京城設行發貨。爾國在京城西北地方相距遼遠。運送貨物。亦甚不便。從前俄羅斯人在京城設館貿易。因未立恰克圖以前。不過暫行給屋居住。嗣因設立恰克圖以後。俄羅斯在該處交易買賣。即不准在京城居住。亦已數十年。見在俄羅斯在恰克圖邊界交易。即與爾國在澳門交易相似。天朝疆界嚴明。從不許外藩人等稍有越境攙雜。是爾國欲在京城立行之事。必不可行。又稱欲求相近珠山地方小海島一處。商人到彼。即在該處停歇。以便收存貨物一節。爾國欲在珠山海島地方居住。原爲發賣貨物而起。今珠山地方既無洋

行。又無通事。爾國船隻。已不在彼停泊。爾國要此海島地方。亦屬無用。天朝尺土俱歸。版籍疆址森然。卽島嶼沙洲。亦必劃界分疆。各有專屬。況外夷向化天朝。交易貨物者。亦不僅爾一國。若別國紛紛效尤。懇請賞給地方居住買賣之人。豈能各應所求。且天朝亦無此體制。此事尤不便准行。又據稱撥給附近廣東省城小地方一處。居住爾國夷商。或准令澳門居住之人。出入自便一節。向來西洋各國夷商居住澳門貿易。畫定居址地界。不得踰越尺寸。其赴洋行發貨夷商。亦不得擅入省城。原以杜民夷之爭論。立中外之大防。今欲於附近省城地方另撥一處居住。已非歷來定例。況西洋各國在廣東貿易多年。獲利豐厚。來者日衆。豈能一一撥給地方分住耶。至於夷商出入往來。悉由地方官督率洋行商人隨時稽察。若竟毫無限制。恐內地民人與爾國夷人閒有爭論。轉非體恤之意。覈之事宜。自應仍照定例。方爲妥善。又據稱爾國夷商自廣東下澳門由內河行走。貨物或不上稅。或少上稅一節。夷商貿易往來納稅。皆有定則。西洋各國均屬相同。旣不能因爾國船隻較多。徵收稍有溢額。亦不便將爾國上稅之例。獨爲減少。惟應照例公平抽收。與別國一體辦理。又據稱爾國船隻請照例上稅一節。粵

海關征收船料。向有定例。今既未便於他處海口設行交易。自應仍在粵海關按例納稅。無庸另行曉諭。至於爾國所奉之天主教。原係西洋各國向奉之教。天朝自開闢以來。聖帝明王。垂教創法。四方億兆。率由有素。不敢惑於異說。即在京當差之西洋人等。居住在堂。亦不准與中國人民交結。妄行傳教。華夷之辨甚嚴。今爾國使臣之意。欲任聽夷人傳教。尤屬不可。以上所諭各條。原因爾使臣之妄說。爾國王或未能深悉天朝體制。並非有意妄干。朕於入貢諸邦。誠心向化者。無不加之體恤。用示懷柔。如有懇求之事。若於體制無妨。無不曲從所請。況爾國王僻處重洋。輸誠納貢。朕之錫予優加。倍於他國。今爾使臣所懇各條。不但於天朝法制攸關。即爲爾國王謀。亦俱無益難行之事。茲再明白曉諭。爾國王當仰體朕心。永遠遵奉。共享太平之福。若經此次詳諭。後爾國王或誤聽爾下人之言。任從夷商將貨船駛至浙江天津地方。欲求上岸交易。天朝法制森嚴。各處守土文武。恪遵功令。爾國船隻到彼。該處文武必不肯令其停泊。定當立時驅逐出洋。未免爾國夷商徒勞往返。勿謂言之不豫也。其懷遵勿忽。特此再諭。當時使臣進見。帝已免其叩首之禮。但滿人至今言者。猶謂使臣進見時。震於天威。不覺

其膝之屈也。後至一千七百九十六年。即乾隆六十年。帝退位之前二日。又下一諭。與喬治第三曰。爾國遠隔重洋。上年遣使恭齋表貢。航海祝釐。朕鑒爾國王忱悃。令使臣等瞻覲與宴。錫賚駢蕃。頒發敕諭回國。並賜爾國王文綺珍玩。用示懷柔。茲爾國王復備具表文土物。由夷船寄粵呈進。具見恭順之誠。天朝撫有萬國。琛賚來庭。不貴其物。惟貴其誠。已飭諭臣將貢物進收。俾伸虔敬。至天朝從前征剿廓爾喀時。大將軍統領大兵深入。連得要隘。廓爾喀震懾兵威。匍匐乞降。大將軍始據情入奏。天朝仁慈廣被。中外一體。不忍該處生靈。成就殲除。是以允准投誠。彼時曾據大將軍奏及爾國王遣使前赴衛藏投稟。有勸令廓爾喀投順之語。其時大功業已告成。並未煩爾國兵力。今爾國王表文內。以此事在從前貢使起身之後。未及奏明。想未詳悉始末。但爾國王能知大義。恭順天朝。深堪嘉尚。茲特頒賜爾國王錦段等件。爾國王其益勵盡誠。永承恩眷。以副朕綏遠敷仁至意。帝非獨有治國之才。卽家庭之中。亦毫無缺點。道德高純。不愧大皇帝之氣度。六十年中。雖天下承平。未嘗一日忘武備。常出狩於外。獵術極精。馳驅於沙漠曠野之中。以爲至樂。此等性質。蓋滿洲強武之源。而清室之所以興者。其

後日趨文弱。皇帝深居九重之內。圍場久廢。淪爲荒煙。而滿洲自此衰微矣。狩獵之場。日荒。宦官之權日增。此中消息。相爲倚伏。至隱微也。高宗在宮內綜理嚴密。晚年春秋漸高。始稍放任。觀帝一生成功之祕訣。不外四字。卽事必躬親是也。終日乾乾。不稍懈怠。襟懷寬廣。處事堅決。而愛民之心。出於至誠。今之遊歷於中國者。過圓明園之廢墟。覽熱河之獵場。而慨想此偉大之皇帝。當其時中國兵力囊括亞洲之半。今其子孫。乃不克肖如此。觀其人儀態肆應。非不華貴周洽也。而其中則昏庸鄙陋。毫無知覺。覽滿洲親貴之無人。知其衰不能振矣。高宗性惡奢靡。唯至暮年。信任和坤。致國中風俗爲之一變。然帝之自律。固始終如一也。在位之日。每歲至臘月二十三日。必祀竈神。中國俗傳竈神。此日登天。報告一切之事。故於是日送之。宮中行此禮時。旁置一鼓。皇后先至。俟帝到。卽擊鼓唱天子求賢曲一闋。唱畢。則燃爆竹。至嘉慶時。此禮乃廢。高宗性雖嚴正。而興致甚高。在圓明園時。時演劇。每歲正月。則於園中遍札彩棚。如市場然。排列各種古玩磁器絲綢刻繡等物。並設酒樓茶座。許臣民入觀。以內監掌之。此等貨物。皆於市中購取。由內務府選擇陳列。觀者可以購之。亦可在內隨意飲食。其酒館茶室。以

及售物之人。均於市中選其容貌端正。口音清亮者。司之。帝若出遊。則酒保報菜。茶役呼茶。賣物者兜售。掌櫃者算帳。喧呼鬧熱。一如市衢。帝覽之而悅。至正月盡。乃畢。後嘉慶時亦廢之。蓋仁宗喜靜。不樂此也。然乾隆時。雖有此等遊樂之事。而帝家法極嚴。以儉約爲臣民先。其後慈禧太后亦恆教人惜物崇儉也。乾隆時曾數舉巡幸之典。每至一處。則喜訪其地特產之精者食之。有一滿人。乃世祿之家。言其先代隨扈日記中。曾記一事。言帝至江南揚州。食豆腐而甘。此本揚州有名之肴饌也。問其價。只三十文耳。乃下諭。以後類此價賤味美之饌品。御廚中亦須備之。後回宮。察知在揚州所食之饌。價只三十文者。內府開至十二兩之巨。問其故。內監等言南方之物。不易至北。故價值懸絕如此。此等虛浮之弊。內府已視爲固然。雖以帝之明察。而終不能革也。慈禧當國之時。亦明知之。而無如之何。故內務府大臣爲最優美之缺。每年進項。幾有一兆之多。自宗室王公以下。皆有分潤。故其弊竇深固。道光時曾痛革之。其結果則親貴皆怨。百方阻撓。卒不能奏其效。相傳乾隆時。冬季有一日極冷。帝召見汪由敦。問其入朝之先。在家曾食何物。汪答臣家貧。每晨只食雞子二三枚耳。帝訝曰。雞子每枚價值七錢五。

分。朕每食尙只二枚。汝每早食三枚。如此豪奢。乃稱家貧耶。汪不敢以實情奏知。但曰。臣所食之雞子。與宮中不同。每枚價值銅錢一文耳。帝聞之。心知其故。乃嚴責內務府之浮報焉。帝後宮雖衆。而御之以禮。從無寵愛踰分之事。故宮中靜穆。不聞妬爭。訓教皇子極嚴。亦均和睦無間。由帝寬嚴並用。訓戒有法。非偶致也。然記載中言帝亦偶有游戲冒險之舉。其事雖不甚確。亦足以資異聞。今錄之於下。乾隆初年。京師有三姑娘者。色藝爲一時冠。聲氣通大內。達官貴人多奔走其門。名士獄往往得一言而解。以是士林交口譽之。學士大夫無知與不知。爭以一識面爲幸。一夕步軍統領召校尉某。授以令箭。屬捕三姑娘。校尉懼甚。願以軍令不可違。無已。姑往探之。夜深潛入內室。直達三姑娘所。排闥入。晤婢子。告以意。聞簾內有女子嬌聲應曰。然則貴人也。貴人辱臨。不可以褻服見。容易衣整冠。訖當出迎。校尉候久不出。恐其遁。促之內笑曰。焉有九門提督拿人。而能倖免者哉。姑再遲遲。某當偕往。久之三姑娘啟門出。授以珠一篋。校尉不敢受。旋復授以黃色綢篋。曰。以此遺提督。若事了矣。校尉有難色。三姑娘曰。姑以此試入。不諧再來未晚。某行天下遍矣。豈欺人哉。校尉不得已受而懷之。因問曰。若房內何

人曰。某貴人。已從地道縱之出矣。校尉戰慄。幾無人色。歸至途。追者已數騎。屬於道矣。授以篋。使復命。翌日提督趨入朝。上語之曰。吾固知卿謹。然大臣須持大體。無徒恃察。察爲也。提督惶恐叩首出云。按三姑娘事。見袁子才新齊諧所述。與此大同小異。今遊歷於北京者。見禁城內一回教之禮拜堂。已廢頽矣。而其精美之建築。猶可想見。五年前。主持其中者。爲一嚴潔之回教徒。曾往麥加城遊歷。至一千九百零八年死。因堂中無人主持。故漸頽敗。然卽其頽敗之日。猶令人驚其煥美。則其當年之盛可知也。去年五月。政府折毀其堂。謂其牆垣已將傾倒。且欲用爲駐兵之所。實則因其地距總統府太邇。恐藏奸宄也。此堂之建。其歷史有可述者。且其事甚確。今述之於下。乾隆征回部時。有一酋長名阿里阿斯（譯音）（疑卽阿睦爾撒納）者。其妻絕色也。膚體玉潔。不施脂粉。艷名傳播遠近。帝亦聞之。兆惠出師請訓。帝偶言及此。命其獻俘時執歸。大軍旣行。所向摧破。阿酋自刎而死。其妻被執。兆惠騰章報捷。並言已執此女。帝聞大喜。寄諭命沿途優加待遇。防其自盡。及抵京置之南海宮內。今其地卽改爲新華門者也。宮中皆稱之爲香妃。初到之時。觀其狀。似無亡國之戚。然遇帝臨視。則貌至嚴冷。問以

言亦不答。帝命妃嬪往勸以美辭動之。仍不答。既而袖出一刀曰：予國亡夫死，早不欲生。所以不遠盡者，欲報予夫之仇耳。帝如相強，予卽以此刺之。然後自殺。諸妃聞之，皆懼。以告於帝。帝知一時不能挽其意，遂置之。偶往其居，亦只默坐相對。欲以恩禮縻之，冀其久而漸忘。但命人嚴防，勿聽自盡。二年之後，遇回教令節，女哭極哀。守者以告帝。命於宮中建一回教禮拜堂。自女所居可見其塔，並於其旁建築屋宇市肆，一仿回部之式。思以感動其心。今此地北京人名爲回營。時皇太后年已八十餘矣，性情嚴厲，約帝以禮。見帝戀於回女，恐蹈不測，謂帝曰：此女旣固執不從，何不聽其自盡。否則放還故鄉。帝仍不忍捨。會郊祭，帝先一日齋所致齋。太后俟帝已行，命人帶回女至。卽閉其門，謂之曰：聞汝不願順從皇帝，汝志如何。可直陳。女答曰：但求死耳。太后曰：旣如此，今日卽遂汝志。女聞叩頭謝太后之恩曰：予萬里跋涉而來，蒙羞含恥，所以不卽死者，欲報予夫之仇耳。今知志不能遂，何復偷生於世。唯願往從予夫於地下。蒙太后仁慈，許予一死。雖在幽冥，不忘太后之恩。淚隨聲墮。太后見之，亦爲感動。命太監引至旁室內。自經而死。帝在齋所聞宦侍奔告，太后召見回女，知有變，遽命駕還宮。叩門不得入。泣

於外。太后察妃氣絕始啟門延帝入。則已無救矣。麗色如故。毫無兇惡之狀。帝大慟。命以上等妃嬪禮葬之。（按此事王湘綺集中亦載之。今附錄於此。準回之平有女籍於宮中生有美色。專得上寵。號曰回妃。然準女懷其家國。恨於亡破。陰懷逆志。因侍寢而驚宮御者數矣。詰問具對。以必死報父母之讎。上益悲壯其志。思以恩養之。太后知焉。每召回女上輒左右之。會郊祭齋宿。子夜駕出。太后乘平輦直至上宮。入便閉門。宦侍奔告。上遽命駕還叩門不得入。以額觸扉。臣御號泣聞於內外。太后當門坐促召回女。絞而殺之。待其氣絕撫之已冷。乃啟門上入號泣俄而大寤。頓首太后前。太后亦持上流涕左右莫不感動。泣下海內聞者皆歎息。謂天子有聖母也。）乾隆後十年中。政府之權全在大學士和坤之手。其黨甚衆。至帝退位後三年。坤之言直同法律。家財之巨。古今無敵之者。當時有教匪之亂。軍務餉項任意侵蝕。鬻官賣爵。均有一定之價。清末之慶王亦然。其府中後門。卽官吏賣買之市也。坤家中之珍寶。勝於宮中。貪奢至極。無不傾覆之理。一旦帝崩。而坤之命運亦終矣。蓋財之爲物。固禍福之門。斷未有厚積而不敗者。坤出身微賤。然儀容談吐。均極佳妙。性機警。善測人意。當馬戛爾尼使中國時。

甚贊其人。今將其出身。敘述於下。乃見於某滿人之筆記中者。記曰。和珅出身微賤。但其儀表甚佳。故英使馬夏爾尼見之。極加稱贊。當乾隆中葉。和珅以正黃旗滿洲官學生。在鑾儀衛當差。選昇御轎。一日。帝在轎中。披閱四川省章奏。係言匪亂之事。龍顏甚怒。曰。虎兇出於柙。龜玉毀於櫝中。是誰之過歟。衆皆茫然不解。和珅曰。皇上言守土者不得辭其責。帝聞而顧之。見其儀度俊雅。聲音清亮。甚異之。是日回宮。遂召見。奏對稱旨。由是不次升擢。數年之間。遂至大學士軍機大臣。嚮用甚專。權勢薰灼矣。和珅聰明有急智。應對敏給。善測帝意。故深得帝寵任。雖無甚學問。然善於剽竊。能藏其短。常派爲嘉親王師傅。王性嚴正。和珅深不慊於王。恆於帝前極力設法。免立王爲太子。傳聞有一日和珅與王並立。曾以足輕踢之。然其後嘉親王終嗣大位。和珅甚悔其前之失計焉。(按庸庵筆記所敘與此略異。其二云和珅曾爲仁宗師傅待考。)(譯意)高宗退位之後。尊爲太上皇。但國政仍稟承上皇之旨。仍時升殿。諭中常有奉上皇旨云云。上皇御殿之時。居中南面。皇帝則西面而座較小。前所舉筆記中。記有一事。今述之。一日早朝。軍機皆跪於下。見上皇閉目盤膝而坐。口中喃喃有辭。帝用心聽之。一字不解。久之。

上皇忽開目問曰。是何名字。和珅應聲答曰。高天德。苟文明。上皇復閉目默誦。既畢。命軍機退。始終無他言。帝甚以爲奇。後問和珅曰。上皇所誦。乃西藏喇嘛密呪。誦之則雖萬里之外。其人必死。奴才見上皇閉目默誦。知係此呪。高苟二人。乃教匪頭目也。帝聞之。以和珅知此等密呪。心愈危之。故上皇甫崩。卽賜自盡焉。

第六章 和珅

高宗退位之時。年已八十餘矣。而精神不衰。國家重事。仍親裁決。至一千七百九十八年。卽嘉慶三年之秋。忽得中風之症。延至一千七百九十九年二月七號。早八鐘。崩於養心殿。卽中國嘉慶四年正月初三日也。清至乾隆之時。可稱極盛之期。至其末年和珅當國。川楚匪亂蔓延。盛極將衰矣。高宗之崩也。亦自知貽留艱鉅於其子。仁宗三十九歲登基。雖亦稱令主。而視以前諸帝。則遠遜其英明矣。高宗既崩。始得親政。卽降諭言。歷年軍務。所以毫無起色之故。諭曰。自用兵以來。皇考焦勞軍務。寢膳靡寧。卽大漸之前。猶頻問捷報。迨至彌留。並未別奉遺訓。仰窺聖意。自以國家付託有人。他無可論。惟軍務未竣。不免深留遺憾。朕躬膺宗社之重。若軍務一日不竣。朕一日負不孝之疚。

內而軍機大臣。外而領兵諸臣。同爲不忠之輩。何以仰對皇考在天之靈。伊等卽不顧惜身家。寧忍陷朕於不孝。自列於不忠耶。況國家經費有常。豈可任伊等虛糜坐耗。日復一日。何以爲繼。又豈有加賦病民之理耶。近年皇考聖壽日高。諸事多從寬厚。凡軍中奏報。小有勝仗。卽優加賞賜。其或貽誤軍務。亦不過革翎申飭。一有微勞。旋經賞復。雖屢次飭催。奉有革職治罪嚴旨。亦未懲辦一人。卽如數年中。惟永保曾經交部治罪。逾年仍行釋放。其實各路縱賊竄逸者。何止永保一人。亦何止一次乎。且伊等每次奏報打仗情形。小有斬獲。卽鋪敘戰功。縱有挫衄。亦皆粉飾其辭。並不據實陳奏。伊等之意。自以皇考高年。惟將吉祥之語入告。但軍務關繫緊要。不容稍有隱飾。伊等節次奏報殺賊數千名。至數百名不等。有何證驗。亦不過任意虛捏。若稍有失利。尤當據實奏明。以便指示機宜。似此掩敗爲勝。豈不貽誤重事。軍營積弊。已非一日。朕總理庶務。諸期覈實。而於軍旅之事。信賞必罰。尤不肯稍從假借。特此明白宣諭。各路帶兵官員。均當滌慮洗心。力圖振奮。務於軍令一律勦辦完竣。若仍蹈欺飾怠玩故轍。再逾此次定限。惟按軍律從事。言出法隨。勿謂幼主可欺也。以上諭旨。卽歸罪於大學士和坤及其

黨也。當時文武大吏半皆和珅之黨。四日之後。有御史上奏劾珅。遂降諭開去各項差缺。拿交刑部審問。當時將其黨戶部尚書福長安亦拿交刑部。命成親王爲軍機大臣。管理戶部事務。此舉乃違背祖宗家法者。和珅既敗。內外大臣爲珅之黨者。遂皆獲咎。距高宗之崩不及十日也。若以孝道言之。似乎改革太速。而帝則謂卽先帝尙在。亦必如此辦理也。二日之後。又降一諭。歷數和珅之罪。諭曰。和珅受大行太上皇帝特恩。由侍衛洊擢至大學士。在軍機處行走。多叨沐殊施。在廷諸臣。無有其比。朕親承付託之重。茲猝遭皇考大故。苦塊之中。每思論語所云。三年無改之義。如我皇考敬天法祖。勤政愛民。實心實政。薄海內外。咸所聞知。方將垂示萬年。永爲家法。何止三年無改。至皇考所簡用之重臣。朕斷不肯輕爲更易。卽有獲罪者。若稍有可原。猶未嘗不思保全。此實朕之本衷。自蒙昭鑒。今和珅情罪重大。並經科道諸臣列款參奏。實有難以刻貸者。是以朕於恭頌遺詔日。卽將其革職拏問。臚列罪狀。特諭衆知之。朕於乾隆六十年九月初三日。蒙皇考冊封皇太子。尙未宣布諭旨。而和珅於初三日。卽在朕前。先遞如意。漏洩機密。居然以擁戴爲功。上年正月。皇考在圓明園召見和珅。伊竟騎馬直進中左。

門過正大光明殿。至壽山口。無父無君。莫此爲甚。又因骸疾。乘坐椅轎。擡入大內。肩輿出入神武門。衆目共覩。毫無忌憚。並將出宮女子。取爲次妻。罔顧廉恥。年來勦辦川楚教匪。皇考盼望軍書。刻縈宵旰。乃和珅於各路軍營。遞到奏報。任意延擱。有心欺蔽。以致軍務日久未竣。前奉皇考敕旨。令伊管理吏部刑部事務。嗣因軍需銷算。伊係熟手。是以又諭令兼戶部題奏事件。伊竟將部務一人把持。昨冬皇考聖躬不豫。批摺字畫間有未真之處。和珅膽敢口稱不如撕去。竟另行擬旨。臘月間奎舒奏報。循化歸德二廳賊番聚衆千餘。搶奪達賴喇嘛商人牛隻。殺傷二命。在青海肆行搶掠一案。和珅竟敢將原奏駁回。隱匿不辦。及皇考升遐後。朕諭令蒙古王公未出痘者不必來京。和珅不遵諭旨。令已未出痘者俱不必來京。不顧國家撫綏外藩之意。其心實不可問。大學士蘇凌阿兩耳重聽。衰邁難堪。因係伊弟和琳姻親。欺隱不奏。侍郎吳省蘭李潢大僕寺卿李光雲皆曾在伊家教讀。並保列卿貳。兼任學政。又軍機處記名人員任意撤去。種種專擅。不可枚舉。昨將和珅家產查鈔。所蓋柵木房屋。僭侈踰制。其多寶閣及隔段式樣。皆做照寧壽宮制度。其園寓點綴。竟與圓明園蓬萊瑤島無異。不知是何居心。又

所藏珍寶內珍珠手串二百餘串。較之大內。多至數倍。並有大珠較御用冠頂尤大。又寶石頂。並非伊應戴之物。伊所藏真寶石頂數十餘箇。而整塊大寶石不計其數。且有內府所無者。至金銀數目。尙未鈔畢。已有數百餘萬之多。似此貪黷營私。實從來罕見。罕聞。以上各款。皆經王大臣等公同鞠訊。和坤俱供認不諱。如此喪心昧良。目無君上。貽誤軍國重務。弄權舞弊。僭妄不法。而貪婪無厭。蠹國肥家。猶其罪之小者。實屬孤負皇考厚恩。設數年來。廷臣中有能及早參奏。必蒙聖斷。立置重典。而竟無一人奏及者。內外諸臣。自以皇考聖壽日高。不敢煩勞聖心。實則畏懼和坤。箝口結舌。皆朕所深知。今和坤罪狀已著。其得罪我皇考之處。擢髮難數。亦百喙難辭。朕若置之不辦。何以仰體在天之靈。此不得已之苦衷。爾封疆大臣等。以爲何如。除交在京王公大臣會審定擬外。著通諭各省督撫將指出和坤各款。應如何議罪。並此外有何款績。各行據實覆奏。中國權臣一旦失勢。則牽連獲咎者必衆。和坤既敗。而其黨之貪汙者。亦均隨之首辦者。卽山東巡撫伊江阿是也。今將其諭旨錄下。本日伊江阿遞到奏摺。有寄和坤書信。業經聞知。大行太上皇帝龍馭上賓。信內惟諄勸和坤節哀辦事等語。而於朕遭罹

大故並無一字提及。卽以常情而論。寄信唁問。自當以慰唁人子爲重。今伊江阿於和
坤則再三勸以節哀。而於朕躬僅照常具一請安之摺。轉將尋常地方事件陳奏。不知
是何居心。伊江阿身爲滿洲。見任巡撫。又係大學士永貴之子。曾在軍機處行走。非不
曉事者可比。乃竟如此。心存膜視。轉於和坤慰問殷勤。可見伊江阿平日不知有皇考。
今日復不知有朕。惟知有和坤一人。負恩昧良。莫此爲甚。伊江阿著傳旨嚴行申斥。並
交部嚴加議處。仍著明白回奏。伊江阿明白回奏之後。帝復降一諭曰。茲據伊江阿覆
奏。猶以詔書未到爲辭。已屬巧辯。並稱望和坤爲國家出力。向與和坤從無交涉等語。
尤不成話。見在和坤罪狀已著。業經伏法。其平日之種種貪黷營私。尙得爲國家出力
大臣乎。如果伊江阿與和坤素無交結。則該撫之浮收漕糧。見被人參奏。不知又將何
用耶。伊江阿既經顛倒錯亂於前。又復飾詞巧辯於後。實非尋常謬誤可比。著卽照部
議革職。來京候旨。帝又以乾隆末年。各省貢品。和坤取十之九。餘乃進之宮中。先帝爲
所欺蒙。降諭以後。除東三省所貢藥品磁器人參東珠貂皮之外。餘均豁免。並免各省
進呈如意。謂諸物仍取之於民。朝廷深恤民艱。恐其滋擾也。直隸總督胡季堂者。本和

坤之黨也。見坤勢敗。乃攻擊之。此蓋中國官場之慣習。奏言和坤喪盡天良。非復人類。種種悖逆不臣。蠹國病民。幾同川楚賊匪。貪黷放蕩。直一無恥小人。喪心病狂。目無君上。請依大逆律。凌遲處死。並查出和坤薊州墳塋。僭妄違制。及附近州縣。置有當舖。賫財見飭查辦各等語。帝閱之。又降諭數坤大罪二十條。命羣臣集議。其定福長安罪之。諭曰。福長安祖父叔姪兄弟。世受厚恩。尤非他人可比。其在軍機行走。與和坤朝夕聚處。凡和坤貪黷營私。種種不法罪款。知之最悉。伊受皇考重恩。常有獨對之時。若果據實直陳。較之他人舉劾。尤爲確鑿有據。皇考必早將和坤從重治罪正法。如從前辦理。納親之案。何嘗稍有寬縱。豈尙任其貽誤軍國重務。一至於此。卽謂皇考高年不敢仰煩聖慮。亦應在朕前據實直陳。乃三年中。並未將和坤罪蹟奏及。是其扶同徇隱。情弊顯然。如果福長安曾在朕前有一字提及。朕斷不肯將伊一併革職。擊問。現在鈔出伊家貨物。雖不及和坤之金銀珠寶數逾千萬。但已非伊家之所應有。其貪黷昧良。僅居和坤之次。並著一併議罪。西歷十七號。卽嘉慶四年正月丁丑。大行皇帝崩後之十六日也。廷臣覆奏。請將和坤凌遲處死。福長安則處以斬決之刑。當和坤勢盛時。諸人皆

攀援以進者。今則僉議以凌遲矣。如羣鼠窟穴於船中。及船將沉。則徒而去之。中國官場向習如此。若論和珅之僭妄貪奢。其處此刑。固無可恕。帝雖憤之已久。而爲政體計。仍免其凌遲。賜令自盡。其諭曰。現當皇考大事之時。卽將和珅處決。在伊固爲情真罪當。而朕心究有所不忍。國家本有議親議貴之條。以和珅之喪心昧良。不齒人類。原難援入議量從末減。姑念其曾任首輔大臣。於萬無可貸之中。免其肆市。和珅著加恩賜令自盡。此朕爲國體起見。非爲和珅也。福長安亦著從寬改爲應斬監候。秋後處決。並著監提前往和珅監所。跪視和珅自盡後。再押回本獄監禁。和琳本無功績。其參奏福康安。並非秉公參劾。實聽受和珅指使。且同福康安勦辦苗匪。從中掣肘。以致福康安及身未能辦竣。是和琳於苗匪一案。有罪無功。自應革去公爵。至配享太廟。尤爲非常鉅典。和琳何人。乃與開國功臣並列。著卽照議撤出。豐紳殷德係固倫額駙。且公主平日最爲皇考鍾愛。自應仰體恩慈。曲加體恤。和珅公爵係因拏獲王三槐所得。應照議革去。著加恩仍留伊伯爵。令豐紳殷德承襲。在家閒住。不許出外滋事。和珅之死。頗爲從容。諭旨到時。珅跪聽畢。叩頭謝恩。對其子及福長安曰。予二人服事大行皇帝甚久。

固應從於地下。今上自有忠愛之臣。予等可以去矣。又曰。恐大行皇帝在天之靈。亦有未安。言畢。卽以繩結於項下而死。時爲午後一鐘。覆報到宮。帝正奠祭於大行皇帝梓宮之前。似有所默禱者。當時人心不安。恐此案牽連之人太多。帝見此情形。乃降一諭。慰安中外人心。曰。和坤任事日久。專擅蒙蔽。以致下情不能上達。若不立除元惡。無以肅清庶政。整飭官方。今已明正其罪。此案業經辦結。因思和坤所管衙門本多。由其保舉升擢者。自必不少。而外省官員奔走門下。逢迎餽賄。皆所不免。若一一根究。連及多人。亦非罰不及衆之義。且近來弊端百出。事難悉數。現在宣示和坤罪狀。其最重各款。已曉然衆著。儻臣工誤會朕意。過事搜求。尙復攻擊陰私。摘發細故。或指一二人一二事以實其言。則舉之不勝其舉。並恐啟告訐報復之漸。是除一巨蠹。又流爲黨援門戶陋習。殊非朕之本意也。朕所以重治和坤之罪。實爲其貽誤軍國重務。而貪黷營私。猶其罪之小者。是以立即辦理。刻不容貸。此外初不肯別有株連。惟在儆戒將來。不復追咎既往。凡大小臣工。勿庸心存疑懼。況臣工內中材居多。若能遷善改過。皆可爲國家出力之人。卽有從前熱中躁進。一時失足。但能洗心滌慮。痛改前非。仍可勉爲端士。不

至終身誤陷匪人。特此再行明白宣諭。各宜懍遵。砥礪以副朕威。與維新之治。儻經此番訓飭之後。尙不知改過。勉立修名。則是自甘暴棄。不齒士類。必當嚴加懲治。毋謂教誠之不豫也。將此通諭知之。帝之欲罪坤久矣。特以時尙未至。故隱忍而不發。一旦高宗崩。遂更不濡緩。立即辦之。然中國人所最重者體面。故辦理之際。外若十分慎重。仍循其一定之程序而行。近於軍機處檔案中。清出關於此案之文牘甚衆。但遺失者亦不少。觀其記載。可知當時之實情。甚足寶貴也。檔案之首。卽載帝親審和坤之語。今擇錄於下。帝問汝家中所蓋柁木房屋。僭侈踰制。是否自宮中竊出。其多寶閣及隔段式樣。均仿照寧壽宮制度。是何居心。和坤答曰。柁木係奴才自己買的。曾差胡太監往寧壽宮畫下圖樣仿造。故與宮中一樣。其水晶柱係由宮中竊出。又問汝家所藏珍珠手串。至二百餘串之多。較大內所有多至三倍。並有大珠較朕帽頂所戴更大。所有寶石亦較內府更多更好。豈非貪婪不法之實據。和坤答曰。諸物皆官吏所送。大半送自武官。其餘各條。如將出宮女子選入家中。擅坐椅轎。出入大內。漏洩機密。積壓軍報。阻止蒙古王公入覲諸款。皆一一承認。蓋和坤自知其罪已定。無可免也。(譯意)凡審問會

議一切程序。本皆具文。和珅之罪。固不待審而已定。特其辦理。不得不如是耳。承審大臣審問之時。所最注意之點。卽其家產之真數。及秘密寄頓之地。和珅狡賴不肯直陳。嚴審三次。乃供認其家財大半藏匿於花園內。於是派綿二爺（卽縣恩）鈔和珅花園派十一王（及成親王永瑛）及慶桂盛住同鈔和珅住宅。共編一百零九號。其中之二十六號。已估值者。卽有二百二十三兆兩之多。若照此比例。則其家財之全額。殊難以計算矣。所有珠玉寶石等。不計其數。有一朝珠。全係極大之珍珠。進呈後。帝卽留之。故未編入查抄單內。其後慈禧太后之珍珠披肩。亦卽其中之物也。抄出之金銀。則交於戶部作爲軍餉。和珅住宅。賞與慶王。今之奕劻。卽其後嗣。但係承繼者耳。當慈禧臨朝之後數年。奕劻亦握大權。納賄賣缺。與和珅同。和珅住宅之西偏。卽今之慶邸也。其東偏花園接連十刹海者。則賞與成親王。和珅有欽賜花園一所。乃高宗所賜。壯麗非常。其中亭臺共六十四處。裝飾一如皇宮。僭用黃瓦。四面亦有望樓。派人攜帶兵器輪流看守。共一百二十人。凡此僭侈。皆珅致敗之由也。珅之富。可謂古今罕有者。無論其罪不可道。卽其巨富。已足動人歆羨。而決不能長保矣。在東方凡人太富。則危險隨之。恆

至於傾覆。然人貪財之心。尤勝於畏死之心。故雖知其危。而故蹈之。中國人以做官爲發財之捷徑。赤貧之士。一登仕途。立致巨富。種種罪惡。皆出其中。當時國內之情形。與今日不同。官吏積資。恆開質庫置田產。今則存諸外國銀行。或在上海等通商巨埠。置買市屋矣。其在庚子以前。尙沿舊習。和珅卽其代表。觀其查抄單內。凡有質庫七十五所。銀號四十二所。古玩店十三所。玉器庫二間。綢緞庫二間。而其所藏之狐皮。至有一千五百餘張。貂皮八百餘張。其餘各種獸皮。不計其數。而皮衣尙不在內。木器珍羞庫共二十二間。其精美之木器。共八千六百餘件。所有質庫古玩店等。計算資本。共值數千萬兩。至其室內雕刻繪畫。陳設一切。窮極精巧。爲美術之薈萃。至今偶或傳聞一二。而其物皆不可見矣。蓋經變亂之後。或毀或散。亦有輾轉入於外國人之手者。今將查抄之表列於下。

正屋一所（十三進七十二間）東屋一所（七進三十八間）西屋一所（七進三十三間）徽式屋一所（六十二間）花園一所（樓臺四十二座）東屋側室一所（五十二間）欽賜花園一所（樓臺六十四座）（四角樓更樓十二座更夫一百二十名）雜房

(二百二十餘間)古銅鼎(二十二座)漢銅鼎(十一座)端硯(七百餘方)玉鼎(十八座)宋硯(十一方)玉磬(二十八架)古劍(十把)大自鳴鐘(十九座)小自鳴鐘(十九座)洋表(一百餘個)大東珠(六十餘顆每顆十兩)珍珠十八顆手串(共二百二十六串)珍珠數珠(十八盤)大紅寶石(一百八十餘塊)小紅寶石(九百八十餘塊)藍寶石(大小共四千七十塊)寶石數珠(一千零八盤)珊瑚數珠(三百七十三盤)蜜臘數珠(十三盤)寶石珊瑚帽頂(二百三十六個)玉馬二匹(高一尺二寸長四尺)珊瑚樹十顆(高三尺八寸)白玉觀音一尊漢玉羅漢十八尊(長一尺二寸)金羅漢十八尊(長一尺八寸)白玉九如意(三百八十七個)玳瑁大燕碗(九十九個)白玉湯碗(一百五十四個)白玉酒杯(一百二十四個)金碗碟三十
二桌(共四千二百八十八件)銀碗碟(四千二百八十八件)嵌玉如意(一千六百零一個)嵌玉九如意(一千零八個)水晶酒杯(一百二十三個)金鑲玉簪(五百副)整玉如意(一百二十餘枝)金鑲象箸(五百副)白玉大冰盤(二十五個)玳瑁大冰盤(十八個)白玉烟壺(八百餘個)玳瑁烟壺(三百餘個)瑪瑙煙壺(一百

餘個) 漢玉煙壺(一百餘個) 白玉唾盂(二百餘個) 金唾盂(一百二十個) 銀唾盂(六百餘個) 金面盆(五十三個) 銀面盆(一百五十個) 金面盆(六十四個) 銀面盆(八十三個) 鑲金八寶炕屏(四十架) 鏤金八寶炕屏(二十三架) 鑲金炕屏(二十四架) 鑲金炕牀(二十牀) 四季夾單紗帳(全) 老金縷絲牀帳(六頂) 鑲金八寶炕牀(一百二十牀) 金嵌玻璃炕牀(三十二牀) 金珠翠寶首飾(大小共二萬八千件) 金元寶二千個(每個重一百兩) 計銀一百五十萬兩) 銀元寶一千個(每個重一百兩) 赤金五百八十萬兩(估銀八千七百萬兩) 生沙金二百萬餘兩(估銀一千八百萬兩) 元寶銀九百四十萬兩 洋錢五萬八千圓(估銀四萬零六百兩) 制錢一千五十五串(估銀一千五百兩) 人參六百八十餘兩(估銀二十七萬兩) 當鋪七十五座(查本銀三千萬兩) 銀號四十二座(查本銀四千萬兩) 古玩舖十三座(查本銀二十萬兩) 玉器庫兩間(估銀七十萬兩) 綢緞庫兩間(估銀八十萬兩) 洋貨庫兩間(五色大呢八百板 鴛鴦一百十板 五色羽緞六百餘板 五色嗶嘰二百餘板) 皮張庫一間(元狐十二張 各色狐一千五百張 貂皮八百餘張 雜皮五萬六千張) 磁器庫

一間(估銀一萬兩)錫器庫一間(共估銀六萬四千一百三十七兩)珍羞庫十六間
鐵梨紫檀器庫六間(八千六百餘件)玻璃器皿庫一間(八百餘件)貂皮女衣(六
百一十一件)貂皮男衣(八百零六件)雜皮男衣(八百零六件)雜皮女衣(四百三十
七件)棉夾單紗男衣(三千二百零八件)棉夾單紗女衣(二千一百零八件)貂帽
(五十四頂)貂蟒袍(三十七件)貂褂(四十八件)貂靴(一百二十雙)藥材房一間
(估銀五千兩)地畝八千餘頃(估銀八百萬兩)

外鈔劉馬二家人宅子。內外大小共一百八十二間。金銀古玩估銀三百六十八萬六
千兩。衣飾器皿估銀一百四十一萬三千兩。洋貨皮張綢緞估銀三萬兩。人參估銀四
萬兩。地畝六百餘頃。估銀六十萬兩。當舖四座。本銀一百二十萬兩。古玩舖四座。本銀
四萬兩。市房二十七所。契價銀二萬五千兩。

此表照庸庵筆記錄入。勃氏書中所列。則探自此表。而不完全。但其中。謂有玉屏一架。
高八尺。上刻明永樂帝之詩。及高宗詩。庚子年聯軍自宮中取去。現存紐約博物院內。
並謂此物慈禧所愛。自西安歸後。見已遺失。甚爲惋惜云云。乃庸庵筆記表內所無者。

勃氏附以語曰。但以已估値之二十六號而論。即可抵庚子年之賠款也。查抄事畢。帝乃不復追究。四月之後。有副都統薩彬圖者。上奏言查抄有遺漏。另有隱匿寄頓之處。又謂刑部查審時。司員等意存含混。應請密派大臣研鞫追究。云云。帝批諭謂其所聞不實。而此人又上一奏。堅主其說。似欲以此邀寵者。言向伊親戚處問出和珅家掌管金銀內帳使女四名。請交伊一人至慎刑司提訊。帝下諭曰。薩彬圖並非原派籍沒和珅之員。乃忽思越俎。欲以一人獨訊數女子。且開列使女之名。形之奏牘。達於朕前。實爲從來未有之事。朕若卽加駁飭。轉恐不足以服其心。是以特派怡親王永琅尙書布彥達賚同薩彬圖提集使女等再三究訊。仍無指實。果不出朕之所料。是薩彬圖無知妄瀆之罪。百喙難辭矣。朕所以辦理和珅者。原以其蠹國病民。專擅狂悖。和珅一日不除。則綱紀一日不肅。是以卽於正月初八日革職拏問。宣示罪狀。用申國憲。猶念其在皇考前拱掖奔走微勞。不忍肆諸市朝。節降諭旨甚明。自辦理此案後。軍機王大臣及大臣中如朱珪等。從未於朕前奏及和珅財產隱寄。乃薩彬圖屢以爲言。竟似利其私蓄者然。豈薩彬圖視朕爲好貨之主。敢以此嘗試乎。向來治罪之員。多有應行查鈔者。

況和坤獲罪重大。焉有不行鈔籍之理。自古有籍沒之例。所以懲戒貪黷。初不計多寡。而事株連。卽和坤家僕劉全呼什圖等。亦因平日倚恃和坤聲勢。橫肆不法。招搖受賄。不可不一併查抄治罪。朕方以辦理此案。爲日已久。已覺過當。是以諭令速結。不爲已甚。而無識之徒。鰓鰓計較和坤財產。不惟不知政體。實太不知仰體朕之本意矣。朕在藩邸時。則一切財用。猶有人己之別。今以天下爲家。豈僅以藏諸府庫者。視爲己有。此項查鈔貨物。縱有隱寄。自朕觀之。亦不過在天之下。地之上耳。何以展轉根求。近於搜括間陌錢等事耶。和坤旣以厚藏而亡其身。帝展覽查抄之物。至於一月始畢。定親王又查出朝珠一串。全係極大之東珠。帝甚愛之。卽收入宮中。此物爲審問時未查出者。帝又降一諭曰。正珠朝珠爲乘輿服用珍物。豈臣子所應收藏。若云貢獻所需。則繚繚何以皆用香色。其非豫備呈進明甚。因詢據縣恩。奏稱會訊之和坤家人。供稱和坤日間不敢帶用。往往於燈下無人時。私自懸掛。臨鏡徘徊。對影談笑。其語言聲息甚低。卽家人亦不得聞悉。此種情狀。竟有謀爲不軌之意。若此事敗露於正月十八日以前。卽不照叛逆凌遲處死。亦當予以大辟。今已賜令自盡。倖逃顯戮。姑免磔屍。至伊子豐紳

般德。若知有此物。不行舉發。卽當照大逆緣坐律辦理。今經縣恩等再四訊究。實不知情。著加恩免其追問。但不應仍叨世襲。伯爵豐紳殷德著革去伯爵。停其世襲。賞給散秩大臣銜。當差行走。縣恩淳穎縑布佶山能細心查出。使和坤逆蹟不至掩覆。辦理甚爲認真。均著交部議敘。

第七章 嘉慶朝

和坤當國。以貪侈爲天下倡。舉國靡然。相習成風。官常既墮。而禍亂起矣。嘉慶一代。吏習既不如前。而人才又遠遜之。各國人民之習尙。恆視在上爲轉移。而在中國家督政治之下。此風爲尤甚。故世運之隆汙。唯視其上之德耳。世之崇拜憲政者。若其國一有國會。而民德卽良。或政體一變共和。而民智卽進者。可謂狂瞽之見矣。立國之急務。莫如維持治安。使民樂其業。工商發達。而無搶劫之患。此則非有強固之政府。不能致之也。清室自乾隆以前。上有英武之君。驅使才智。振勵士習。故致天下太平。國勢強盛。至乾隆之季。僉壬當國。衰象始見。然使繼位者能如其先人之英武。而驅除僉壬。果出於整頓吏習之誠心。則振衰起頹。不過一轉移間耳。無如君才既遜。不能有挽回世運之

力。而其懲治貪相。又或出於報復歆羨之心。故清室自此衰矣。凡在上者。德性之學。毅與賞罰之公明。乃其最不可缺者。苟其缺之。則其政治斷不足以致昌明之域。清之仁宗。卽於二者有所不足者也。君德既已如是。所用之人。亦如之。故外象似仍如前。而隱微之間。衰亂已伏。粉飾太平。毫無振作之氣。朝野上下。成爲一種之痼疾矣。當乾隆之時。地方官有釀成變亂。或不能鎮壓者。立殺無赦。至嘉慶。則朝廷之威靈遜於昔矣。外吏恆擇其地之富貴者而魚肉之。以致民心不平。激成禍端。而變亂之起。又爲官吏邀功發財之機會。帝雖數下長諭。誥誡中外。然空言何益耶。在帝登位八年以前。自蓮教匪起事。漸次蔓延。糜亂四省之廣（川陝楚豫）至一千八百零七年（卽嘉慶十二年）始歸平靖。然國中元氣已大傷矣。至一千八百十二年。京中忽出一暗殺之案。其動機出於一種之秘密會黨。名爲天理教者。暗殺之人名成得。滿人也。在御膳房中爲廚役。當帝由宮至圓明園時。忽衝犯御駕。手執兇器。轎夫駭走。侍衛皆震驚失次。幸有一官策馬急前執之。此事極爲危險。帝疑和坤家人所使。欽派大臣嚴刑審問。堅不肯承。但云若予事成。汝等所坐之處。卽予坐處也。遂凌遲處死。未幾遲之先。縛其二子。當其前。

殺之。至次年。遂有林清之變。當時山東巡撫得屬吏稟言。在其地執得一人。供出屬於天理會中。謂成得亦會中之人。但巡撫畏事。不敢上聞。或謂亦係坤黨。與教匪通謀而行之者也。一千八百十三年（即嘉慶十八年九月十五日）林清密令其黨二百餘人。由宣武門潛入。各藏兵器。雜酒肆中。待日晡。則分犯東西華門。約太監劉得才及楊進忠等。分道引入。至期。東華門護軍以覺察較早。得閉關格拒。賊闖入者。僅十餘人。餘悉奔散。而入西華門者。八十餘賊。反關以拒官軍。叢集隆宗門。或手執白旗。登垣指揮。時皇次子立養心殿階下。發鳥槍連殪二賊。貝勒縣志亦續斃其一。羣賊始不敢踰垣。入諸王大臣聞警。先後率禁旅自神武門入衛。敗賊中和門外。踰二日一夜之力。搜捕叛黨。略盡。旋擒獲林清於黃村。帝自行在聞變。即日罷謁陵之典。自白潤回蹕。下諭曰。蘇寧縣愷奏本月十五日午刻。突有賊人擅入蒼震門。經總管太監擒獲。未刻內右門西又有賊匪越牆入內。蘇寧見事在倉卒。取進鳥槍撒袋腰刀。先用鎗將牆上一賊打斃。又有手執白旗之賊。在牆上指揮。復用槍擊斃。實出無奈大膽等語。蘇寧係內廷皇子。在上書房讀書。一聞有警。自用槍擊斃二賊。餘賊始紛紛潛匿。不敢上牆。實屬有膽。

有識。乃縣寧奏稱大膽無奈。詞語謹飭。殊覺過當。朕垂淚覽之。可嘉之至。筆不能宣。宮庭內地。奉有祖考神御。皇后現亦在宮。縣寧身先捍禦。獲保安全。實屬忠孝兼備。二阿哥著加恩封爲智親王。於皇子歲支分例加倍。歲給俸銀一萬二千兩。以示優獎。三阿哥縣愷。隨同捕賊。亦屬可嘉。朕於在廷臣工。有功必賞。今皇子能如此忠勇自效。豈容稍靳恩施。此大公之心。內外諸臣。當共知感知奮也。又諭軍機大臣等。本日申刻儀親王等。遞到剿辦賊匪事。已大定一摺。據訊取活賊供詞。賊匪共進禁城二百名。見所呈遞草單三紙內。細覈殲斃及活拏者共止三十一名。其餘賊匪一百六十九名。究竟作何下落。所奏殊不明晰。再成親王訊出賊供。地安門外尙有賊五百名。此項賊匪。此時是否伏而未動。抑係查有蹤跡。伊等見在如何辦法。摺內亦未提及。著儀親王等。卽速明白回奏。至摺內請將格布舍等六人留京。勦捕賊匪。事屬可行。內蘇爾慎。格布舍二人著速迎赴行在。朕面詢勦賊情形。其伊勒通阿等四人留京。責令幫同搜捕。俟朕回鑾後。再諭令一同馳赴軍營。又諭此次賊匪突入禁門。並敢潛匿膳房。王公大臣侍衛官兵人等。奮勇擒捕。實爲可嘉。內有在內右門以內擒獲賊匪者。功績最優。在禁城內

捕賊者次之。著託津等詳細查明。開單具奏。此內捕賊受傷身死者。列爲上等。其受傷重者。列爲二等。受傷輕者。列爲三等。無論侍衛官兵。卽家人閒散等。俱一律歸入等第。開單呈覽。候朕分別施恩。託津等務須秉公確查。不可稍徇情面。俟朕進宮後。再行呈遞。亦不爲遲。見在二阿哥躬親捕賊。忠孝可嘉。已施恩錫封智親王。著託津等啟知二阿哥。不必遠來謝恩。俟朕進宮時。在內東華門之內道旁碰頭謝恩。三阿哥四阿哥等。仍照常。在內接駕。又下罪己詔曰。朕以涼德。仰承皇考付託。兢兢業業。十有八年。不敢暇豫。卽位之初。白蓮教煽亂四省。黎民遭劫。慘不忍言。命將出師。八年始定。方期與吾赤子永樂昇平。忽於九月初六日。河南滑縣。又起天理教匪。由直隸長垣。至山東曹縣。亟命總督溫承惠。率兵勦辦。然此事究在千里之外。猝於九月十五日。變生肘腋。禍起蕭牆。天理教逆匪七十餘衆。犯禁門入大內。戕害兵役。進宮四賊。立卽網縛。有執旗上牆三賊。欲入養心門。皇次子親執烏槍。連斃二賊。貝勒蘇志續擊一賊。始行退下。大內平定。實皇次子之力也。隆宗門外諸王大臣。督率烏槍兵。竭二日一夜之力。勦捕搜拏。淨盡矣。我大清國一百七十年以來。定鼎燕京。列祖列宗。深仁厚澤。愛民如子。聖德仁

心。奚能縷述。朕雖未能仰紹愛民之實政。亦無害民之虐事。突遭此變。實不可解。總緣德涼愆積。惟自責耳。然變起一時。禍積有日。當今天弊在因循怠玩四字。實中外之所同。朕雖再三告誡。舌敝唇焦。奈諸臣未能領會。悠悠爲政。以致釀成漢唐宋明未有之事。較之明季梃擊一案。何啻倍蓰。思及此實不忍再言矣。予惟返躬修省。改過正心。上答天慈。下釋民怨。諸臣若願爲大清國之忠良。則當赤心爲國。竭力盡心。匡朕之咎。移民之俗。若自甘卑鄙。則當掛冠致仕。了此一身。切勿尸祿保位。益增朕罪。筆隨淚灑。通諭知之。亂黨計畫。本甚精密。但其首領仍不過草寇之行徑。卒被擒獲。所謂天理教者。與拳匪略同。皆有迷信之意味。其謀亂之宗旨。在傾覆皇室。改立新朝。而自稱爲天降之主。諺語謂清室不利閏八月。欽天監至奏改十八年閏八月於次年二月。故賊約定在十八年九月十五日起事也。當一千八百十二年之四月（卽嘉慶十七年）臺灣淡水知府曾獲一匪。亦係在其地布散叛亂之詞者。審出林清。並得其會中謀亂之情形。據以稟聞。而巡撫不敢上奏。禁門之變。前一日。盧溝橋巡檢偵知賊黨之謀。亦曾送一信與順天府尹。而府尹亦不敢奏聞。上下蒙蔽之情形如此。此變之所以遽作也。事定

之後。究出宮中太監通謀之迹。殊關緊要。可知宮內之敗象。帝降一諭曰。本年九月初六日。豫東交界地方。有亂民戕官滋事。拏獲匪犯。供係天理會邪教。並據同興奏稱。會內首逆林姓。又捏名劉林。在近京藏匿。正在降旨飭拏間。十五日忽有賊匪潛入紫禁城。持械逞兇。經王大臣及文武官兵協力圍捕。殲擒淨盡。嚴究首犯。據英和等選派番役於近京之宋家莊地方拏獲林清一犯。供稱前生姓劉。所有十五日潛入紫禁城賊匪。均由伊派撥屬實。該犯傳習邪教。糾衆謀逆。罪大惡極。今夥黨殲除。首逆旋即就獲。仰承天祖恩佑。欽感實深。除將該逆按律懲辦外。英和督拏要犯。剋日就擒。厥功甚鉅。著交部從優議敘。其原拏之官員番役人等。著英和分別等第。開單呈覽。候朕明日進宮。再降恩旨。又據託津等奏訊。據賊犯陳爽供出太監劉得財等夥同入教等語。覽奏實堪駭異。該犯等供役內廷。膽敢習教入夥。並聽從逆犯指揮。豫爲引路。實屬罪大惡極。著託津等將已獲各太監等。隔別嚴訊。務令將同夥之犯。逐一全行供出。勿令稍有狡飾隱匿。至該犯等以內監謀逆。悉當問以大逆。凌遲。該犯等家屬亦應緣坐。著英和等。卽刻按名查拏。此案入教各太監內。劉得財一名。係太監內入教傳徒首犯。情節尤

爲可惡。著留備廷訊。並再留情罪較重者一名。候朕親加嚴訊。盡法處治。帝之回京也。乘馬而行。使民見之。以鎮安人心。親訊叛徒。供出會中人數極衆。並其排滿之謀。帝但將擒獲諸人斬首。其餘概免深究。此會本名八卦教。北方諸省信從者頗衆。其會中儀式及以邪術惑人。與拳匪相仿。帝辦理此事既畢。又降一諭曰。本月十五日逆匪林清潛遣逆夥數十人突入禁城滋事一案。嚴訊見獲賊犯。據供太監內竟有逆賊六人。與謀引路。其引賊入東華門者。係劉得財。劉金二犯。引賊入西華門者。係張大高。廣幅二犯。又王福祿。閻進喜二犯在內。接應。續據南城御史緝獲賊夥林四。又究出楊進忠一犯。亦由西華門引賊入內。該逆賊等罪惡滔天。爲從來所未有。除高廣幅一犯於是日經官兵殲斃外。其劉得財等六犯。俱按名捕獲。無一漏網。連日軍機大臣會同刑部研究。本日朕親自廷訊。盡法處治。逆賊劉得財等堅供此外再無通同謀逆之人。復嚴詰首逆林清。亦堅供在內。同謀止此七人。更無餘黨。所有本日執事站班文武大小官員。人人聽聞供情。毫無疑義。卽將各該犯。凌遲處死。太監等充當差使。等級懸殊。凡近衛者。皆馴謹誠樸之人。此案逆賊七人。平日所當差使。俱極疏賤。從未見過。不知姓名。僅

於宮內看守門戶。從無一名曾隨赴御園者。宮中所留首領曉事者少。平日約束懈弛。聽伊等告假閒遊。致令交結外人。甚至如慶寧門馬駒橋等處數十里之外。任其恣意往還。聽從賊匪。糾約謀逆。以致釀成巨案。該首領等疏懈之罪。實無可辭。嗣後嚴諭總管首領太監等。俱不得任各處太監藉詞告假。獨自私出禁門。其有不得不暫時給假者。並著該首領太監查問確實。限以時刻。必須兩三人同行。方准放出。如違除本人治罪外。將該管首領太監一併治罪。至此數犯梟獍性成。本非常有。見在訊問明確。別無同黨。此外各太監等當感戴主恩。照常當差。安靜守法。不必心生畏異。儻有狡誦之徒。挾嫌誣扳。查明從重治罪。斷不寬及無辜。將此旨交總管內務府大臣轉交總管太監通諭各等處太監知之。並著載入宮史。又諭十月初六日爲朕壽辰。國家典禮。自初三至初九俱穿蟒袍補褂。正日御正大光明殿受賀。此定例也。今歲突遇此禍。若仍照常年典禮而行。朕實無顏受賀。況軍書交馳。邪氛未靖。尙有何心宴樂乎。非博虛名。實無暇也。向年俱進如意。卽日回賞。原上下聯情之意耳。今遇大不如意之事。豈可復行呈進。朕不見此物。轉覺心安。見物思名。益增煩悶。今酌省繁文。副予儆惕之念。諸王大臣

愛戴之忱。仍可得伸云云。當一千八百十六年。卽嘉慶二十一年。英國以廣東貿易受種種箝束。遣故印度總督亞墨爾斯使中國。觀此一事。亦可見中國之漸衰。及帝才識之不宏。其事之詳情。亞墨爾斯日記中已悉載之。茲不贅。在乾隆朝。馬戛爾尼至中國之時。高宗度量寬大。已免使臣叩拜之禮矣。而至此帝乃堅執不允。以致未成禮而退。嘉慶時之國勢。較乾隆時已遠不及。而其自尊自大之心。闇昧不明之見。反增於前。其能力愈弱。而其驕盈愈甚。觀帝之諭旨。可以見之矣。嘉慶二十一年秋七月乙卯。賜英吉利國王敕諭曰。爾國遠在重洋。輸誠慕化。前於乾隆五十八年先朝高宗純皇帝御極時。曾遣使航海來庭。維時爾國使臣恪恭成禮。不愆於儀。用能仰承恩寵。瞻覲筵宴。錫賚便蕃。本年爾國王復遣使齎奉表章。備進方物。朕念爾國王篤於恭順。深爲愉悅。循考舊典。爰飭百司。俟爾使臣至日。瞻覲宴賚。悉倣先朝之禮。舉行。爾使臣始達天津。朕飭派官吏在彼賜宴。詎爾使臣於謝宴時。卽不遵禮節。朕以遠國小臣。未嫺儀度。可從矜恕。特命大臣於爾使臣將次抵京之時。告以乾隆五十八年爾使臣行禮。悉跪叩如儀。此次豈容改易。爾使臣面告我大臣。以臨期遵行跪叩。不至愆儀。我大臣據以入

奏。朕乃降旨。有七月初七日。令爾使臣瞻覲。初八日。於正大光明殿。賜宴頒賞。再於同樂園。賜食。初九日。陛辭。並於是日。賜遊萬壽山。十一日。在太和門。頒賞。再赴禮部筵宴。十三日。遣行。其行禮日期儀節。我大臣俱已告知。爾使臣矣。初七日。瞻覲之期。爾使臣已至宮門。朕將御殿。爾正使忽稱急病。不能動履。朕以正使猝病。事或有之。因止。令副使入見。乃副使二人。亦同稱患病。其爲無禮。莫此之甚。朕不加深責。卽日遣令歸國。爾使臣既未瞻覲。則爾國王表文。亦不便進呈。仍由爾使臣齎回。但念爾國王數萬里外。奉表納贖。爾使臣不敬恭將事。代達悃忱。乃爾使臣之咎。爾國王恭順之心。朕實鑒之。特將貢物內。地理圖畫像山水人像。收納嘉爾誠心。卽同全收。並賜爾國王白玉如意一柄。翡翠玉朝珠一盤。大荷包二對。小荷包八個。以示懷柔。至爾距中華過遠。遣使遠涉。良非易事。且來使於中國禮儀。不能諳習。重勞唇舌。非所樂聞。天朝不寶遠物。凡爾國奇巧之器。亦不視爲珍異。爾國王其輯和爾人民。慎固爾疆土。無間遠邇。朕實嘉之。嗣後毋庸遣使遠來。徒煩跋涉。但能傾心效順。不必歲時來朝。始稱向化也。俾爾永遠。故茲敕諭。當時英國國事繁雜。有更重要於此事者。故不暇校。然中國政府欺謾驕盈。

之態。必有一日受其禍者。蓋英國國體所關。及英商在廣東所遇之苛待。決不能久忍。十七年之後。拿破爾至廣東。而中國之難期至矣。經歷流血及恥辱。中國人以天朝自居。而訾人爲夷狄之夢。乃始漸醒。觀當時之諭旨。及英國記載此事之書。則知中國朝廷及英之使臣。皆爲昏庸無識之大臣所欺罔。眼光如豆之官吏。勸帝堅執叩首之禮。使臣既不爲屈。則以爲失其體面。而於帝前進其誑言。對於使臣。亦僞造帝語以侵之。至於相持不下。則不問其事勢如何。但欲使臣之速去。以免其煩難。遂謂使臣對於朝廷。有不遜之處。應嚴懲之。故有前錄之上諭。然帝既降前諭。又自覺其處置之不當。使臣既歸。若有失國體者。又降諭責廷臣曰。此次英吉利國進貢使臣至天津海口登岸。特命蘇楞額廣惠傳旨賜宴。令其謝宴。行三跪九叩禮。如合式。卽日帶領來京。如不諳禮儀。具奏候旨。其原船勿令駕駛。仍由原路回津泛海還國。蘇楞額廣惠故違旨意。徑行帶來。又縱令原船私去。伊二人之咎在此。因事已不妥。又命和世泰穆克登額迎赴通州演禮。以七月初六日爲限。限內如儀。再行帶來。滿限尙未如儀。卽行參奏候旨。和世泰穆克登額於初五日含混具奏。初六日徑行帶來。朕於未初二刻御勤致殿召見。

伊二人先詢以演禮之事。伊二人免冠碰頭云。並未演禮。及至再問。以既未演禮。何不參奏。和世泰云。明日進見。必能如儀。此一節。伊二人之咎。已同前二人矣。至初七日早膳後。卯正二刻。朕傳旨升殿。召見來使。和世泰初次奏稱。不能快走。俟至門時再請。二次奏稱。正使病泄。少緩片刻。三次奏稱。正使病倒。不能進見。即諭以正使回寓。賞醫調治。令副使進見。四次奏稱。副使俱病。俟正使全愈後。一同進見。中國爲天下共主。豈有如此侮慢倨傲。甘心忍受之禮。是以降旨逐其使臣回國。不治重罪。仍命廣惠護送至廣東下船。近日召見廷臣。始知來使由通州直至朝房行走一夜。來使云。進見朝服在後。尙未趕到。便服焉能瞻謁大皇帝。此等情節。和世泰見面時。何不陳奏。卽或遺忘。或晚間補奏。或次日一早具奏。俱可。直至將次升殿。總未奏明情節。伊二人之罪。重於蘇楞額矣。若豫先奏明。必改期召見。成禮而返。不料庸臣誤事至此。朕實無顏下對臣工。惟躬自引咎耳。四人之罪。俟部議上時。再行處分。先將此旨通諭中外。及蒙古王公等知之。此事帝心甚爲不懌。數月之後。始漸忘焉。

第八章 道光朝

一千八百二十二年。仁宗觸電而崩。（按觸電之說不知何所據）宣宗卽位。其時清室已漸衰矣。內則叛亂踵起。外則強鄰逼迫。朝廷之威信漸替。軍隊之腐敗日甚。滿人既盡喪其樸厚強武之風。漢族亦浸移其尊仰愛戴之誠。內外官吏則貪賊納賄。愚懦卑鄙。官常墮地。士氣凌夷。而憂患中之矣。滿洲之入關也。漢人初亦視爲異族。但仍同爲亞洲之人。皆係黃色之種。且滿人雖以武力征服中國。而其言語文字宗教風俗則胥同化於漢族。故數百年相安而不覺。今之外患則不同矣。種族既迥異。其物質之文明。又在中國之上。且致力至爲滂薄。其處心積慮。至欲中國人放棄其固有之教。消滅其自尊之心。而歸服於西方之文化。故中國今日之禍。乃自古所未有者也。宣宗登基之時。年三十九。以一千八百十三年宮門之變觀之。帝之勇敢警敏。似可大有所爲。且帝自幼卽好武事。當一千七百九十年（卽乾隆五十四年）之時。帝年只九歲。隨其祖父狩於熱河。射無不中。高宗大喜。以黃坎肩賜之。故卽位之後。羣望其能強中國。然此時官吏之積習已深。國中之衰象已呈。殊難挽回。而大臣中尤無任重之人。綜帝在位三十年。只能謂其非荒淫之主耳。其後二十年中。帝以國政一委之於大臣二人。其

一爲滿人穆彰阿。其一爲漢人杜受田。國事愈壞。至鴉片之戰。而中國之弱象。不可掩矣。且以官吏之貪縱。激起百姓之不平。洪秀全乘之以起。致成大亂。以所任者。非其人也。帝性節儉。而厭羣臣之進言。在位時。銳意革除內務府之積弊。杜受田者。皇子之師傅也。帝嘗厭羣臣之進言。問杜以何法禁止之。杜請帝凡進言者。不問其所言如何。但挑剔其奏中格式之失。字體之誤。交吏部議處。則言者苦之。封奏自稀。且使臣下見帝於此等小節。尙不肯稍貸。若犯忌諱之大者。被罪必更深矣。如此則無禁遏言路之名。而言路自然結舌。帝從之。果大效。於是上下壅蔽。政府恣行其奸。而不慮言官之發其覆。帝受杜之欺罔。而反以爲忠。杜之柔奸。殊可畏也。殿試專憑楷法之弊。亦自杜開之。自此士氣愈銷。人才愈敗。而國事亦愈棘矣。今舉一事。以見道光末年官場之情形。下所錄之匿名書。乃時人致於大學士曹正鏞（譯音）者也。書曰。汝欲得志於宦途乎。第一須有內援。賄賂之費。尤不可吝。態度須極圓和。遇事不可承當。凡事均勿認真。不可有立功之心。亦不可自以爲忠。遇有困難。則取巧規避。最要者。爲模稜二字。切勿妄發議論。亦勿固執己見。對於同僚。謙柔爲上。見有舞弊之事。須包含勿言。但亦不可恭

維太過。須視官缺爲己之收成。勿存爲國辦事之心。如此則必可積資至大學士。妻子皆博封蔭。死後卽不能得文正之謚。亦可得文恭文恪之名矣。又有人問曹正鏞做官之訣。曹答曰。多叩頭。遇事勿出主見。卽此二言。亦可見其時官吏卑鄙模稜之習矣。曹爲當時大臣。雖亦囿於積習。不能矯正其弊。尙不失其清廉之官。其家中恃販鹽爲生。所販之鹽。向不納稅。後因兵事既起。餉項支絀。查稅轉嚴。曹謂地方官曰。汝可盡汝之職。嚴查漏稅。勿因子家而徇情。予現爲大學士。諒不至於飢餓而死也。觀國史所載帝節儉之德。亦不可及。至暮年尤甚。宮中膳品。雖沿舊例。然帝或思食一物。而知其價甚昂。則止而不索。慈禧太后雖亦有儉約之性。然以快樂爲主。帝則大不同也。當帝之時。宮中用度。每歲只二十萬。內務府之大臣司員太監等進項爲之大減。咸出怨言。用其技倆以抗違帝旨。一日帝偶思食粉湯。命依所言之製法製之。內務府上言若依此製法。須另蓋一廚房。專人司之。須經費六萬兩。常年費尙須一萬五千兩。帝攢眉曰。朕知前門外有一飯館。能做此湯。每碗只售四十文耳。每日可命太監往購之。踰數日。內務府復上言。前門外之飯館已關閉。帝嘆曰。朕向不爲口腹之欲。濫費國帑。但朕貴爲天

子而思食一湯不能得。可嘆也。其時外患漸逼。帝深憂之。但先帝之驕盈。已貽禍根。而帝之才力亦不足。且昧於世界大勢。遂有鴉片之戰。喪師辱國。割香港於英。賠款巨萬。其事今不具述。此次戰事至今英國人猶多譏論。謂爲鴉片戰爭。有人將其事與今日中國之禁煙相連並論。然當時中國政府及兩廣總督不過出於排外之見。並非爲正義而戰也。其時中國人以通商與鴉片併爲一事。而不分別。朝中分二黨。其一黨之首領爲穆彰阿。乃主持任外國人通商及鴉片之入口者。其一黨則主持與外國人絕。不獨禁止鴉片。卽通商亦不許。將外人皆驅逐之。林則徐爲兩廣總督。乃主戰最力之人。因其態度之驕。及行事之野蠻。使英人不能忍耐。（按此書出於外人之口。持論固應如是。閱者當分別觀之。）今錄其致英國女主維多利亞一書。雖不過寥寥數行。其詞氣非常尊大。殊不似上友邦君主之書也。書曰。汝海外夷人。敢於侵侮天朝。實屬罪不容誅。今姑先予警告。如能悔罪輸誠。尙可曲宥。否則大兵所至。汝區區三島。立成灰燼矣。（按查之林文忠公政書未見此書。今姑依其意譯之。）林則徐毀滅英艦之策。可謂失計之尤。當時主和與主戰二派相爭甚烈。其時之舊黨與今日維新之士相同。恃其

虛僑之氣。夸大之論。謂可戰勝強敵。羣詆穆彰阿之辱國。其中亦有極忠直者。但苦於不明事勢耳。亦有勇烈之士。如鎮江統帶駐防之副都統海齡。力戰不支而殉之。自吾儕外人視之。其死殊可不必。而彼則自盡其節。此中國孔教之道德也。當一千八百四十一年之初。（卽道光二十年）帝之主見甚不定。其後乃從林則徐之言。主戰。降諭令中國人將外人驅逐。與庚子年之事略同。數月之後。舟山寧波相繼失陷。主和之議遂勝。而南京之條約以定。今舉一事。以見當時之忠臣。其愚可憐。而其誠不可沒也。王鼎者。其時之軍機大臣也。性忠直。壹意主戰。數於朝中斥穆彰阿爲秦檜。謂與夷狄議和。乃國家之奇恥。言穆彰阿與林則徐有私恨。故毀林於帝前。帝不察而革林之職。爲朝廷失政之最大者。在殿上抗爭不屈。帝怒拂袖而起。王亦前執帝衣。力申其說。帝不顧而入。王退。草遺奏請誅穆。遂自經。此忠臣竟殉其錯誤之見而死矣。觀此可知當時北京之情形。有非吾輩夢想所能到者。王死後次日之晨。軍機章京陳孚恩者。亦穆彰阿之黨。見王未到。甚異之。辦理公事畢。往王宅探之。入室見王尸尙懸而未解。蓋中國大臣自經。其家人不敢遽解。須奏聞奉旨後始敢解也。其子以遺摺與陳某觀之。陳曰。

昨日上怒甚。若復進此遺摺。將愈觸上之怒。其事且不可測。汝父身後之榮。必無望矣。汝亦不得好處。以予觀之。此摺不上爲是。時又有一人至。亦穆黨所言與陳同。王之子遂請陳孚恩另作一遺摺上之。謂忽得心疾云云。帝閱之頗爲惻然。賜卹甚優。陳孚恩攜王遺摺與穆觀之。穆大驚拜謝。陳因此升遷極速。不十年遂至尙書也。中國人極信報應之理。謂祖父有罪。或報於其子孫。穆死後。子孫習入下流。其孫以唱青衣著名。遂爲優伶。轟傳一時。人謂此乃穆主持和議。陷害清流之報也。王之子冀得榮典。改其父之遺摺。使其父之忠誠沒而不彰。人皆鄙之。但其時中國屢敗。穆恐英兵直犯北京。故急議和。自王死後。軍機中雖尙有一人持異議。但不如王之堅毅。條約遂定。進呈後。帝閱之。徘徊於廊下。直至夜分。從者時聞帝嘆息之聲。或自語曰。不可。不可。夜三鐘。忽頓足。攜約款入殿。以硃筆批准。收入封筒。命太監送至軍機處。太監言此時宮門尙閉。軍機均未入朝。帝命其在軍機處等候。俟穆彰阿入卽授之。勿令人見。蓋帝雖批准條約。乃茹苦含恨。不得已而爲之。此中國朝廷第一次受歐洲之逼迫也。當一千八百四十年。英艦圍攻廣州。旣而北上。襲據舟山。朝廷革林則徐職。任琦善爲欽差大臣。(或言

琦善卽瑞澂之祖。當辛亥革命時，瑞澂失守武昌而逃死於上海。琦善主持和議，許以香港、易舟山。帝聞之怒，奪琦善大學士，不允其議。琦善狼狽甚，乃飾美女、列珍珠、盛饗英使，義律冀遷延時日。圖轉圜。義律知事已中變，復攻虎門。琦善奏言：地理則無要可扼，軍械則無利可恃，兵力不固，民情不堅。若與交鋒，實無把握。不如暫示羈縻云云。帝不聽。卒致連失要地，被逼而訂南京條約。辱國更甚。一如琦善之所言焉。道光末年，國中亂象已成。然戡亂之人此時已立於朝中。其後輔佐偉大之慈禧太后，重整乾坤。使清室危而復安。則曾國藩是也。有一故實，雖不知其真僞，而甚有趣。今錄於下。可以見中國人迷信讖言之深。相傳道光末年，帝有一日，以內亂外患相逼而至，甚爲憂慮。至夜夢都城爲賊所入，直至御座之側，欲犯之。侍衛星散，旁無一人。正危急時，忽見一人自外入，驅逐羣賊。出帝於險。帝大悅。方欲問之，忽驚醒。帝亦不與人言。但以此夢默存於心。夢中之人，狀貌猶能記憶。後二年，新科翰林朝見，中有一人與夢中所見無異。觀其名，卽曾國藩也。於是簡在帝心，不次升擢。其後曾果削平大亂。如帝之夢也。又有一故實，亦不知其真否，並錄於下。可知帝信任穆彰阿之深。與穆在當時之勢力相傳。

曾國藩得翰林後。穆深契其才。有一日帝與穆語及翰苑中之人才。穆舉曾。謂其留心時務。熟悉掌故。可備大用。退而告曾。數日後帝遂召見國藩於圓明園。既遞牌。太監引至一室內坐候。至晚竟無消息。但有一內侍口傳上旨。命曾明日再來。曾心訝之。徑至穆宅問其故。穆初聞亦茫然。既而忽悟。問曾曰。汝坐候之室內。曾見壁上懸有字畫乎。曾言懸有字畫。但念念在召見之事。未曾閱視。穆頓足曰。此事大壞。予試爲汝圖之。卽召一親信之僕。至付以四百金。命其入宮賄賂太監。將會坐候室內所懸之字畫悉抄來。而留曾宿以候之。至夜半果抄至。皆先朝垂訓爲政之道。及誥戒臣下之語。中有言及當時之事與人者。非爛熟掌故者不能知之。帝蓋欲以此試曾。而驗穆所舉之當否也。穆謂曾曰。可熟讀之。結主知而建功業。在此舉矣。次日召見。踰時始下。帝所問皆出其中。曾應對如響。大稱帝旨。由此遂駁駁大用焉。帝崩。皇四子卽位。是爲文宗。文宗在清代諸帝中最多失德。中國人記載中言帝所以得立之故。其事如確。可見人用其聰明於一極小之事。乃可挽回人主之意。而定億兆人之命運。亦甚奇也。蓋道光末年。宣宗本欲傳位於恭王。恭王之才德實過於帝。乃宣宗所最鍾愛者。帝師傅杜受田欲換

其意以博帝之寵。有一日宣宗命諸皇子於南苑行獵。舊例皇子有事不至上書房。應在師傅前請假。是日杜受田獨坐上書房中。見皇四子來。揖告請假行獵之事。杜聞之。密語皇四子曰。阿哥。予有一言。須謹記之。今日至南苑。勿射殺一獸。可在旁看諸兄弟行獵。亦勿令從人張網。事畢。皇上若問。卽答言。方春萬物發生。禽獸孳育之時。不忍傷害。予知皇上性情。依此回答。必深合帝意。此爲阿哥一生大業之基。切記予言。勿與諸兄弟爭獲多寡也。皇四子果如所囑。是日恭王所獲最多。極有興致。見皇四子毫無所得。問何故不射。皇四子答曰。予今日體偶不舒耳。及獵畢。見帝諸皇子無論多寡。皆有所得。唯皇四子獨無。帝問之。皇四子遂依其師傅所囑而答。帝果大悅。謂有人君之度。自此而大位定矣。後咸豐年。杜受田遂升協辦大學士。尙擬加以殊恩。不幸未久而死。帝大痛悼。親臨奠祭。賜卹隆重。以社稷之重。而施此小術以得之。其事甚怪。然國家亦自是愈衰矣。

第九章 咸同一朝

自西歷一千八百五十一年。文宗卽位。至一千九百零八年。慈禧太后崩。其間宮府之

事已述之於慈禧外紀中。此後所述。乃補外紀所不及者。尤注重於宮庭之情形。觀咸豐同治兩代之君。則滿洲之國運。固已定矣。咸豐帝卽位時。年十九歲。以好色之故。身體甚弱。終帝之世。國家皆在內亂之中。其後藉外人之助。始得平定。（勃氏西人其言。固應如此閱者辨之。）又因與英法構兵。北京爲外兵所據。圓明園被焚。帝走熱河。遂崩於外。清代都城失陷兩次。此其第一次也。二百年之精華。至此而耗。當咸豐初年。洪秀全已破南京。僭稱帝號。朝中忠愛之臣。皆以帝之失德。及任人不當爲憂。各省匪亂已熾。而帝猶荒於色。信任奸邪之肅順。羅馬已焚。其尼羅方奏樂而跳舞也。相傳有一故事。乃甚可靠者。今述之於下。可見當國事危亟之時。而帝猶汲汲於女色。當明之亡。李自成將逼北京。其朝廷之昏昧如故。太監之擅權如故。今雖不及其甚。亦頗類之也。自乾隆末年。和珅當國。習爲奢侈蒙蔽之風。太監之權已暗滋長。雖其滋長甚遲。而實日增一日也。西歷一千八百五十三年之春。卽咸豐三年。爲選擇秀女之期。內務府會同太監造冊竣。引應選諸女入見。天尙未明。皆候於坤寧宮外。中有一女。母已喪。其父爲一武職姓端。年已六十餘矣。唯此一女。恃其十指爲活。苟被選中。則必窮餓以死。然

其名已入選冊。無可避免。故此女入宮時。既悲永離。又傷其父之無依。痛不欲生。恰於是日南京失陷之報至。言官章奏交上。帝不得不召見軍機會議。無暇顧及選擇之事。及議畢而日已暮矣。諸女鵠候一日。不得食飲。多哭失聲。太監叱曰。不許哭泣。聖駕將至。汝等如此膽大。不怕鞭子麼。衆皆戰慄。無敢回言者。唯無母之女厲聲答曰。予等離家而至宮中。若被選中。卽同幽禁。不能再與家人相見。稍有人心者。能不痛乎。今南京失陷。天下已失其半。皇上不於此時寤寐選求良將。以平禍亂。而反荒於女色。使羣無罪之女子。永別其父母。而幽禁宮中。以供一人之娛樂。不顧祖宗創業之艱難。予恐粵匪將入宮庭。宗廟不血食矣。予死尙不畏。豈懼鞭責哉。太監見其言毫無顧忌。大懼。欲閉其口。而帝適至。乃縛此女之手。使跪帝前。女不肯跪。雖見帝至。亦不懼。此女末後數語。帝已聞之。霽顏問其故。女乃將前語覆述一過。帝聞非但不怒。且喜曰。汝可謂巾幗中之英雄矣。命太監釋其縛。引至皇后處朝見。其後帝爲此女擇配。有一宗室貴爵適喪其室。遂以配之。此女之父。非獨免於窮餓。而反得榮矣。蓋滿洲舊制。近支王公婚嫁之事。多由內廷主之。記者言此女之結果如是。不知信否也。（按王湘綺集中曾記此

事但繫於咸豐九年之冬所述亦有微異。咸豐初年朝中分君子小人二黨。小人之黨以肅順爲首。導帝以淫樂。雖帝性本不正。而肅順更盡惑之。於是帝之身體日以羸弱。常在宮中宴飲達旦。至次日早朝之時不能支持。兩股顫動。有時郊祀大典亦不能親詣。其時與肅順對抗者爲大學士柏蔭。人極正直。常進諍言於帝前。肅順與怡鄭二王謀害之。借科場之事興起大獄。柏蔭被殺。肅順遂專朝政。直至帝崩後。慈禧太后乃誅之。觀於此案可見其時之朝政。外飾美名而中藏奸險之情形。且可見中國朝廷對於士子登進之途。視之極重。立法極嚴。若發覺賄賂請託之弊。立誅無赦。雖朝政昏亂之時。而於此猶謹守不替。故寒微之士可以無所憑藉。而致身通顯。此中國最善之法。所以維持其數千年之文明而不墜者也。洪秀全佔據金陵之時亦曾舉行此制。今將咸豐年科場之案記錄於下。咸豐八年順天鄉試主考爲大學士柏蔭。尙書朱鳳標。左副都御史程庭柱。榜既發。有旗籍滿洲平齡中式在前十名。平齡嫺曲調。曾在戲院登臺演戲。於是議論譁然。謂優伶亦得中高魁矣。御史孟傳金在煤市街酒館中宴客。適平齡同諸優伶亦在隔座。聞平齡大聲談論曰。予以前亦同你們一樣。爲人輕視。自中

舉人後。人皆改容致敬。你們如想中舉。下科我可以設法。使你們亦變成舉人。孟傳金陰查問。知爲平齡。候其半醉之時。入至隔座。謂平齡曰。予與足下。本有世誼。予因下第。甚爲懊惱。頃聞高論。不知下科有何法。可以必中。時平齡已醉。遂將己陰事盡告之。次日孟遂揭參。帝大怒。命禮部調平齡試卷閱看。親出題召平齡於殿廷覆試。其弊既露。於是主試諸人及平齡皆拿交刑部審問。肅順爲刑部尙書。與柏葑本有隙。欲藉此與大獄。案既上。帝以柏葑老成宿望。此次不過失察。欲待以不死。肅順與怡鄭二王力持。言取士大典。關係至重。亟宜執法。以懲積習。遂召諸王大臣諭以不得已用刑之故。諭曰。本日據載垣等奏會審科場案內。已革大員。並已革職員。定擬罪名。先行擬結一摺。朕詳加披覽。反復審定。有不能不爲在廷諸臣明白宣示者。科場爲掄才大典。交通舞弊。定例綦嚴。自來典試大小諸臣。從無敢以身試法。輕犯刑章者。不意柏葑以一品大員。乃孤恩藐法。至於如是。柏葑身任大學士。在內廷行走有年。曾任內務府大臣。軍機大臣。且係科甲進身。豈不知科場定例。竟以家人斬祥求請。輒卽撤換試卷。若使斬祥尙在。加以夾訊。何難盡情吐露。既有成憲可循。朕卽不爲已甚。但就所供情節。詳加審

覈情雖可原。法難寬宥。言念及此。不禁垂淚。柏葭著照王大臣所擬。卽行處斬。派肅順趙光前赴市曹監視行刑。已革編修浦安已革舉人羅鴻繹已革主事李鶴齡均著照例斬決。以昭炯戒。副考官戶部尙書朱鳳標於柏葭撤換試卷。闈中並未查詢。出場後又不卽行參奏。若照舊例辦理。知情徇隱。卽應治罪。卽止於失察。亦應研訊。惟閱其供詞。尙無知情情弊。諒朱鳳標亦不敢公然徇縱。從寬卽行革職。同考官降調編修鄒石麟爲已革舉人平齡更換硃卷。實屬違例。著革職永不敘用。其磨勘查出試卷應行查辦之舉人余汝偕等十三人。並同考官徐桐鍾琇涂覺綱何福咸對讀官鮑應鳴應得處分。著交禮部查照科場條例定擬具奏。至墨卷內更改馬丞字樣。（是科詩題爲賦得萬竿烟雨綠相招得丞字五言八韻本係唐人馬丞詩句。場中士子多誤爲王右丞）是否由外簾傳遞之處。著原派之監臨明白回奏。另片奏催未經到案之謝森墀熊元培李旦華等三名。著江蘇巡撫卽行派員速解來京歸案審訊。嗣後科場大典。秉文衡者皆當潔己虛懷。杜絕干請。應試士子亦各宜立品自愛。毋蹈夤緣覆轍。則朕此次執法嚴懲。正爲士林維持風氣。爾在廷諸臣當能默喻朕衷也。殺柏葭之日。柏葭同其

餘處斬諸人至菜市口等候最後之諭旨。柏葭照例穿玄青外掛帽綴紅纓。遙對宮門謝恩畢。對其子曰。皇上必有恩旨。不過命予至此。以示警戒之意。赦旨一到。予卽至某寺預備出口之事。汝可回家料理路上用物。言甫畢。見監斬官趙光至。眼已哭腫。柏葭知無望。曰。皇上天恩。殺我必非本意。予爲肅順所陷。以至於此。然不久肅順亦必如我之收場。汝等可拭目觀之。乃對行刑者微點其首。行刑者屈一膝稟曰。奴才當以最好之刀送大人升天。一斫頭卽落地。當斬柏葭諭旨點朱之時。趙光見帝遲疑半晌。不忍下筆。曰。法雖如此。情尙可原。肅順在旁對曰。照律論無可赦免。帝仍遲疑不決。其後以筆交與肅順。肅順乃代帝勾之。趙光不覺痛哭。兩年以後。肅順亦在柏葭被害之地而死。柏葭之死。北京人無不悲之。肅順之死。則人胥稱快。肅順死時。正當大喪期內。故穿一白麻布袍。從順治門坐車出。是日大風。灰塵滿面。下車時已癡軟。睿親王暨斬。肅順對睿親王言未畢。劊子卽按令跪立。斬之。觀者無不拍掌。劊子卽前殺柏葭之人也。肅順家人無一人在前者。當肅順交刑部時。其子往視之。爲守者所揮斥。蓋其結怨於人深矣。凡大臣處決。劊子得賄。必先以利刃刺其心。則斬首時不知痛苦。且預備面盆。

手巾。斬畢拭淨。以線縫合。肅順之死。則皆無之。犬來吮其頸血。頭懸數日。其同黨怡鄭二王。均賜自盡。怡王對其家人言。身後殮葬及處分家產之事。死時穿白絲袍。云所畫影像亦須素服。鄭王亦對其家人有言。但戰慄不能成聲。以白綢爲環。下置低几。侍者扶二王登几。以帛套頸而撤其几。二王家人則環哭於旁。怡王不久氣絕。鄭王身肥重。帛斷墮地。第二次又上始絕。宗人府之人。乘機向二王家人索賄萬金。始得移尸成殮。一千八百六十一年八月。卽咸豐十一年。帝崩於熱河行在。年三十一。傳位嗣子。年只六歲。兩宮太后垂簾聽政。有恭王文祥夾輔於內。曾左李諸人効力於外。故內亂漸定。治平復觀。同治一代之政治。皆在慈禧太后訓政之下。及帝親政。踰二年而遂崩。帝爲慈禧親生之子。其不致謀奪慈禧之權必矣。然慈禧心猶不安。縱帝游蕩。卽非縱之。實亦未加禁阻。以致帝因此得病。早年而夭。此後予所記之事。乃自一老年太監日記中取錄。此監乃慈禧崩後出宮者。觀其日記。可知同治時宮庭之情形。而於帝大婚之事。記載尤詳。其中言同治帝未大婚之前。恆微服至前門外娼寮中遊行。有周姓太監引誘之。因宮中門禁極嚴。乃於西邊闢一便門。以爲出入。周太監之車恆候於此。其駕車

之驟極佳。車行甚速。帝微行之事。京中人皆知之。通宵在外。有時召見軍機之時。已過猶未回宮。白日亦常至琉璃廠購買淫畫。慈禧寵愛之太監安得海。帝甚惡之。自幼卽不喜肅順。因肅順常恐嚇帝也。至大婚之年。崇綺之女與鳳秀之女俱選入宮。崇綺女年十九。慈安愛其端莊謹默。動必以禮。欲立之。鳳秀女年十四。慈禧愛其姿性敏慧。容儀婉麗。欲立之。兩宮意各有所屬。相持未決。慈禧乃召帝俾自定之。以爲帝必順己之意也。不料帝竟如慈安旨。於是遂立崇綺女爲中宮皇后。而封鳳秀女爲慧妃。（慧妃在一千九百零九年慈禧太后梓宮奉安時。心懷忿恨。託於悲傷。在東陵不肯回宮。隆裕太后設法勸解。許其增進位號。添加俸金。始回宮。）大婚之夕。后應對稱旨。帝甚悅。慈禧常諭帝曰。慧妃聰明賢慧。雖屈在妃位。宜加眷遇。皇后年少。未嫺宮中禮節。宜使時時學習。汝毋得輒至中宮。致妨政務。慈禧禁帝與后親近。而常命李蓮英負慧妃至帝宮中。照舊制。凡皇帝召幸妃嬪。必使太監蒙其首。持被匍匐牀下。應召之妃裸身入被中。包蓋嚴密。太監負於背以行。置之御榻。急趨而出。其定此制者。所以防非常也。慈禧之意。蓋欲慧妃生一皇子。以擯斥皇后。但帝不喜此妃。恆避之。因慈禧干預其房闈。

之事故常至外城游蕩。卽居宮中。亦獨宿乾清宮內。及帝病。慈禧責罵皇后。峻帝不孝。帝崩。后痛不欲生。日夜悲傷。目盡腫。有一日后。父崇綺入宮視之。有人聞崇綺謂后曰。皇后如此苦痛。歲月甚長。何以爲生。不如從大行皇帝於地下之爲愈也。崇綺去後。后卽以身殉。人謂崇綺深知慈禧意旨。故以鴉片烟膏進后。后遂取以自盡焉。（按毅皇后之殉節。人皆知其係斷食而崩。此云崇綺進鴉片云云。恐不確）蓋崇綺知后若生有皇子。則其事至爲難處。將生非常之變。而已之家族且破也。（按勃氏所著書內。恆謂毅皇后有身。不知其何所據。想傳聞之誤也）西歷一千八百六十一年。文宗崩後。慈禧以其聰明剛決之政治。又得曾左李諸人爲將。遂得平定匪亂。自金田倡亂以來。已歷十三年之久。糜爛十餘省之廣。死亡者不可數計。至是始得定焉。蓋至咸豐六年以後。粵匪內鬩。勢已中衰。其初尙有大志。後則專事搶劫。擾亂爲無紀律之強盜而已。中國人之起事者。大抵但有破壞之力。而無建設之能。奸淫搶劫。民黨與官軍無異。當時粵匪如此。卽清末之革命軍。亦何莫非然。英將戈登與官軍聯合以擊粵匪。常與中國將官齟齬。蓋戈登將軍每勸官軍不可傷害無辜之百姓。故與彼等不合也。然粵匪

中亦未嘗無人懷抱大志而與羣匪不同者。卽如忠王李秀成。卽矯然特異。此下所錄。乃取於中國人筆記中。載秀成之事者。蓋太平軍末年。全恃秀成一人支持殘局。及秀成死。而太平之運終矣。太平軍初年之得勢。及其建設政府。秀成皆與有力。其善戰之才。及其居心之慈善。皆足使人感念。不獨其兵戴之。卽江蘇省之百姓。亦皆愛之也。凡秀成所到之地。皆不許騷擾百姓。持法甚嚴。常言兵須有一定之餉。不可縱令搶劫。如有犯者。必殺無赦。秀成雖武勇絕倫。而兼有文雅之風。不愧稱爲名將。且粵匪遇佛像卽毀滅。而秀成不然。其部下戰死之兵。必厚卹其家屬。至七月中元。則延僧超度。親詣上香。以安死者之魂。守蘇州日。官軍與戈登將軍圍攻甚急。軍食已竭。然以秀成平日之恩信。其兵均無叛志。命人至南京求救。爲官軍所獲。官軍將官因敬秀成之爲人。故其後常以秀成求救之書與人觀看。書曰。予發書之時。城內糧已絕矣。竈冷煙消。羅掘俱盡。兵士至食人肉。有母賣其子者。然予不欲敵人窺知吾軍飢困之狀。每至食時。皆大呼飯已齊備。實則無飯。不過以欺敵人耳。今吾軍處於圍城。如鼉處壘。如虎在檻。陛下建都金陵。蘇州乃其屏蔽。唇亡則齒寒。蘇州若破。則金陵亦不保矣。祈陛下速派大

軍來解城圍。予自前敵陣地暫抽片刻之暇。立書數語。唯誠心祈禱陛下之平安云云。其後秀成自蘇州逃出。復入金陵。次年金陵又破。秀成挾洪秀全之子福瑱逸出。唯帶一從者。以福瑱不能騎馬。故不久即散失。秀成與其從者黑夜中走失道。至天明則在一山上。森林中遇樵採者。中有一人識其面。稱爲忠王。秀成請其勿報官軍。若能引導至浙江之湖州。當謝銀三千兩。樵者允之。遂同下山。至樵者家中。因李所帶珠寶甚夥。且以一騾背負金條。故行路遲延。久而始至。樵者勸秀成薙髮。以免官軍之辨識。秀成不肯。曰。予爲太平天國之臣。國雖破。君雖亡。予志不可奪。若不幸爲官軍所獲。則予之運命固自知之。然欲予薙髮以求免。則非予所願也。樵者中有一人姓姚。性巧而貪。欲執秀成得賞。以秀成從人忠勇畏之。乃潛詣官軍。蕭統領孚泗營中。告於蕭之親隨。其親隨立往告蕭。蕭聞之。命留姚。款以酒食。派馬隊數百往該村執秀成。以歸。盡收其珍寶。欲殺姚以爲己功。姚逸去。但衆樵者惡姚賣秀成。終殺之。蕭遂因此封爵。蕭所派往執秀成之人。亦爲衆樵夫刺殺數人。取其頭以祭秀成。事爲曾國藩所聞。命解衆樵夫至南京。親加訊問。皆直供不諱。國藩稱其忠。賞以物。不得已而後受之。中國之記此事。

者。深惜此樵夫數人不知其姓名也。此下所記之一故事。乃南京圍城中一段風流之案。九洑洲者。南京之鎖鑰也。洪秀全以重兵守之。此洲一日不破。則南京一日不克。既得此洲。則南京亦不能守矣。初洪秀全既據南京。曾舉行考試二次。有蒲蔭奇（譯音）者。高魁第三。貌甚美麗。自稱爲陳平復生。嘗殿試時。天王之幼妹名宣嬌。於簾內窺見之心動。蒲之得高魁者。宣嬌之力也。榜發後。進見秀全。秀全曰。汝當往謝聖妹。命太監引見。宣嬌蒲見女跪謝。女曰。此後予等可常見。且當啟奏天王。授汝以美職。蒲不久遂得高官。潛與女通。女本有夫。名蕭朝貴。雖甚怒。亦無如之何。時東王楊秀清後宮衆多。中有一女本出土族。美而能文。亦潛與蒲通。常邀入內室。外間漸知之。宣嬌聞之甚怒。然以東王權重。隱忍不敢發。由是蒲遂周旋於兩美之間。久而厭怠。又見賊勢已衰。遂爲逃遁之計。既而乘間逸出。爲官軍所執。蒲言予有機密事求見。因啟告主將曰。城賊所恃。全在九洑洲。文報糧餉均由此通。九洑洲不破。則城終不能克。賊雖以重兵守之。予知其布置疎密之處。官軍若併力攻其瑕。則得之如反掌耳。此地一得。則城賊接濟立斷。如籠中鼠矣。官軍從之。遂克南京。而保蒲以游擊之職焉。

第十章 光緒朝

清德宗一生皆在慈禧覆翼之下。即自一千八百八十九年（即光緒十五年）至一千八百九十八年（即光緒二十四年）慈禧撤簾之時。帝亦不能行其志。蓋斯時慈禧雖退居頤和園。然朝中大事。帝與大臣皆知必須稟白而後行。中外要職。皆慈禧任用之人。黜陟賞罰之柄。帝無與焉。故官吏皆趨承太后意旨。視帝蔑如。尚不及其視李蓮英之重也。除百日變法之外。帝未嘗能伸其志。唯在其最短之時間。得張蔭桓等諸臣之助。謀脫離太后之束縛。毅然獨斷。然其事早知不成。蓋帝欲破除朝中積弊之窟。反對者衆。勢固徒勞而無益也。中日未開戰前。當西歷一千八百九十四年之正月。即光緒二十年。帝見吏習日敗。李蓮英納賄賣缺。特太后爲護符。使國事不能整頓。甚爲憤懣。士大夫之守正者。亦多疾之時。上海道聶緝渠方升任臬司。其遺缺軍機照例呈上名單。請帝簡任。帝不語。於袖中出一紙。上書魯伯陽三字。命軍機察其履歷。軍機退。徧察無此人。又命吏禮二部尙書檢察。軍機知此人爲慈禧授意。乃奏曰。皇上既知此人。可以不用檢察。即以特旨補之。若查出於例不合。反有礙矣。帝歎息。命即降旨授之。此一

事也。又有滿人玉崑者。木廠中之管事也。以入賞得同知銜。旋捐道員。適四川鹽茶道缺出。玉崑在李蓮英處運動。得授斯缺。召見。帝問其向在何處當差。答曰。奴才在廣順號。帝不解。又問之。答曰。皇上不知道廣順號嗎。是西城最大的木廠。奴才在廠中當管事多年。帝曰。我明白了。你既當大木廠管事。利息必定很好。何故又想做官。答曰。奴才聞四川鹽法道的出息。更加十倍。帝大怒。尙忍而未發。又問你能寫滿洲字嗎。答言不能。又問能寫漢字嗎。玉崑躊躇半晌。始微應曰。能。帝卽以御前紙筆擲與。命太監引至階下。親寫履歷以進。良久始寫呈。帝見其所寫爲奴才玉崑滿洲鑲黃旗人。字體粗大。筆畫多誤。幾不能識。帝怒曰。你仍舊去做你的木廠管事罷。立命罷之。另補一人。此帝偶發震怒。以違太后之命者也。然太后知之。亦不以爲意。有人謂玉崑既罷。仍爲木廠管事。後得李蓮英之助。承造醇王園寢工程。獲利甚豐。又賄通醇邸太監。將邸中珍寶竊出販賣。查覺辦罪。乃往西山寺中爲僧。西人亦有識之者。其後又與京中貴婦私通。犯案而逃。魯伯陽到江蘇後。江督劉坤一知其來歷。不令到任。於是魯所用運動費七萬金。付之東流矣。聞此人後亦爲道士云。（按。輝毓鼎崇陵傳信錄亦載此二事云。

玉崑者木廠商人也。以入貲助園工。得道員。忽授四川鹽茶道。召見日上。見其舉動粗鄙。心惡之。因詢其曾否讀書。玉對曾讀百家姓及大學。上授以筆命書。履歷良久。僅能成玉崑二字。上怒斥出。即日罷之。一日蘇松太道缺員。樞臣列單請簡。上海道兼筦海關膏腴甲天下。上命授魯伯陽。且申之曰。是李鴻章所保。樞臣聞命相顧錯愕。徧稽舊籍。始得其人。嘗以微勞列保案。李所奏也。先是魯以道員需次金陵。制府及司道皆輕之。魯頗不平。乃輦鉅金。輸倖門。期必得斯缺。既有成說。揚揚得意。甚預誇示同僚。咸嗤其妄。命下。果然制府劉坤一大驚詫。奏改爲常鎮通海道。旋劾降爲通判。與此所記略異。近出小說孽海花亦曾記之。朝中向於太后者雖多。然帝亦有親信之臣。且朝士之守正者。皆痛恨李蓮英之賣缺。憤太后之干政。西曆一千八百九十六年。卽光緒二十二年。太后方退政。居於頤和園。有汪鳴鑾者。上奏略謂。帝每日至頤和園請安。往返三十餘里。費時甚久。恐荒政事。且凌晨而往。寒威甚重。或至日暮。猶未回宮。萬一因疲勞感寒。而致聖躬不豫。憂念當無如太后者。皇上當以國事爲重。承志爲孝。勿尙虛文云云。其意卽欲帝專斷國事。脫去太后之干涉也。此等敢言之奏。幸遇太后心境悅豫。

之時。否則其罪不可測矣。在一月前。宮中有高太監請帝簡任親信爲侍從。太后知之。大怒。立杖殺之。自此以後。軍機日懷恐懼。深慮言事者有觸忌之語。會此奏上。恭王與大學士李鴻藻甚憂之。李對恭王曰。此言出於小臣之口。予等真可愧赧。唯有盡力調護。使勿羅罪。王爺能設法挽回之乎。否則將此奏壓匿。恭王甚是其言。謂壓匿必不可行。唯當調護之耳。及奏上。帝對恭王言。若爲太后所見。此人卽無生望。問王有何法。王以李鴻藻之言述上前。帝曰。所言甚是。但汝等不知前此宮中高太監之事乎。其言較此輕微。尙羅重罪。何況於此。恭王曰。太監本不當冒昧進言。太后以家法治之。外臣則不同。以其固有言事之責也。帝嘆息曰。汝豈不知予所處之困難。此奏必須送太后閱看。否則亦必知之。恐有不測之怒。汝下去卽與李鴻藻商量。並可傳知衆人。以後此等奏章。勿上爲是。恭王退。遂同李鴻藻上一奏。略謂某人所奏。實屬膽大妄言。但察其本心。係誤會忠愛之道。尙無他意。請皇上赦其狂妄之罪。帝由頤和園歸。謂恭王曰。今日幸遇太后悅豫之時。朕思將來若再有此等奏章。必將一齊發作。不獨後奏者羅嚴譴。卽汪鳴鑾亦必追論其罪矣。然此次慈禧頗采汪奏之言。命帝以後少來園中。卽來

亦令帝早歸。當戊戌政變之時。維新黨人皆訝康有爲之計甚密。何以太后知之速。而且詳如此。不知皆黨人作事之不謹也。當復政之前。帝見朝中舊黨皆側目於康。乃不再召見。唯命林旭往來傳語。林旭福建人。帝聽之不甚悉。常命其將緊要言語寫以進。有一日太后忽自園歸。欲覘帝之所爲。已至宮門。帝始知之。其時帝正與林旭密議。太監來報言老佛爺頃刻卽至。請帝往接。帝命林旭將所書各紙速爲收拾。忽忽登輜而去。林心中慌急。恐爲太后所見。遂遺落一紙於地。其上所書悉康密謀。恰爲李蓮英親信小奄所得。新黨死機。遂定於此矣。自政變後。帝被幽禁於瀛臺。以度遼遠悲苦之歲月。自知命如懸絲。但不悉盡於何日耳。太后常至瀛臺。明言帝崩後之事。又言帝之登基本不合祖制。獨不思此不合祖制之事。果何人所爲耶。又謂帝與明之景泰帝命運相似。蓋景泰亦爲太后所立。因其兄被執於蒙古。其後當祭祀之時。爲太監所襲。廢而幽之。崩後亦未葬於十三陵內。草草殮葬。卽在頤和園之側。（與明史所云大異。姑存之以備異聞。）帝自西安歸。常於頤和園中望見景泰之墓。而慨歎之。命太監補種松柏。修理其殿。但戒勿令太后知之。若太后垂問。則言係彼自己出錢修治。必得太后之

獎若言係帝所命。則太后必怒矣。然朝中多有知此事者。至一千九百零八年。即光緒三十四年。帝賓天後。張之洞議謚爲景。亦以此也。帝崩之前二日。忽欲親至太后前請安。或謂此乃帝孝心之發。實則帝欲往對太后言。其被壓制之人。今將死矣。但奮力起行數步。即疲軟不能復前。太監扶上御床。從此遂不起。西歷十一月十號。御醫周姓者入診帝脈。見帝所居之室。似久未打掃者。內置一火爐。與貧人所用無異。煤氣甚重。牀亦粗舊。室中陳設無可觀者。桌上鋪一黃色臺布。頗污穢。其上置史書數冊而已。及崩後。梓宮送至西陵。暫厝梁格莊。照例以單開帝生前所用之物。見之者謂帝所用。實與平民無異。宮中用度。皆由李蓮英執掌。其菲薄宜也。帝彌留之前。曾以一事求於太后。可見帝平生之所痛念。唯在珍妃。即庚子年太后命推墮於井中者也。推珍妃之人。固爲李蓮英。而在太后前媒孽珍妃之短者。則爲一崔姓之太監。妃既墮井。彼且以石投於井中。當帝悲苦之際。對帝戲笑。帝此恨永不能忘。故至病亟之時。請太后將崔太監驅逐出宮。以其家產充公。不敢提前事。但言彼對於太后有陰謀。太后允之。宮中太監目中無帝。每對帝爲戲侮之態。而李蓮英尤狠毒。太后偶發慈心。彼即用言挑撥以激

其怒。當帝幽於瀛臺之時。唯有一橋可通。除二三監守太監外。無可與語者。皇后妃嬪來時絕少。太后偶至。則愈增其恐懼。室內陳設甚少。且凌雜無序。所掛竹簾皆脫線。窗紙亦多破裂。宮中安設電燈。唯此室內獨無。內務府人皆知太后意旨。不敢進奉。有一日。帝傳命內務府大臣繼祿。命將竹簾掉換。繼祿遵命換之。太監遂告繼祿。太后賞賜內務府大臣珍物甚多。賞爾者。唯洋狗一個。卽欲繼祿默喻其意也。其後自西安歸。太后待帝始較優厚。

第十一章 庚子年拳亂餘聞

庚子拳亂之時。宮府情形。慈禧外紀所引景善日記已詳之。凡歐人之經歷此事者。中國人之事後追論者。觀其所記。與景善日記略同。卽可知其確實。當清廷未退位前。言者每多忌諱。隆裕太后曾命人將慈禧外紀譯出。但於其中譏刺之處。概行刪削。及至民國。始昌言無忌。追述慈禧之事者甚夥。但其立論。總不免有偏。此等記載。有一相同之性質。意若變亂之作。咸爲私仇而起。謂慈禧之任拳匪。乃爲端王剛毅等人所利用。而此諸人。則並非深惡西人。但以快其私仇耳。卽聯軍將入都。諸人亦不籌備戰守。仍

以修怨爲事。此等議論。固中其情。而亦不免少偏。蓋彼但就其一時立論。而未觀其前後之因果也。今將一滿人所記擇錄於下。觀之可知清廷王公大臣在拳亂未作以前之情形。其自題爲衰微國家之現象。記曰。國家將興。必有禎祥。國家將亡。必有妖孽。凡叔季之世。天命已去。王公貴人。必奢侈淫佚。習於下流。其性情乖戾奇僻。致成種種怪狀。所謂妖孽者是也。嘗庚子前親貴王公有一極怪之風氣。皆好扮成乞丐。遊行於市。以裝扮逼真相誇尙。其初唯滿洲親貴爲之。後則漢人貴官之子弟亦染此風。最著名者爲某尙書之孫。今其家業已蕩盡矣。在一千八百九十二年之夏。卽光緒十八年。有一日天氣極熱。數友約予至城外南河泡納涼。其地有一小丘。高四丈。頂平約寬數畝。四面高柳蒼松。旁一池中植芙蕖。一望蘆葦。頗有蕭颯之趣。搭棚以待座客。亦有小販叫賣零物。來者皆據座飲茶。領略野景。予鄰座有一人。年紀不過十八九歲。形容枯瘦。滿臉煤煙。盤辮於頂。以骨簪貫之。赤其上身。唯穿一短褲。垢膩破爛。只蔽至膝。足穿草鞋。指露於外。純然一乞丐也。但其手大指上戴一翠玉班指。透綠如水。揣其價至少值五百金。且手執一扇。以白玉爲柄。亦極珍貴。聆其語皆北京下流社會之言。伺者趨承。

唯謹待之異於常客。予觀之莫測其爲何等之人。甚爲納悶。其後夕陽落山。衆人皆起身而去。忽見來一紅呢轎車。駿驟盛飾。隨從者二十餘人。予心悟。乃候而觀之。見來者中有二人。皆三品服飾。一人捧帽盒衣包。一人執面盆手巾。至形似乞丐之人前。躬身稟曰。車均齊備。今日恭王請吃晚飯。時候已到。丐者卽起洗面。形容頓改。黑面已變白矣。雖仍瘦削。而一望知爲貴族。換華美之服。帽戴寶石頂。三眼花翎。登車揚鞭。飛馳而去。茶室主人陰告予曰。此人卽濂貝勒也。予曰。彼爲何如此裝扮。茶室主人曰。你不知道。現在年輕王爺都是這樣麼。乃歷數王公貴人。如莊王端王。又某王濂貝勒。瀛貝勒。慶王之子。載振。啟秀之子。莊王之子。懷塔布。諸子皆係如此。常在街上鬧事。坊官至不敢約束乞丐。此濂貝勒尙係安靜者。予聞之。大爲驚異。謂之曰。此真國家將亡之兆。昔唐宋之末。亦曾有此情形。見於史傳。汝記予言。不出十年。必有奇禍。予友多宗室中人。知貴族情形。皆謂此言真也。予言果不幸而中。至庚子年。遂有拳匪之亂。凡當年好扮乞丐之諸王公。某王則爲聯軍命其埋藏死尸。憂憤而卒。懷塔布亦爲聯軍所執。命其打掃廁室。彼不敢謂已係太后親戚。但言係一大官。聯軍鞭之。亦飲藥而卒。端王兄弟

或革或竄。莊王則賜自盡。啟秀死於劊子手。濂貝勒革爵。現在境況至窘。諸王公貴人。昔日好扮乞丐者。今真成乞丐矣。不知彼等尙記當年之事否。又有一滿人之日記。記庚子年太后主意不定。詢問羣臣之情形。記曰。庚子年朝臣壹意主戰者。爲端王徐桐。剛毅。慶王意懷反對。然爲端王所持。不敢立異。趙舒翹亦游移不定。當大沽礮臺陷落之報至京。朝廷震動。太后召諸臣單獨進見。慶王雖不在軍機。而太后最先召之。彼以狡滑之辭對曰。和與戰皆有利有害。仍請太后主持。太后怒曰。你所對與未答應我一樣。下去罷。次卽召見榮祿。榮祿答曰。若繼續開戰。恐有覆亡之禍。請太后三思。太后怒責之。又召見剛毅。剛毅堅請力戰到底。又召見趙舒翹。並告以前數人所對之言。謂之曰。你做過外官。通曉民情。應該比榮祿剛毅明白些。因他二人都未做過外官。或和或戰。予將於汝決之。趙舒翹本已答應榮祿。助其主持和議。後窺知太后之意。乃以遊移之辭對曰。聞各國皆調大兵來華。恐中國無必勝之把握。然今日議和。亦極困難。太后怒曰。汝究竟主和主戰。須直捷言之。趙乃答曰。臣意先戰。俟戰敗再議和。不遲。現在各省勤王之兵。已將至京。卽使全敗。洋兵亦不能深入內地。末後一語。深中太后之意。乃

決意再戰矣。諸拳匪首領中趙舒翹之罪較輕。慈禧下諭以彼在當時首鼠兩端爲其罪。此人頗爲慈禧所憐憫。欲設法免其一死。但爲各國所持。不獲如願。其主持拳匪最力者。則爲端王剛毅。徐桐三人。端王毫無知識。類於瘋狂。徐桐剛毅則自以爲守孔子之道。盡忠於國。徐桐最固執。但其所行尙表裏一致。蓋在拳匪未作以前。其頑固之名已甚著矣。其住宅離使館甚近。出門必須走過西人所築之馬路。彼因痛惡洋人之故。乃另開一側門。誓不由大門出入。其子徐承煜雖亦不爲開通。然常食西餐。且與其鄰居之西人友善。當圍攻使館時。徐一家阻隔不得出。後得此鄰居西人之助。始得遷徙。事爲太后所聞。亦甚贊此西人之義。徐桐遷居大學士寶鋆之舊宅。日日入宮。極力勸太后信任拳匪。北京既破。太后西行。徐本欲隨駕。但有諭旨派爲議和大臣。其子徐承煜勸彼自盡曰。父年已八十餘矣。既敗壞國事至此。尙何所待。徐桐大怒。斥其不孝。其子曰。不忠之臣。固應有不孝之子。（勃氏原文按此言與吳三桂對其父之言相同）徐桐聞之。色轉和平曰。汝言如此。予卽依汝。其子遂引其父至花園中一室內。繩已懸就。助其父就縊。徐承煜果於此時同死者。人亦未能厚非之。然彼不肯死。五閱月之後。

乃爲日兵鎗斃於市。當拳亂正熾之時。徐桐對人言。予等殺盡洋人之先。當先滅一龍。二虎十三羊。一龍指皇帝。二虎指榮祿李鴻章。十三羊指慶王袁世凱王文韶。凡其餘朝中攻擊拳匪之人。及與洋人定約之長江各督撫也。毓賢爲山西之屠戶。聯軍入都。其名在黑單內。先本定充軍。以各國不允。乃定死罪。陝甘總督崧藩（譯音）者。毓賢之老友也。一日請毓賢赴宴。飲正酣。命斬毓賢之上諭到。崧藩閱之色變。急藏入袖中。毓賢索閱。崧藩不肯。毓賢怒投箸欲去。崧藩不得已。以上諭示之。不勝悲傷。毓賢閱後笑曰。此乃予之幸事。何所悲。想汝必須服從諭旨。君上之言。臣子唯應敬遵。但諭命殺我爲公事。今日之筵爲私情。予等可終此宴。遂痛飲而別。次日崧藩乃派人送毓賢至法場。而親視其老友之就刑焉。（接近人所著拳變餘聞記此事略異。今附錄之。毓賢正法派何福堃監視。行刑署甘督李廷簫爲晉藩時附和毓賢。縱拳戕教。旣得毓賢正法之命。持告毓賢。毓賢曰。死吾分也。如執事何。廷簫慮不免。元旦仰藥死。正月初六日。何福堃至什字觀呼毓賢出武員。舉刀斫之。傷頸未殊。毓賢連呼求速死。其僕憐之。助斷其項。收葬焉。）剛毅者。賦性粗鹵。不學無術。極信妖法。蓋自幼習聞神怪之語。皆信以

爲真。故深信拳匪不疑。其所最愛者。卽小說中之封神榜。常令人誦讀而聽之。在軍機時。每對人曰。卽使歐洲有許多國。但謂其能派兵至中國。殊屬謊言。當一千八百九十四年。剛毅由廣督任內回京。舉薦其巡捕。請授以顯職。帝問此人才具如何。剛毅對曰。此人爲奴才之黃天霸。帝不覺失笑。知剛毅之知識。不出戲劇小說中也。吾等事後回觀庚子年之拳亂。平心以思當時之信奉拳匪者。其思想之幼稚。希望之失敗。亦復可憫。覺歐人之施罰於中國。猶太過也。拳匪之首領。爲天津一女子。本娼妓之流。而數萬人之迷信者。尊之爲黃蓮聖母。視之爲東方之兼理阿格。（兼理阿格者。法國人當英法戰爭時。法已爲英所破。兼理阿格以一鄉里之女子。似得上帝之默示。命其奮起救國。遂出而號召。大敗英人。）若有人被袒外之嫌疑。則牽至聖母之前。或殺或釋。一言而定。李鴻章之子。亦曾被執。跪於聖母前。聖母對之而笑。侍者見聖母色和。遂赦之。裕祿特請聖母至督署。公服跪接而入。謂洋人將至。請聖母施大法力。以殲滅之。聖母答曰。予已請天兵。天將下凡。以天火燒之。汝勿恐懼。此人後爲李鴻章所殺。當時北京街市中之情形。有一江蘇人記之曰。予家住三條胡同之西頭。離使館不及四百碼。自五

月二十四日德使被害後。董軍在予住宅鄰近挨戶入搶。時聞婦女哭泣之聲。及甘肅土音呼殺二毛子之聲。二十六日有一滿御史上奏。參甘軍之不法。太后召見董福祥。命其嚴辦軍士之搜劫者。是夜即在胡同口網殺甘軍二十名。然雖如此重辦。而次日之搶劫如故。將次及於予家。予兄欲關大門。予止之曰。不如開門讓彼入內。與之好說。予兄亦以爲然。予命家中婦女聚於一室。不必驚慌。布置甫定。即見甘勇十九人持刀而入。刀及衣上猶有鮮血。如自屠肆出者。予迎而謂之曰。予知汝等來意。乃搜尋二毛子。然予家中無吃洋教者。予屋後有竈神。即其證據。予家人皆在此室。汝等若欲往各房查看。即請往查。予意即謂如欲取物。予亦不阻也。又命一僕豫備茶。款待來客。甘勇見予以和顏相向。遂未肆虐。各往房中搜取物件。又均至廳中取茶飲之。內有一人曰。我看你是個好人。爲何住在此附近洋人地方。遂各呼打擾而去。此兩點鐘時之事。查點失物。約值四千元。不久見鄰居火起。乃決意移至北城一友人家中暫住。似甘軍此等不法舉動。而無識者猶信其能防衛國家。豈不謬乎。余有一友計算庚子年北京居民之被害者。約二十五萬人。予在家中時。罵拳匪親友中之信拳匪者。亦呼予爲二毛。

子。予兄恐予被殺。逼予在奶子府拳壇叩頭。此事予至今悔之。當拳亂正熾之時。有五大臣以持正論而被害。袁昶許景澄。太后謂其擅改寄諭。保護外人而殺之。有人記許景澄之死曰。許景澄有一最親密之友。當許未通籍前。卽相友善。曾隨許至歐洲。直至許死。未嘗一日相離。據其友言。許被執之日。其先毫無風聲。是日午飯後。許在書房中閒談。命下人套車。將至總理衙門。甫更衣。竟見管門者持一名片入。言有人來拜。許視其名片。並不認識。吩咐擋駕。管門者出而又入。言來者爲一軍官。云係慶王吩咐來請者。謂慶王端王皆在總理衙門坐候。有要緊事相商。許出見後。轉身謂其友曰。予昨日在衙門。未聞有何要緊之事。何以今日二王皆在衙門。此事甚怪。其友曰。一定是有事。予亦欲往南城探問消息。其友甫出。又歸。謂許曰。來人尙在門首。其神氣甚爲可疑。衙門中人予皆認識。此人從未見過。汝今日多帶數人去。如有何事。可教一人回來送信。許微笑。亦不以爲意。徑上車而去。至胡同口。見有步軍統領衙門中數人。至車旁與前來之人打話。命車趕至步軍衙門。許問其故。答曰。今日會議在步軍衙門。既至。來人扶許下車。卽吩咐許之下人曰。你們先回去。此處有人招呼。卽引許至一小房內。隨手將

門反鎖。聞隔室有歎息之聲。乃袁昶也。但二人不能晤面。許之下人回家報信。其友聞之大驚。立至王文韶處。請其援救。王曰：予甫下朝。未聞有何諭旨。此事恐有舛錯。其友歸。籌思此事。不能寐。至夜二鐘。得一消息。云許袁二人已送至刑部。次晨又接刑部中相識司官之信。言今日堂官下朝。吩咐預備紅布。此消息甚惡。蓋向例凡達官被刑。必以紅布遮其面也。其友聞之。欲至王文韶處求其援救。甫出門。又得一信。云押袁許二人之車。已自刑部動身。其友急趕至菜市口。則二人業已命盡。正遇徐承燧回宮覆命也。其記立山之死曰：立山之死。或謂拳黨利其家財。非也。先是立山眷西城口袋底一妓。載瀾亦眷之。其時載瀾頗貧乏。妓卒爲立山所得。故恨之銜骨。及拳亂起。遂搆陷焉。聯沅官居內閣學士。上奏請停攻使館。出宮門遇崇禮。禮問其至宮何事。聯沅答言上一奏。並語以奏中之意。禮大怒曰：汝自忘其爲滿人。乃與漢人中之漢奸無異。沅亦怒與爭數語。禮往見端王告之。數日後遂與立山徐用儀同被害。被害之日。有人在菜市口見一拳匪服飾之人。挾一物於馬上。馳而至。遠望不知何物。及近見爲一人。手足拳縛。且已殘廢。卽立山也。徐用儀者浙江人。初爲戶部司員。旋考入小軍機。經歷五十年。

始至尙書。性情平和謹慎。爲官清正。出語行步皆遲緩。其死也。人皆以爲奇。蓋其爲人必無仇怨也。且太后亦甚信之。事後太后對人言。徐用儀之殺。非己本意。其死也。蓋爲徐桐所陷。徐桐與之有夙恨。其事相隔已甚遠。且極微也。有一次兩人皆派閱卷大臣。徐桐取中一卷。徐用儀看出卷中有違錯之處。遂黜之。徐桐由此懷恨。竟借事以陷之焉。拳黨諸人既殺五大臣。意猶未足。欲將朝中立異者悉置之死。廖壽恒者。江蘇人。前官禮部尙書。曾任軍機及總理衙門。辭官已數月矣。端王剛毅恨之不已。定於七月二十二日殺廖。及其餘各人。皆拳黨素所不懽者也。其議頗露於外。時廖已送眷屬歸。獨居東華門外一小廟內。聞之。託其親戚某人。曾任總督者。請榮祿救之。次日榮祿覆信言。召見時。在太后前力救。而太后意已定。不能挽回。因勸其自盡。然廖雖知無望。而不能自決。廟內住持云。廖聞知死信後。獨在院中盤旋。狀類瘋狂。不能稍靜。顏色灰白。亦不飲食。幸其命運尙好。死期前一日。北京已破。遂得脫焉。王文韶亦幾不免。當五大臣被害之後。載瀾上一奏。言圍攻使館之事。附片謂朝中漢奸業已重辦。朝班已清。但尙有一人。卽王文韶。請太后速殺之。並言斬草不除根。終將復生也。此奏在軍機處。榮祿

先見之。不與其同僚一言。卽將附片藏入袖中。唯將其奏遞王文韶閱。王閱過。謂榮祿曰。予聞瀾公尙有一附片。何以不見。榮祿曰。想爲太后所留。未曾發下。數分鐘後。軍機入見。言事畢。榮祿將附片呈上。言曰。載瀾此奏。真有累太后之聖明。請降諭嚴加申斥。太后閱之。顏色勃然大變。久之。謂榮祿曰。你敢保他嗎。榮祿曰。卽朝中盡懷貳心。而王文韶之忠誠。奴才敢以百口保之。雖以利刃置奴才之頸。奴才亦不變此語也。太后仍猶豫未決。其後乃以嚴重之音謂榮祿曰。旣如此。予卽以此人交汝。若察出不如汝言。必將汝二人一併治罪。榮祿乃叩頭謝恩而退。王文韶兩耳甚聾。跪處又遠。太后與榮祿之語皆未聞。榮祿亦不告之。故至死不知此事。榮祿後對其友言曰。當予救老王命時。太后怒甚。其聲音之嚴厲。予及禮王皆聞之。而顛剛毅則冷視於旁。而老王毫無知覺。後尙問予。太后發怒究爲何事。此下所記。乃聯沅之壻壽富殉節之事。當聯軍入都時。壽富不忍見都城之破。遂全家自盡。壽富者。寶廷之子。宗室也。記此事者。亦一宗室。壽富明新學。性情激烈。但以予等歐人觀之。其死殊可不必。非中道也。譯者曰。壽富之死。蓋出於至誠愛國之心。勃氏乃謂其非中道。此自成其爲西人之論耳。記曰。當拳匪

初起之時。壽富卽甚憂慮。探聽宮內真情。知太后甚信任拳匪。必釀成巨禍。常與家人言。今日欲救中國。唯有皇上親政。則各國感情一變。庶中國不致吃虧耳。及端王剛毅等威權大張。有一友勸壽富避往南方。壽富不肯。又有人相勸卽欲留京。亦可使其弟富壽護家眷避往鄉間。壽富亦不肯曰。皮之不存。毛將焉附。國苟亡。家於何有。其弟意見亦同。內閣學士聯沅者。壽富之外舅。平日講宋學。當西歷一千八百九十八年在鄂時。聞壽富名在新黨中。致函責之。壽富亦覆函辯難。因此頗生意見。其後聯沅回京。見壽富之講新學。實出於忠君愛國之誠。非如浮薄少年之所爲。遂仍重之如故。庚子年西歷六月。召見廷臣。聯沅力勸太后勿殺使臣。痛哭流涕而言之。端王大怒。言聯沅可斬。太后不應。俟聯沅辭畢。乃謂之曰。汝所言我已習聞。甚厭之。壽富知聯沅必不免。後終被殺。死後四日。其家屬皆避於壽富家中。卽西歷八月十四號也。自此日起。城中交通卽不便。至十七號。聯軍已自西門入城。揚言懸白旗者。卽爲順民。不殺。壽富不肯懸。服洋煙自盡。其兩妹。一年三十二。一只八歲。均服焉。其所用之婢。亦甘隨死。時洋兵已至間壁院中。壽富恐受外人之辱。以洋煙毒緩。遂帶領家人至西屋內。登坑自縊。繩絕。

墜於地。其弟復助之結繩。遂死。兩妹一婢亦均自縊死。其弟環顧已無繩。出而覓之。僅得一細繩。仍持至西屋中。結環門檻而死之。卽中歷七月二十三日早十鐘也。壽富死時年三十六。其弟年三十二。壽富妻亦欲自盡。爲聯沅家人勸免。外兵行後。其僕先將壽富之尸解下。始得進門。以五尸置於中堂。無殮費。間壁福姓者聞之。出銀百兩。始購棺成殮。淺葬於後花園內。此其全家殉節之本末也。自甲午中日戰後。壽富慨歎國事。主張變法以圖存。誓盡瘁於國。不幸遭遇奇變。志未達而僅以身殉。可哀也已。大節凜然。不愧爲太祖皇帝之子孫。且使其仇敵見之。知中國之有人也。

第十一章 論慈禧太后

慈禧之性情。予於外紀中已詳之。當太后未崩之前。朝野雖有記載其事者。但以忌諱之故。使人閱之。毫不得其真相。其在英國保護下之新加坡。論太后之事者。則肆無忌憚。然挾其排滿之偏見。所言亦不足據。唯景善日記。最爲確實。太后平生。壹遵其種族階級歷史之所信守。不肯變易。此自關於所稟之性情。所受之教理。且二十四歲卽掌大權。聰明才智。遠出羣臣之上。故言莫予違。無由自檢。其性情之偏。吾人觀其所處之

境地。則彼責太后不能革除禁城內之積弊者。亦不怨之論也。以事變之萬端。各人眼光之不同。故評太后者。人持一論。此固不足怪。當同治之時。太后之失德。及濫費。朝中之守正者。皆懷譏議。因此心理之傳播。遂成一極大之變局。蓋戊戌之變。其動機亦由士大夫不滿意於太后所致。至其後倡革命之論者。則尤以太后之失德爲口實矣。當一千九百九十八年。楊銳上奏。極詆太后之失德。甚至謂其與唐之武則天無異。穢聲傳播。以頤和園之荒樂。比於周之妲己。此等極端攻毀之語。其不可憑。與官書之專爲讚美者等耳。中國人之攻擊太后者。以皇位繼承之事爲最。至於殺珍妃及庚子年之信任拳匪。反不甚及。蓋中國社會之組織。以尊祖重祀爲本。而皇室尤一國之表率。故承嗣必遵一定之序。非太后所能擅改。至於信拳匪殺珍妃。則其大權之所得爲也。此等思想。新舊黨皆然。毅皇后之崩。及其遺腹之子。則言者人各一辭。傳聞多異。此乃當時宮中之一疑案。太后之錯。以此事爲最大。當穆宗崩後。太后欲繼續其大權。乃一定之情事也。論者於此均無異辭。但初因忌諱不敢昌言。至民國後。則公然見之於書矣。然此等著作。其存心之真僞如何。證據之充實如何。頗難言之。彼等懷排滿之偏見。皆

謂慈安之崩。毅后之崩。德宗之崩。確出於慈禧之謀。但其敘述至最要之關鍵。則人各異辭。無一同者。且含糊言之。不能有真確之證據。故予等亦不能遽信之。蓋此等事。只能存爲疑案耳。此下所錄。乃近日印行之四種筆記。可知除廣東排滿黨外。北方諸省。亦有懷恨於太后者。不論其所言可信與否。而觀之。可見紫禁城中隱伏之情形。第一種爲潘祖蔭所著。爲其孫印行於上海。潘在光緒朝爲南黨之首領。而其孫則一懷抱革命之思想者也。其筆記曰。肅順之死。官書記載與衆人傳說。皆謂其心懷逆謀。盛稱西太后之不動聲色。而措國家於安。然其真情。實不如此。予居北京久。熟於宮中之事。特一述之。蓋西后之殺肅順。實因肅順洞悉西后之陰事也。但肅順已死。無由自明耳。西后初入宮時。名位甚低。但在圓明園一別館中。派有執事。西后生長於南方。其乳媪。又南方人。故習南方歌曲。天生妙喉。歌聲幽曼。動人。一日文宗偶散步於園中。聞之甚驚異。是爲西后見帝之始。蓋其先入宮。乃成皇后所選。帝初未見之也。是夕遂召幸。西后性機警。善測人意。深得帝寵。次日即隨帝回宮。後生皇子。乃冊立爲妃。自是以後。漸驕縱。對於帝亦時有不遜之處。宮中其餘妃嬪。悉俯視之。帝不能制。南方亂事蔓延。國

家浸危。西后留心外事。時時舉薦人才於帝前。於是推戴者漸衆。至於咸豐末年。則章奏皆由西后披覽。帝積不能平。時皇室中帝最親信者爲肅順。恩遇甚隆。雖恭王不逮。西后知帝疑之。思結納肅順以自固。肅順拒之。遂恨之甚。有一歲端午節。西后勸帝御龍舟。遊於湖中。后親操舟。帝同肅順甫上舟。忽側。帝幾落水。跌傷足。此事愈觸帝疑。帝有一姊。常謂帝須記國初相傳葉赫氏雖存一女。必覆覺羅之言。帝亦對肅順言。欲踵漢武帝誅鈎弋故事。肅順不答。然帝知肅順不答。卽默贊也。此言爲一太監所聞。告知西后。西后聞之。頗懼。稍稍自斂。然仍盡力以鞏固其權勢。帝性柔弱。不能決斷。及與英法開釁。連戰皆敗。帝避往熱河。病愈重。憂慮身後之事。乃幽閉西后於一室內。不許與外間交通。若非西后侍者。頗忠。幾於斷食。至帝彌留之時。遂決意效法漢武故事。自草遺詔。言己崩後。卽命某妃從死。服侍己於地下。不許生存於世。以亂國政。書畢。卽交與肅順。但肅順仍將此旨置帝枕下。恐人謂此旨係彼僞造也。有一輕年太監名李蓮英者。善按摩術。帝病中體疼。常命李按摩。得聞帝與肅順之言。遂往告西后。時醇王及其福晉亦在熱河。李蓮英並告知醇王福晉。請其設法援救。及帝崩。正穿長壽袍時。醇王

福晉卽入宮。襄助其事。西后亦自幽閉之室中走出。至帝寢宮。知此詔在慈安手中。遂同醇王福晉請慈安出之。慈安遂出此詔。立時焚化。人謂慈安之焚此詔。實出於本心。蓋不欲於此時宮中自起爭端。且慈安亦不悅肅順。又以帝尙有一密詔在己手中。如西后後有不法之事。可以隨時誅之也。此詔旣焚。肅順入宮。問大行皇帝究於何時賓天。須寫入諭旨中。西后探懷出一表。怒容謂之曰。你自己看罷。大行皇帝賓天。距此不過數分鐘。蓋西后不願言其間有空閒之時。以掩焚詔之事也。由此遂決意置肅順於死地矣。予亦曾受西后之恩。此事似不應載。但西后之所行。實不正也。（按勃氏謂此段爲潘祖蔭所記。近來印行者曾購於市中。未見故依其意譯之。醜詆慈禧甚至潘氏口吻不應如此。恐係僞託。）又有自署安徽人之筆記。言滿洲之興自破滅葉赫部始。其亡也亦由葉赫氏終。遂記慈禧之事曰。咸豐初年。文宗頗勵精政事。其後因南方亂事蔓延。不勝憂慮。又爲太監所引誘。遂以酒色自娛。後宮雖衆。無當意者。時帝所最信任者。爲肅順。肅順亦思乘機減削慈禧之權。得內庭總管太監之助。遂選進江浙女子三十人。清祖制不選漢女。立法極嚴。世祖母后爲保全滿洲純粹之血統計。恐後世子

孫流於荒淫。有踰此制。乃立一鐵柱於宮門。刻以字云。如有織足之漢女入此門者。立殺之。肅順乃以巧辭言於帝曰。今國家甚不安靜。帝有時居圓明園。警備宜嚴。請選漢女三十人。於帝寢宮輪流坐更。帝從焉。時慈禧雖已生有皇子。帝頗疑之。常與肅順言。欲行廢黜。及彌留時。遂自書一遺詔。交與慈禧。略謂葉赫氏祖制不得備椒房。今既生皇子。異日母以子貴。自不能不尊爲太后。惟朕實不能深信其人。此後如能安分守法。則已。否則汝可出此詔。命廷臣傳遺命除之。其後兩宮垂簾之局。乃帝所萬不及料者也。今官書中所載之遺詔。乃李鴻藻所撰。非其真也。帝崩後。兩太后名分之間。頗有爭議。初諭旨中稱慈安爲母后。皇太后。慈禧爲聖母。皇太后。向例本係如此。然慈禧不悅。廷臣遂思一調停之法。上兩宮徽號。一稱慈安太后。一稱慈禧太后。兩宮遂相等矣。當文宗崩於熱河之時。慈禧首倡垂簾之議。廷臣漠然視之。無所可否。唯杜翰力言有違祖制。斷不可行。慈禧亦不再言。其後羣以垂簾爲是者。蓋肅順之驕倨。深失人心之故。且近支王公平日亦受肅順之輕慢。積忿於心。竭力反對之。後世論者。皆深詆肅順。不遺餘力。其實此人雖驕倨失衆。並非大奸大惡之人。較彼滿洲頑固之流。猶爲勝之。

且知推重湘軍諸帥。以彼之力。曾左諸公始得發舒其志也。慈禧之隱德。頗有難言者。信任太監安得海。寵逾其分。以致人言嘖嘖。當穆宗大婚時。慈禧欲立鳳秀之女。但慈安屬意於毅皇后。穆宗意亦同之。遂立焉。毅后性情貞靜謹默。爲慈禧所不悅。欲帝疎遠皇后而親慧妃。既違帝意。故帝常獨宿乾清宮中。觀當時宮中之情形。則帝受太監之引誘。而微行於外。亦不足怪也。有一日帝微服出行。朝中某侍郎見之大驚。囑侍衛嚴加防護。勿稍疎虞。後帝又出。侍衛遂加諫阻。帝不悅。後某侍郎進見。帝責其於本部之事。不能盡職。蓋以前事之故也。帝既病。慈安命皇后在側事奉。宮中舊制。凡皇帝召幸妃嬪。必須皇后傳旨。蓋以皇后之璽。若無后璽。則妃嬪不敢進御。帝病中仍逼后傳旨。召幸某妃。后不得已從之。由是病愈劇。及彌留時。召李鴻藻進見。李乃帝之師傅也。李揭簾入。皇后在旁欲避。向後。帝曰。師傅年老。且爲先帝親信之臣。汝卽在此聽予之言。李叩首榻前。帝命之起。執其手而言曰。朕病已知不起。后及鴻藻聞之皆哭。帝又曰。汝等勿哭。聽朕之言。乃轉面謂后曰。朕崩後。汝思何人應嗣朕位。后曰。國賴長君。妾並不欲撫育冲主。享太后之榮。主少國疑。非朝廷之幸也。帝笑曰。此意極好。汝識見如此。

明白。朕實欣悅。乃謂李曰。朕意欲立貝勒載澍承嗣皇考。遂口誦遺詔。命李卽於榻前起草。幾及千言。中有數語極關重要。乃抵制慈禧之垂簾者。李草訖呈帝閱之。帝命其退下休息。曰。或能再見。李既退。顏色慘白。思其中之利害。不覺戰慄。遂至慈禧宮。請卽刻召見。慈禧召入。李卽以遺詔進呈。慈禧細細閱看。不改常度。既閱畢。忽變怒容。自御座起。立將遺詔撕碎。以足踏之。曰。你下去罷。遂傳諭停止進藥。亦不許有外臣入皇帝宮。立刻往視帝疾。則帝已晏駕矣。慈禧因此事甚感李鴻藻。雖在一千八百八十四年。曾退出軍機。不久仍復信任如初。死後特命諡文正以報之。李鴻章當戊戌變政之後。曾以此事告知馬建忠。曰。李鴻藻真爲清朝之罪人。凡甲午中日之戰。以及其後種種變故。皆受李鴻藻之賜也。予蓋聞之於馬建忠云。穆宗賓天。已當黃昏之時矣。廷臣雖微聞之。猶未得宮中之信。忽奉旨召見軍機。既入。則見慈禧身衣常服。獨倚御座而立。軍機問帝病狀。慈禧微笑曰。甚好。既而顏色忽變。曰。皇帝已崩。汝等亦不必拘禮。商量大事要緊。卽宣布立醇王子之意。廷臣皆言如太后旨。其力爭謂應爲大行皇帝立嗣者。唯文祥一人耳。當一千八百八十一年之二月。慈禧患病。有兩月不能臨朝。召見臣

二皆慈安主之。御醫謂係痢疾。愈治愈劇。實則產後血分之病也。後自江蘇召一薛姓醫生至。始知其病源。然其所開藥案。仍以痢疾爲言。由此始得漸愈。慈安微覺其可疑之迹。然素性寬大。思有以感化之。一日設宴。請慈禧至。以賀病愈爲言。酒三巡。慈安屏退侍者。追述以往之事。初言己幼年之境況。父母之慈愛。漸言及在熱河載垣謀逆之時。同處危地。協心剪除之事。慈禧聞之。頗爲感動。慈安曰。予姊妹皆已漸入老境。予或先歸地下。追隨先帝而去。與妹相處二十年。從無閒言。今有一物與妹觀之。恐予死後爲人所見。謂予姊妹外雖親愛。內實仇敵也。袖出一紙示慈禧。卽文宗之遺詔。慈禧閱之色變。慈安又曰。妹勿怒。予若與妹稍存外視之心。卽斷不肯以此詔相示。今與妹觀。所以見予姊妹推心相待之誠也。又笑曰。今此詔已無用。立取火焚之。慈禧內雖慚恨。佯爲感謝。執慈安手而泣。慈安慰之。勸其回宮休息。數日之後。慈安至慈禧處。見慈禧相待誠懇。不似以前之驕倨。私自喜。謂爲己所制伏。太監等旁侍者。見慈禧態度忽變。亦深以爲異。坐少頃。慈安言腹微飢。慈禧出餅餌。慈安食之。云味甚佳。不似御廚房所做。慈禧曰。此予妹所送。姊如喜食。當令再做。慈安謝之。慈禧曰。予妹卽姊之妹。何敢當。

謝兩日之後。慈禧命人送餅餌一盒與慈安。同前所食。慈安取嘗。覺微苦。是日日未落。遂崩。適前一日慈安體稍不適。宣前視慈禧病之薛醫生入診。薛醫生言東太后無病。不必服藥。明日自愈。太監必欲其開藥。遂寫一極輕淡之方而退。次日至其友戶部尙書閣敬銘處。正談此事。自戶部來一司官。以公事呈閣請畫稿曰。頃自衙門出。聞一消息。云東太后已晏駕。薛醫生曰。必無此事。予昨日尙入內診視。東太后並無大病。不過稍受涼。何至遽崩。或係西太后舊病復發。傳者誤耳。少頃內務府送信至。知確係東后。薛醫生大爲驚訝曰。天下有此奇事。真夢想所不到。時慈禧病後。體未復原。每日召見軍機。皆慈安一人。是晚左宗棠因慈安昨日稍不適。至宮門請安。聞人言駕已崩。大驚曰。今早召見軍機時。予尙見之。容貌聲音均如常。何遽晏駕。予不信。有此事。恭王急止。令勿言。然已爲太監所聞。回宮報告慈禧。不久左遂外簡。宮中所藏毒藥。力量極大。沾唇卽死。且死後毫無形迹。諸藥大半皆自明代留貽。亦有康熙時西洋人自意大利帶來者。內有一種。慈禧曾以之毒斃一太監。太監姓劉。其生前深得慈禧之寵。位在李蓮英上。及李漸得勢。嫉之甚。常讒害劉於慈禧之前。然劉性聰明。善於解說。慈禧雖屢怒。

之恆得脫免。有一日因事得罪。李蓮英又乘間進讒。慈禧大怒。命劉跪出一紙。列其罪款三十條。曰：似此該當何刑。劉太監知此次必不能倖免。叩頭曰：奴才罪該萬死。求老佛爺念三十年犬馬微勞。賜一全尸。慈禧略一沉吟。曰：狠好。你先下去等信。遂命人將彼引至一屋內。反關之。忽笑對諸太監宮女曰：我今天叫你們看一新鮮玩意。命一宮女至房內。拿一小盒至。以鑰開之。內儲小瓶二十。慈禧於內選出一種。啟瓶傾出粉紅色粉子。少許於酒杯中。以水和之。命太監持與劉太監。飲後卽令睡下。此人去後。覆稱劉太監感謝太后之恩。已遵旨矣。十分鐘後。慈禧謂諸人曰：你們此時可以去看。衆往啟門。見劉太監已死。如睡熟然。毫無苦狀。慈禧心如鐵石。殺人以談笑出之。世豈有更毒於此婦人之心者乎。（譯意）又有一筆記記慈安晏駕之事。與安徽人所記略同。唯於施毒之情事。則互異其辭。慈安之暴崩。雖似可疑。然所言慈禧不端之事。恐皆出於詆毀者之臆造。不足信也。又有一筆記則更荒誕不經。（此兩種略去）以舊日曾國藩劉坤一等目中之慈禧。與今日少年維新黨人目中之慈禧。兩相比較。甚爲有趣。其懸絕何啻天淵。不知後世之論定如何。以予觀之。則舊黨所言。較爲可據。然今日之趨

新者則不取之。佛老德有言。治歷史學者。決不能如治科學之精確。觀於中國之吏而益信。誠爲不刊之論也。

第十二章 監國攝政王

一千九百零八年。卽光緒三十四年。德宗崩。次日慈禧亦崩。中國之大位。復歸於冲幼之主。繼嗣之合法與否。監國之危險如何。均不必論。蓋太后之意。卽爲法律。其所以立此幼主者。原因甚雜。觀太后臨崩之言。非不知女主干政之害。但因欲保葉赫那拉氏之勢力。故仍留其大權之一部。與其姪女。卽隆裕太后也。且慈禧亦明言。因榮祿之功甚大。故使醇親王娶其女爲福晉。已定意俟其生子。卽以之承繼大寶矣。因此數故。遂使危急之朝廷。以幼主當之。復返於同治光緒初年之狀。十一月十四號。慈禧下諭。以醇王監國。其時尙不意己之遽崩也。若慈禧仍在。則醇王之監國。亦不過一空名而已。至次日慈禧病亟。自知不起。始將大權交與監國。然其上諭末數語。謂遇有重大之事。須問隆裕太后者。卽由監國稟承隆裕而行。蓋其意不欲一人獨執大權。故分其權於隆裕。亦以保存葉赫那拉氏之勢力。此等辦法。可謂聰明而辣矣。既以上諭末數語。割

減監國之地位。隆裕太后即可據此以爲干涉國政之本。故監國之任。甚爲困難。其實權則在隆裕及其福晉之手。其福晉卽榮祿之女也。於是慈禧臨崩所言。不許再有女主當國之事者。而暗中仍不免成爲干政之局。且兩女爭權。其事更壞。然監國若有才者。則大權亦不至旁落。無如監國之爲人。懦弱無能。故人皆知隆裕之干政。爲不能免之事。若非遇革命之變。使朝中各方面之權力一切破滅。則在當時之情勢。恰與同治初年無異。隆裕與幼帝之母暗執朝權。卽同慈禧與慈安之同時訓政。而監國攝政王。則同於議政之恭王。不過其才智不能並論耳。隆裕壹意踵效慈禧。其欲剪除監國及幼帝之母必也。當一千九百八十九年。慈禧選立其姪女爲皇后。意在鞏固其葉赫那拉氏之勢力。並不顧帝之合意與否。故隆裕自始卽爲帝所不悅。人皆知之。帝后之間。有似陌路。后專從太后之指揮。不與帝同心。然見帝寵愛珍妃。亦甚不悅。后性情尙爲和易。亦略帶有慈禧之性質。及其聰明。慈禧崩後。卽略不遲緩。而乘機以顯其權力。故宣統卽位之始。朝中卽分二黨。一則擁戴太后。一則扶持監國。太監中亦分黨相爭。李蓮英黨以其舊日之勢力。與隆裕寵任之太監外間所稱爲小張者。各不相下。國人希

冀朝中新政。一掃太監之勢力者。竟成幻影矣。隆裕亦同於慈禧。表面爲極正直勤儉之言。其實則游樂濫費。不顧國家之艱難。故人言藉藉。羣相非議。隆裕亦曾革除太監宮女多人。但皆向所不悅。及向於監國者。於國政甚爲關懷。但均爲自己之利益。當一千九百零九年之春。隆裕同宮妃太監遊於西苑。談及外間御史及報章譏議之言。隆裕曰。此等言論。予並不以爲意。以大行太皇太后之聖明。外間猶多毀謗。此何足異。予已執定主意。諸事皆照太皇太后而行。諸人聞之。皆大樂。知俟時機成熟之時。垂簾之事。將再見矣。小張卽跪地叩頭曰。太后此言。乃國家之福。亦奴才等之福也。隆裕於幼帝之起居。極爲經心。旁侍之人。皆取己最親信者。務使幼主忘其父母而親己。一千九百十一年。卽宣統三年。使監國以己意降一諭。略謂皇上冲齡踐阼。現當典學之年。著欽天監卽於七月內選擇吉日。奏開。派大學士陸潤庠。侍郎陳寶琛。爲師傅。每日入宮授讀。將聖經義理。及古今治亂之源。今日憲政之要。盡心剖析。以爲將來盛治之本。並派監國攝政王。管理皇上課程。及毓慶宮事務。其滿洲文字。派伊克坦教授云云。（譯意）數星期後。又降諭嚴禁內務府之弊端。以崇節儉爲辭。此與慈禧訓政之初年內

事糜費。而外爲正論者。如出一轍。論中言及建築之事。尤爲可笑。蓋此時隆裕正於宮中大興土木。而縱其寵信之太監於中。網利也。此論乃一千九百十一年八月所降。略謂度支部參奏內務府虛報款項及縱容杭州織造舞弊各節。殊屬不法。除將所參舞弊人員。交部嚴加議處外。嗣後內務府大臣。於工程用款。務須詳細核算。不得虛糜。以副予力崇節儉之意云云。（譯意）在四月之前。有一滿御史上奏。極論張太監監修宮殿之事。此事人言藉藉。遂爲南方革命黨人惑煽之資。革命黨人以此等事鼓動人心。較之以共和立憲等爲說者。效力遠過之也。奏中大意。略謂宮中用款。太監張祥齋。敢於直向度支部取索。侵吞甚多。近因修整兩殿及宮中行禮樂器。向內務府索款至四十九萬。又黃金三萬兩。修整乾清宮。索款至五十七萬兩。宮中油漆一項。索款至二十六萬兩。修理溝渠。實用貝七千兩。而開報至八萬兩。修理宮中各處屋宇。度支部已付者。已有一百二十萬兩之巨。張祥齋於各項工程。侵吞至少有二百萬兩。意尙不足。重修長春宮。索款已至百萬。去年八月二十六日。內務府又上奏言。度支部應再繳出一半。奉太后懿旨知道。聞此款實用不過三十萬。其餘百二十萬。皆入太監張祥齋之

手且聞宮中珍寶被張祥齋盜竊無數。該太監現與二商人一名李樂庭一名劉普慶（並譯音）合資開設當舖木廠甚多。當此國事危亟。庫藏空虛之時。而太監張祥齋敢於隨意侵吞巨款。恭請皇太后將其拿交刑部。治以應得之罪。並將家產充公。以裕國用云云。（譯意）此奏留中不發。隆裕甚怒。於是小張勢力更張。毫無忌憚。莫敢侵犯之者。卽監國亦莫如之何。小張之權遂如往日之李蓮英。其後在宮中監修戲臺。又得錢不少。蓋小張之要錢。尤過於李蓮英。但工程一項。已得百萬鎊之多。而賣缺所得。猶在其外。自慈禧崩後。李蓮英氣餒頓衰。又患痢甚久。在一千九百十一年三月四號死。年六十四。死之日其所聚珍寶。多爲小張之黨竊去。太監李義春（譯音）者爲蓮英養子。向小張索取。小張遂設法定以終身之罪。當其時小張氣餒之高。驕傲之狀。直與安得海相同。對於朝中大臣。均蔑視之。在家時曾娶妻生子二人。十八歲乃閹割入宮。得一同鄉太監之助。派一微賤之差。但其恣態甚佳。諳熟音樂。故升擢甚速。其後遂爲隆裕太后之親信。庚子年曾隨往西安。在一千九百十一年立有家室。其黨名李樂廷（譯音）者。在天津買女子三人送之。此等行爲。頗爲隆裕聲名之累。但此事實不爲奇。

蓋凡京中有勢力之太監。靡不如此也。此人在宣統三年中之勢力。可謂結滿洲之局者。故予等不可不詳考其事而述之。當大喪期內。小張慫恿隆裕在宮中造一極華麗之戲臺。此乃禮制所不容者。又有一事。可知隆裕以己之權力加於法律之上。當其時禁烟法令甚嚴。特設專局。以大臣領之。京津兩地查禁甚爲風厲。然北京有一著名之伶人。名譚鑫培。卽俗呼爲小叫天者。在慈禧時本爲宮中供奉烟癖甚深。有一日隆裕欲演劇。傳呼三次不至。內務府人欲責之。譚曰。予一日須吸烟膏一兩。若不吸則一句不能唱。今禁烟之令甚嚴。予一伶人。豈敢在宮中公然吸烟乎。內務府據以上聞。隆裕曰。許他抽烟。並下一特別之諭。許譚供奉處於法律之外。隆裕亦如慈禧。戲學極精。有一次最出名扮武生之楊小樓。在宮中唱長坂坡。隆裕謂其唱做均不用力。命小張責四十板。革去供奉職名。又有人言此事並不關於唱戲。實因楊得罪小張之故也。歷朝家法在大喪期內。皇城不得有修造工作之事。但小張說隆裕用西式造一宮殿。名曰延禧宮。此悖禮之工程。亦不派大臣監工。但由小張一人包辦。永德（譯音）木廠承攬之。此木廠同時爲小張修造私宅。在大佛寺街。一切仿照宮中所用木料及漆皆違

禁者。除屋頂未用黃瓦外。與寧壽宮無異。若依大清律。乃大逆不道之罪也。電燈及陳設古玩等均係儀鸞殿中之物。內有一純金觀世音像。高約四尺。其花園中有一極佳之玉金魚缸。亦宮中物也。所堆假山。亦仿宮中。上有六亭。極華麗。小張家中與隆裕所居長春宮有電話相通。此亦犯大逆不道之條者。室內所陳祭器。亦出自宮中。內有隆裕所賜。小張令將宮中某館拆平。而將其紫檀木料存於永德木廠。爲造私宅之用。特隆裕之寵信。對於監國頗不遜。有一次監國知其竊搬宮中之物。命其以後不許再搬。小張出一金牌示監國。言此太后所命。監國甚怒。彼膽敢謂監國曰。宮中之事。非王爺所能干預。如有須問王爺之事。太后自然派予等來問。且王爺辦事之地。在三所。無事不應至此。監國聞之。亦無如之何也。李家駒初自日本考查憲政歸。爲資政院副院長。上一奏請革除太監制度。彼初以爲此事易行。久之乃知此數千年之弊制。根深蒂固。實無法去之也。一千九百十一年四月。有一日李正豫備召見小張。忽來。徑據上座。謂李曰。予見汝奏。欲將予等革除。此事太后甚怒。予問汝何以發此妄念。竟欲廢除歷朝相傳之舊制。李遜詞答之曰。汝誤會予奏之意。予並非言今日卽廢此制。但請以後缺

額不補。則日後自然漸廢。文明各國均無此等制度。今中國欲行憲政。不可獨異於各國。予盼汝相助。將此意在太后前細言之。太后自然明白。若汝反對。則此事無望能行矣。張仍忿忿曰。太后知此事極怒。言汝不應干預宮中之事。汝其待之。遂拂袖而去。兩月之後。又有一事。使北京之人皆知小張之驕橫。更甚於李蓮英。京中每年至夏季。永定門外南頂地方有跑馬之舉。凡貴族少年皆往。或自賽。或旁觀。宮內太監滿洲貴婦亦羣往觀之。若在此地失體面。皆視為最可恥辱之事。其比賽之性質。與西人賽馬不同。蓋帶有操練之意。其規則甚嚴。若有犯者。必起爭鬪。照規後馬不能越過前馬。唯最好之朋友。則可不論。其馬道甚窄。兩旁觀者甚衆。遇騎術之工者。姿勢之佳者。馬之超駿者。則羣相贊美。一千九百十一年六月。小張同其友沈太監。亦隆裕之親信。率領從人甚衆。往南頂觀賽。帶有極好之騾四匹。沈太監騎一騾。亦在賽中。有一天津人姓王。忽超越其前。沈太監大怒。命從者將王姓自馬上揪下。痛毆之。小張亦在旁罵詈。在其側有一公爵名溥善。乃幼帝之堂兄。對小張曰。汝之勢力。予等皆知之。但汝亦應知皇族不可侵侮。此王姓乃予友。請汝命沈太監速行釋放。否則予將往告肅王矣。小張聞

言大笑曰。汝最好是往告太后。予必以一物賜汝。立命從者亦揪溥善。以馬鞭毆之。巡警在旁。思此事兩面皆不可得罪。遂來勸解。適其時已晚。城門將閉。小張始命釋放。且言明日再打。猶一路痛罵而去。至次日。張沈兩太監帶領永德木廠工人多名。皆手執器具跟隨。太監則執木棍。共約百人。溥善亦邀同滿人多名。皆至南頂。巡警到者亦甚眾。兩方互相罵詈。正欲相打。又有一公爵至曰。予來勸解。此事本溥善失禮。請兩老公不必計較。明日下午皆請至予寓中小酌。以歸和好。小張聞之。氣稍平。溥善亦勉強認錯而罷。北京人謂張太監之權力。雖皇室亦不得不低首。況其餘乎。後溥善以此事告肅王。肅王安慰之曰。你想我請太后懲罰小張麼。果如此。不但不能動他。我與你都要得罪。你最好是忍耐點罷。監國攝政王之困難。非盡由於隆裕。其福晉尤使之難堪。此婦人頗有才智。放蕩無忌。使監國陷於沈悶憂鬱之境。且甚畏懼之。自歐美風尚傳至中國。婦女多有講自由者。監國福晉亦染此風。其舉動恆供報紙最好之資料。爲社會之笑談。其聲勢頗如西方爭選舉權之女子。京中各處酒樓戲館商店集會之中。均有其足跡。到處皆聞其清脆之聲音。見其活潑之神態。終日游樂。曾無稍倦之時。北京人

稱之曰八妞兒。因其爲榮祿之八女也。監國性情謹慎。見其福晉之踰越禮法。濫費無度。深爲憂鬱。然亦無如之何。且彼時至戲園。並不帶從者。唯與其承繼之兄弟名良桂者同行。良桂亦京中有名之紈袴流氓也。每逢廟會及城外市集。或賽馬之處。無不到者。必有多人跟隨其後。指而目之。時至洋貨店中。親自購物。購畢則令記帳。俟監國還之。有一次監國見其太失體統。仗膽責之曰。汝常至南城各處。並不帶領從人。殊於禮制有礙。彼答曰。歐洲皇后王妃皆係如此。予慕其文明而效之。不必汝來干預。清代末年。以堂堂監國之福晉。發現種種怪狀。不可謂非氣運也。亦爲濡染西風之結果。上帝之心。似欲大地之上。更無遵守禮法之國。真不知其將來何所底止也。當革命軍初起時。監國福晉方擬往遊上海。因聞上海之繁華。不勝欣慕。故欲往一遊。若非朝廷忽改。必已成行。則上海報紙不憂寂寞矣。彼之情形。從不知有危險。具一種婦女之勇敢心。其自由與傲夫。大似美國之婦人。以慈禧太后之威嚴。當其前者。靡不震懾失次。其敢抗聲而言者。宮廷內外不過數人。而監國福晉爲其一。自幼膽量卽大。慈禧有一日謂榮祿曰。你的姑娘狠玩皮。無論甚麼人。他都不放在眼裏。連我他都不怕。但慈禧甚喜。

之。故以之嫁醇王。其稍能勸戒之者。唯有桂春一人。桂春蓋其近戚也。監國一身上有隆裕。內有福晉。所處極難。在其短促之攝政期內。措施不合人心。亦固其宜。予等亦原諒之。監國對其福晉。頗爲畏懼。其放蕩不羈之處。未嘗不以爲憂。而苦於不能禁止之也。

第十四章

結論

凡留意於兩年以來中國之事者。見清室傾覆之易。少年維新黨人之得志。靡不衆口一辭。謂中國今爲共和國矣。其國民之性質。社會之組織。皆將自根本改革。而煥然一新。國家自此富強。人民自此樂利。凡此思想。不獨中國人爲然。卽歐美人亦同之。然衆人之知識。甚淺薄而易欺騙者也。斯賓塞爾有言曰。凡政治社會之變遷。雖無限制。而其進行甚緩。決不能一蹴而幾。若欲以短促之時間。求改革之速效。未有不至於滅裂者。且其情勢所迫。終必回循故轍而後已。此語極精。歐美之人。其在中國爲教士者。以人道爲念。恆望人類之得幸福。受欺最易。蓋不知政治家之與人道。乃背道而馳者。而爲報館特別之通信員。震於一時之見聞。亦恆囿於真相而言之。凡持民權自由之

論謂一改革其政治。卽有燦爛光明太平極樂之世界。在其後者。皆烏託邦之夢想而已。其實所謂文明者。不過以禽獸之行。緣飾其外。而強加以文明之號耳。卽今日之歐美各國。何莫非然。無論人類之性質。不能遽變。卽社會之組織。亦豈共和所能易。彼持民權自由之幻想者。以理論之。其所受之欺騙。轉瞬卽須敗露。應不久可醒其迷夢矣。而蚩蚩者仍不察。後來者仍不悟。豈不可怪之甚乎。當中國革命之成。歐洲輿論大爲贊歎。而美國人尤甚。謂東方發現一文明之新國。如旭日之初升。其人民之樂利。誠可欣羨。雖同時有一墨西哥之證據在。而論者冥然罔覺也。美國爲共和之鼻祖。人謂其主義傳播於世界。世人將來無量之幸福。皆其所賜。然此無量之幸福。加賜於墨西哥。加賜於南美各國。加賜於今日之中國。唯見其以更長更甚之愁苦。壓於其人民之身耳。予等觀於中國之事。愈得一確實之證據。凡其人民之性質。與其立國之情勢。不合於代議制度者。則欲維持其治安。而保障其國民之生命。專制之力。決不可少。米爾之言曰。以歷史之經驗言之。此等民族。若經一次之革命。必得一更爲嚴厲之專制。始能安定。此專制之政府。或爲懷抱野心之政治家。雖所行踰於常軌。但使其在代議制度

名目之下。得以稍限制之。有所顧忌而不至已甚。斯可矣。中國之情形。無異於墨西哥。而美國對此兩國所持之態度。絕然不同。其故何在。試一思之。美國人之希望於中國者。雖已受欺。而其態度甚爲正大。謂中國既改共和。從此進於文明。應加贊助。予遊歷於華盛頓。及美國各處。未見有明白真理者。彼等不知凡一民族。若其性質不變。卽改革其政體。仍不能有異於前也。蓋政治者。乃民族性質之所表現者也。換言之。無論何種民族。皆可一旦取得其所欲之政體。然其祖先之所爲。後人必食其果也。今袁世凱仍恢復專制之力。一遵歷史之舊例而行。其施政主於復古。苟袁一日在位。必如爹亞士之治墨西哥。且與滿洲初入關時。亦無大異。此固應於時勢之所求。史可法有言曰。若猶拘牽不卽位之文。坐昧大一統之義。中原鼎沸。將何以維繫人心。號召忠義。此言甚當。將欲定傾止亂。莫急於使國民有主矣。歐人感其社會之教育。受近來物質文明之支配。習於中國之政治法律。見中國近日改革之外狀。其感動而表同情者。固其所宜。不知中國亦與波斯土耳其諸國無異。（卽日本亦同之）表面雖有革新之象。而社會之情狀。仍無異於舊。與歐洲紀年以前相彷彿耳。若論及真正之文明。則歐洲今

日之政治。豈能當之。無論活潑之歐人。及靜默之東方人。固皆不能滿意也。若更論及人心最高尚之樂趣。而辨別其文野。則東方人亦可自謂其道德勝於歐人。且使余儕初喜歐化之及於中國者。不免追悔其立意之誤也。予此書述中國近三百年之歷史。觀之者即可得一極確實之論斷。蓋不本諸中國歷史相傳根深蒂固之習俗。欲以外來之制度移植於中國。而望其國家之鞏固。此至愚極陋之見也。既研究一國之歷史。應知政治表面虛偽之狀。固不足信也。美國博士新遊歷於中國者。謂四十年後中國全國僻陋之縣。必皆有德律風影戲各種衛生之設備。卑爾球戲。（此為美國最通行之球戲）及終身不嫁之女子。（其意即謂中國亦將濡染美俗與美國之情形無異。）此言也。或將成爲事實。然予猶記憶四十年前白丁罕有言曰。予極願中國長保其貧窮。庶不至沾染歐美社會之惡習。此語極有味。若美國博士所稱之種種。必不免移植於中國。則中國人心中一種極深極美之理。必爲其所傷害而無存矣。所謂極深極美之理者。即其婚姻之禮防。及養生送死之厚德是也。此乃中國人之靈魂。而其民族成立之根本也。威士康博士論中國曰。居地球四分之一民族。革新之期即在目前矣。

又謂世界之文明。傳播極速。如千里鏡然。吾不知其所謂革新者。指何等而言乎。若包括民族之性質而言。則以歷史之經驗觀之。凡民族之性質。只能潛移。決無一旦驟變者。予等觀察歷史。可勿懷此幻想矣。且中國歷史之所表現。極爲明確。凡國家最危險之時。不在外患之侵迫。而在其國民原有道德之墮落。此道德乃其國數千年文明之源。亦其民族所以自立之命脈。而不受外力之克服者也。日本國之元老。亦曾有言曰。吾日本經歷最大之改革。而不危及於國本。感受西方物質之文明。而能爲我所用者。蓋由於不使改革之事。傷害國粹之故。予謂中國亦然。居今日之世。改革固不能免。但不可傷及中國之根本耳。凡贊助中國之建設共和政府。信其後福之無量者。皆摧傷中國根本之道德。而危亂其國家者也。今袁世凱所施之政策。蓋華盛頓其名而忽必烈其實。自謂所見同於日本之伊藤。以保存歷史相傳之舊習爲立國之要。彼知其所行沿襲歷史之政策。必爲國民所許。蓋中國人民深受孔子之教。爲上者。但能遵從孔教之理。則無論其行政之或寬或嚴。皆能安之。任其以固有之政治。藏於西方新奇名目之下。但期其不擾亂中國社會之根源耳。觀於日本維新以來。工藝仿效西法。商

務甚爲茂盛。然十年前。其國西鄉有言曰。吾國民崇祀祖先。出於至誠。若謂其僅屬於表面之儀節。相沿之舊習。實屬大誤。天下斷無相傳數千年深入人心之宗教。一旦失其效力者。彼歐化者流。疑祀祖之爲虛妄。不知彼實自墮於虛妄。蓋由不知此中深微之理也。日本之情形如此。則中國可知。日本之講求西學。施行西法。較中國爲久。其所得較中國爲深。而其固有之道德。猶堅強如此。況於中國乎。況於中國爲東方文化之祖國者乎。中國今日猶未全失其篤摯安靜之美德。此等美德。蓋由於慎終追遠之教。而其民族之團結力。尤全在乎此。因其國人皆尊此禮。具此心。始得保存其數千年最古之文明。此最古之文明。有哲學極奧之義。爲人心真樂之源。乃西方人之所敬視而妬慕者也。中國人豈可反自輕賤乎。卽盡舉世界各國之美。以易此。猶應斷斷其不肯易。卽全世界之美。悉歸消滅。而此則斷斷不能消滅也。故中國今日誠宜自尊自重。保存其數千年之美風懿俗。勿令攙雜。此風俗之源。出於孔教。孔教之理。在於立綱。故其以天下爲一家。以國君爲家長之制度。卽吾歐人名之爲家督政治者。乃維持其宗教風俗之要。而不可廢棄者也。閱者觀此書中短短之歷史。其間曾經歷最黑暗最擾亂。

之時。而其後在上者。能遵守孔子之訓而行。遂復底昇平。而發現燦爛光明之世。由孔教之理。故使其國人明忠君死節之大義。具堅忍淡定之勇力。此勇較之奮張盛氣者。爲尤大。乃其所以能保國保種之源也。今中國之少年。有自東京哈佛愛丁堡而歸者。遂敢於侮嫚聖賢。欲毀壞孔子所立樸實堅固之住宅。而代以彼等自謂華美而實脆薄之住宅。此乃中國根本之憂。較之外患之逼迫。尤爲過之。彼等所受西方之教育。亦不完全。即使完全。而以新舊道德相較量。猶覺其輕重不倫也。故雖在廣東風氣最開之地。已有極力反對者。今之政府。宜保存中國純全之風俗。敦篤其報本敬祖之心。吾料中國今日少年一時之趨勢。不久必歸消滅。而仍發現其民族固有之性情矣。當辛丑年與各國議和時。李鴻章所以盡瘁於滿洲者。卽心知此理。彼非不知滿洲政府之腐敗。而極力擁護之者。蓋以有此朝廷。則名義不至散失。故且知當易代之際。必經過甚久之變亂。有一人焉。力征削平而定於一。然後衆人歸心。而基業長久也。自吾儕歐人眼光觀之。今之袁政府。眞能站得住否。尙須徐徐觀察之。但其勝利之機會。則已日加增。今乃其沉機觀變之時。意固在皇覺寺之一僧徒也。彼視共和爲海市蜃樓之

虛象固直言之而不以爲諱。謂共和國權力分散。行政不能靈敏。其弊甚大。彼依此意而行。不獨爲士大夫所擁護。而百姓亦安之也。彼謂中國最大之希望。不能以急激之改革得之。須以穩重漸進之法得之。中國民族之使人不能克服者。在於固有之道德。及其平民不識不知之勇氣。國人堅忍不撓之質性。此國家之靈魂。歷經變亂而不能喪失者也。赫德亦言中國民族。尊理而輕力。其先固曾爲外族所征服。將來亦或不免。然其人心中所信之堅。如基督教然。外界之強力。終有時而竭。不能永存。而其民族仍巍然如故也。聖人垂訓。尊義理而賤權利。所謂以義爲利。而不以利爲利者。此固人類最高之德性也。予此書所述。不過中國歷史之一部分。然閱之者。即可知從古遺傳之風俗。乃其所以造成國家之政體。及生計之情狀者。予等欲明此國中極繁雜之事。必須先知其宗教風俗之真意。故少年維新黨人之著作。其有助於予等者甚少。蓋以道德論。彼在中國。實不啻爲一外國人也。彼雖竭其力。販盡西方種種之學術。然仍不能改百姓之習慣。滅其家族之制。此等少年維新黨人。亦與印度之少年黨人無異。其吸收西方種種之虛象。實自害耳。彼以爲美者。適足以災其身。災其國。而無如其不悟也。

自道德政治各方面觀之。中國人自有其無形之規律。歷年久遠。在今日與在千年以前無異。雖少年維新黨人。極力排斥破壞之。而彼一身之所行。往往仍踐其固有之規律。而不自覺。彼在演說臺上。在報紙上。戴外國帽。穿外國衣。用外國之思想。發外國之言論。大聲疾呼。慷慨淋漓。似純然爲一外國人矣。然彼在家庭之中。在市場之中。在公署之辦事室中。則仍如老病之復發。而暗蹈其所鄙棄之舊律。故知此遺傳之規律。乃必不可磨滅者。歷史之勢力。豈能逃也。中國有一人。其言甚佳。謂此種規律。並非在上者之所定。乃民質國情自然之表現。吾人每日一舉一動。悉遵由之。其力遠過紙上之法律。卽政府亦必循此軌道而行。且中國社會之成立。以家族爲主。以道德爲尙。不盡恃法律之維持。與在上之督察。故國家干涉之力至淺。與歐洲之尙法律而廣巡警者。迥不相同。卽盡去政治干涉之力。而禮教之所維。足以相安。無論政府之良楛若何。百姓之所受若何。而其家族之維繫如故。人心之信仰如故。生活之情況。交際之公義如故。此則用禮治用法治之分。而中國數千年之所以立國者也。